

# BINTU BÌDÌ NÈ

## CYÀ KWIKALAKÙ



Mwanèètù Boone nè nwènù disangisha, ncyà bushùwà nè edi ndyèsè di—dinène bwànyì mèmè bwà kwalukila mu San Bernardino cyàkàbìdì's. Mwaba ewu mmulame bivùlukilu binène byàbùngì byà matùkù àkaadi mapite. Nè pa kuumvwa ne, dilwa dyà kaaba aka, nè dīcīdī ànu nè bwenzeji bùdì nè mwoyi, mōna's, ncyà bushùwà nè bìdì byènza nè ùdymvweku nè disànka bwà mùshindù ùvwà Mukalenge mutùlombòle kùnu, kùkaadi bidimu.

<sup>2</sup> Mèmè mvwa ànu musòmbe pambèlu pààpa mu lupangu lwà kwimanyikijila màshinyì, ànu mpindyewu mene, nteeta bwà kuvùluka bùmwe bwà ku maalu àvwà menzèke. Kùvwa Mādamù Isaacson uvwa mungandamunyi mu Finlande, mu kāmpanyè kàà beena Finlande, ke kulwayè ku màshinyì pānkaavwà pa kuumuka. Ki kwambayè nè: “Ndi dīyī dyèbè dyà mu Finlande.” Nènku ndi ànu ndīkonka Mādamù Isaacson ní mmusòmbèle lwà mu nyūngulukilu emu. Ncīvwa mumanyè to. Kī mmufwānyīne kwikala kaaba aka dilòlò edi to, mmūndī ncīnka? Mādamù May Isaacson, ngwa ku Finlande.

<sup>3</sup> Pashīishe būngà bwalu bwà pabwàbù būndī muvùlùke, bùvwa bwà mukàjī mukesè kampàndà uvwa wakidila benyi ku nzùbu wa cidīilu kūmvwà ndya, mwaba kampànda pabwīpī apa, bàdī bàwùbīkila ne Antlers Hotel. Ngèèla meeji nè mmwòmò, mpindyewu. Nènku inābānzà mutekète awu ùvwa ne. . . Mvwa munkaci mwà kusambila pāmwe nendè. Ùvwa ne. . . Ùvwa, inābānzà mutekète mulenga, kàdī kāvwa mwena Kilistò to. Mèmè kumubiikila ku disangisha adi. Nènku ùvwa mujīmīe mwānà wa mu dibòko, nè ndi ngèèla meeji nè bàyendè, bàvwa batāpùlùke. Nènku tuvwa tusambila bwà wāmōna mwà kulengeja nè bàyendè, anyi bàāmōna mwà kwalukila, pāmwe. Pa nānku, ndi ànu ndīkonka inābānzà mutekète awu ní ùvwakù mufwānyīne kwikala kaaba aka. Nwamònu anyi? Kùdī. . .

<sup>4</sup> Ki pashīishe bukwàbò bwalu bwàkenzeka, bùvwa bwà mwānà mukesè kampànda uvwabò batwàle bàfūmina nendè mwaba kampànda, bendèshe màshinyì bu ditùkù dijimà nānku awu's. Kàdī ùvwa mufwè, ne mulāādika mu mabòkò à mamwèndè. Nè wàkaalujībwa ku mwoyi. Muntu awu. . . Muntu awu ùvwa mwab'ewu anyi? Nè wàkalwila, ngèèla meeji, ùfūmina ku ditūnga dīdī lwà ku luseke *elu*, mu nyūngulukilu emu, kùvwa lwà ku mutù eku. Nènku maamù mutekète awu ùvwa mwendèshe màshinyì awu butùkù bujīmà, ne taatù, kàdī maamù

mutekète awu musòmbè mwaba awu, ne dibungama dyònsò, mwambùle mwanèndè mutekète awu, uvwa citàlù awu. Ki mèmè kudyàmbidila nè: “Diitabuja dyà mùshindù bu nànkù!” Bu nè mvwa mwena lubombo wa mutàmbe bunène pa buloba, nùnkù’s Nzambì mmutwè diitabuja dyà maamù awu mushinga.

Mèmè mukwàta mwànà mukesè awu mu byanza byànyì, mùshindù *awu*, munkaci mwà kusambila. Kupetaye luuya, kubangayè kunyunga, kukàngulayè twísù twèndè tukesè atu. Mèmè kumwalujila maamù. Pa nànkù, bàvwa bàà ku mwaba kampànda. Ncyèna ngèèla meeji nè bàvwa beena Mpenta to, nànsha nànkù. Bàvwa ànu. . . Ngèèla meeji nè cìvwa ànu èkèleeziyà kampànda, wa ku. . . Ncyèna nànsha mumanyè ní bàvwa beena Kilistò, anyì to. Ncìvwakù mubàkonke to. Mvwa ànu mwambwìbwe nè disànka bwà mùvwà mwànà mukesè awu mwalùjìbwe ku mwoyi cyàkàbìdì.

Kubangila ànu piine apu, Mwanèètù Boone, byàbùngì byenzeka. Kàdi tucìdì ànu tukwàcila Nzambì umweumwe awu mudimu Udi ùshààla umweumwe awu makèèlèlè, leelù, too ne kashidi.

<sup>5</sup> Kàdi mu dikènzakana, mèmè è kumòna Mwanèètù Leroy Kopp musòmbè mwab’ewu. Mmusangu wà kumpàla wùndì mumumòne kùkaadi ntàntà mule. [Mwanèètù wa balùme ùdì wàmba nè: “Ewu yèyè m’Paul Kopp.”—Muf.] Paul. Ncyà bushùwà. Leroy’s ke tatwèbè. Ncyà bushùwà. [“Nè yèyè—yèyè ùdì mu Russie, dilòlò edi, pa nànkù wàmusambidilakù.”] Kaa, ekèlekèle! Russie. Èè, aci’s, ndi mumanyè, ewu mùsàlaayi wa bukitù kuntwaku, ùdì kuntwaku ku mudimu wà Mfùmù. [“Cyà bushùwà.”] Pa nànkù, ncyà bushùwà nè ndi nè disànka dyà kwikala kaaba aka nè kuumvwakù mwambi wa citende ewu wàmba mùvwàye musonsola kùdì mudimu wa bwambi utùvwà naawu patùvwà mwab’ewu apu. Ndisànka bunène kaayipù’s wè!

Nènku ndi ngèyemena mpindyewu, nè, bu mutùdì bamanyè nè tudì nè. . . Bantu mbiimàne kuulu, nè katwàkushààla banùlamè ntàntà mupitepite bule to. Tudi bavùlùke masangisha manène à dyondopa awu.

<sup>6</sup> Pashùshe, ndi ngùmvwà nè kùdì mwa—mwa—mwanèètù kampànda mwab’ewu ku mutumba eku, mwaba kampànda, udi munkaci mwà kwenza cibìlù cyà dyondopa, Mwanèètù Leroy Jenkins. Ngèèla meeji mmwòmò. Nè pa nànkù ndi nè kusàkidila kwàbùngì, mwikàle mutwìshìbwe nè Mukalenge ùdì munkaci mwà kumubènesha nè kumupèèsha disangisha dinène dyà menemene. Dìdì. . .

Ekèlekèle, mèmè è kudyùmvwà mutwìbwe mushinga bushùwà, dilòlò edi, bwà kubwela mu èkèleeziyà mùshindù ewu. Ntu misangu yònsò ndyùmvwà ànu bìmpè bitàmbe mu èkèleeziyà kutàmba mùntù ndyùmvwà mu màbàlaasà awu. Kùdì, kàdì, ncyèna cilumbù ne dibàlaasà to. Kàdì,

nudi bamanyè's, mèmè. . . Cìdi mwà kwikala ndiitabuuja dyà màjimbù, anyi ndi ànu. . . Bwànyi mèmè mbimwèke bu bulelèlà. Nwamònu anyi? Bòbò. . . Nudi nukabwela mu mabàlààsà awu mùdi mvità, mvità yà bibùlà, sèkecyè yà bukoyà, bintu byònsò bikwàbò bipitakanamù, nyumà mibi yimwèka bu milembèlèlè mu myaba ayi. Mpindyewu, aci's ncifwànyine kumwèka bu diitabuuja dyà mikìshi, kàdi kabyèna nàнку to. Kàdi paùdi ubwela mu èkèleeziyà kampànda, wèwè. . . pa ciibidilu, ncyà bushùwà nè disangisha dyà nyumà, bidi bimwèka nàнку awu, mbwena kwamba nè, wèwè—wèwè udi utàmba kudyumvwa mudishikàmìne, byenze bu nè kùdi—kùdi cintu kampànda. Bwikadi bwà Nzambi bùdimù. Nudi bamanyè's, mbimwèke ànu bu ne mbishìllàngàne. Ncyèna mumanyè nè nzùbu ùdi nè bwenzeji kaayi to, kàdi mmwaba ùdi bantu bàdisangishila. Mu bushùwà bwà bwalu, bantu bàmwèbàmwè abu bàdi mu mwaba mukwàbò awu, kàdi mu myaba mibi ayi. Pàmwàpa ùdi ànu mmèmè udi wela meeji mùshindù awu. Kàdi, nànsha bìshi, ndi nè disànkà dyà kwikala kaaba aka dilòòlò edi.

<sup>7</sup> Nènku mpindyewu katwèna baswè kunùlama ntàntà mupitèpìte bule to, bwà batèèleji bàdi biimàne kuulu. Nènku tuyààya, mààlabà dilòòlò, mu mwaba kampànda mukwàbò mùnù emu. Ncyèna nànsha mumanyè nè mpenyi piinè apu to. Ndwà pabwìpi apa. [Mwanèètù wa balùme kampànda ùdi wàmba nè: “Orange Show Auditorium.”—Muf.] Mpenyi? [“Orange Show Auditorium.”] Orange Show Auditorium, bwà masangisha à mààlabà dilòòlò. Ndi. . . Eci cidì pankacìnkaci, ndi ngààkula mu masangisha àà mulongulonu àà tuumuka apa tuya kwàka bwà kasumbù kàà—kàà Beena Kantu-ku-byanza bàà Èvànjeeliyò mu Kaabujimà. Biinè abu, mèmè ndi mupetè dyèsè dyà kwakula pa buloba bujimà, bwàbò bòbò. Nè pa nàнку mwòmò amu, mulundà munanga wa dikèma mmutùbìkile kaaba aka, nè tudi nè disànkà dyà kwikala mu disangisha dilòòlò edi.

<sup>8</sup> Mpindyewu, kumpàla kwà twètù kubuulula Bible. . . Mpindyewu, muntu kanà yònsò udi nè dikànda dyà mubidi ewu ùdi mwà kuMubuulula mùshindù ewu. Nwamònu anyi? Kàdi bidi bikèngela Nyumà Mwìmpè bwà kutùkangwila Dìyi, kukàngula luumvu lwètù nè kubuulula Mifùndu. Mèmè ndi ngiitabuuja Bible. Ndi ngiitabuuja nè Ùdi Dìyi dyà Nzambi. Nè ndi ngiitabuuja nè buloba, anyi bisàmbà byà pa buloba, nebilumbulwishiibwè dīngà ditùkù ku Dìyi edi. Mpindyewu, aci cidì mwà kumwèka cyà pabwàcì. Mpindyewu, kùdi bààbùngì bàdi kabàyi bàpetangana nè mmwènenenu awu to.

<sup>9</sup> Mvwa nyiikilangana nè mulundà wanyi kampànda wa lulamatu, ànu àbìdì àdi panshì aa, mwena Kàtòlikè. Ki yèyè kwamba nè: “Nzambi neàlumbulwishilè bàà pa buloba ku èkèleeziyà wa Kàtòlikè.” Byòbì nàнку, ng'èkèleeziyà wa Kàtòlikè kaayi awu's? Nwamònu anyi? Pa nàнку,

Yèyè mubàlumbùlwshìle ku ba-Méthodistes, díbà adi udi wamba bishi bwà ba-Baptistes? Nwamònu anyi? Yèyè mubàlumbùlwshìle ku umwe, mukwàbò awu's mmujìmine. Pa nànkù, kùdi cibwejàkàjì búngì butámbe kuntwaku.

Kàdi bìdi bikèngela bwà twètù kuya ku Yèyè, bwà kupeta díyì dyètù—dyètù dilelèlè, ne Bible ùdi wàmba nè Nzambì neàlumbulwìshè bàà pa buloba ku Yesù Kìlistò. Nè Yèyè ùdi Dìyì. Yone Munsantu 1: “Ku cibangidilu kwàkadi Dìyì, nè Dìyì dyàkadi nè Nzambì, nè Dìyì dyàkadi Nzambì. Nè Dìyì dyàkavwijiibwa mubidi, nè dyàkasòmbela munkaci mwètù.” Nè Èbèlù 13.8 mmwámbe nè: “Yèyè ùdi umweumwe awu makèèlèlè, leelù, too nè kashidi.” Ne ndi ngìtabuuja nè aci m'Bulelèlè. Mpindyewu, ndi ngìtabuuja nè mu . . .

<sup>10</sup> Nzambì, ku cibangidilu, mwikàle Nzambì udi kàyì mikàlu; Yèyè udi nè mikàlu ne . . . anyi kàyì mikàlu, èyowà's wè. Twètù mbàdì nè mikàlu. Èndè meeji mmatámbe bunène, nènku twètù, mu meeji ètù makesè àdì nè mikàlu aa, katwènakù mwà kuumvwa lungènyì Lwèndè lunène, lwà kalùyì mikàlu alu to. Kàdi ki bwà cinyì, pàdiYe wàmba cintu kanà cyònsò, bìdi mwà kumwèka bu cyà pabwàci menemene kutùdi, bwà kuMuumvwa wàmba cintu kampànda mu Mifundu, kàdi cidi nè cyà kwenzeka. Ndi ngìtabuuja nè Mèyì Èndè kaàdyàkujìminakù to. Ki bwà cinyì, ndi ngìtabuuja nè Nzambì, bu mutùdi bamanyè ne twètù mu meeji etu makesè àdì nè mikàlù aa katwènakù mwà kuumvwija meeji Èndè—Èndè manène awu to, Yèyè ùdi ùmvwija Dìyì Dyèndè Yèyè mwinè. Kèna dìjinga nè muumvwiji nànsha umwe to. Yèyè ùdi ùmvwija Dìyì Dyèndè Yèyè mwinè, pa kushìndika Dìyì adi mu movù Wàdi.

<sup>11</sup> Ndi ngìtabuuja nè, Nzambì, ku cibangidilu, nè Noà ùvwa Dìyì bwà ditùkù adi, bwà Mukenji Wèndè.

Mpindyewu, ke kulwaku, paanyimà pàà aci, kulwakù Mòsà. Mpindyewu, Mòsà kàvwa mwà kwikala mwangàte Dìyì dyà Noà to. Kàvwakù mwà kwibaka màzuwà ne kubàpàtula mu Èjiiipitù, ùpwekela pa Musùlù wà Nil to, anyi kuya ku buloba bulaya, anyi ne bikwàbò. Mukenji Wèndè kawàkakwàta mudimu mu ditùkù dyà Noà to; aci ciwwa nciitùpà cyà Dìyì dyà Nzambì òvwa dishìndika nè m'Bulelèlè kùdi Mòsà.

Anyi Yesù kàvwa mwà kwikala nè Dìyì dyà Mòsà to. Kàbìdì . . . Luther kàvwa mwà kushààla mulamè díyì dyà èkèleeziyà wa Kàtòlikè nànsha. Wesley, kàvwa mwà kushààla mulamè Dìyì dyà Luther to. Ne beena Mpenta, kabàvwa mwà kwangata Dìyì dyà ba-Méthodistes to. Bòbò . . . Nwamònu anyi?

Èkèleeziyà ùdi wènda ùkola. Cikondo cyònsò, ncikòsela mwaba mu Mifundu emu. Pa nànkù, Nzambì, ku Nyumà Mwìmpè, ùdi ùbuulula Dìyì Dyèndè, pa kuDìmwènesha nè kuDìshìndika, Yèyè mwinè, bìleeja nè Cidi n'Dìyì Dyèndè munkaci mwà kwenzeka mu ditùkù didìDi dilayiibwe.

<sup>12</sup> Yesù ngwákamba nànkù. Wákamba nè: “Nwènú kanùyì mwà kungiitabuujà Mémè to, itàbùùjaayi byenzedi bìNdi ngènzà,” bwalu yôyi yìdi yifila bujaadiki bwà nè Yèyè ùvwa Nganyì, nwamònu’s, bu nè muntu ùvwakù mwà kwikala mumanyè Mifùndu.

Mpindyewu, Yèyè wàkalwa mu mùshindù wà pabwàwù menemene, wà pabwàwù’s, mu mùshindù wà nè bantu kabàvwa baswè kuMwitabuujà to, bwalu: “Yèyè, bu Muntu, ùvwa ùDivwija Nzambì.”

Pa nànkù, Yèyè ùvwa Nzambì, mu mmwènekelu. “Nzambì ùvwa munda mwà Kilistò, ùpungisha bàà pa buloba nè Yèyè mwinè.”

“Nè muntu nànsha umwe kèna mwà kwenza byenzedi ebi Nzambì kàyì nendè to,” bu mutùdi bamanyè nè Nìkòdeme ngudi mwámbe cyôci aci. Cyà nè, Tubàdi twà beena Yudà tùvwa twitabuujà nànkù.

<sup>13</sup> Mpindyewu, tudi bamanyè ne, Díyì adi . . . Bu bôbò bìikala bamanyè Díyì! Yèyè kwamba nè: “Bu nwikala bamanyè Mòsà, nùnkù’s nudi bammanyè Mémè, bwalu Mòsà wàkafùnda bwà bwalu Bwànyì.” Nènku tudi tutàngila. Bu bìikala batàpe dísu paanyimà mu Mifùndu, bamòne cìvwà Maasiyà ne cyà kwenza, nùnkù’s díbà adi mbaMumanyè ku dishindika adi, nè: “Nzambì, ku Kilistò, ùvwa ùpungisha bàà pa buloba nè Yèyè mwinè,” nè wènzà bwà milayì yònsò yìvwà yà Maasiyà ayi yìfikè ku dyenzeka, yìvwàYe nè cyà kwenza ayi. Yesù wàkafila bujaadiki bwà Díyì adi, wènzà nè Díyì adi diìkalè nè mwoyi bwà ditùkù adi.

<sup>14</sup> Nènku ndi ngiitabuujà nè ncintu cìmwècìmwè citùdi tupìcila leelù ewu’s: Nzambì mwikàle ùfila bujaadiki bwà Díyì Dyèndè mene, mu kushindika cyàkambàYe nè Neènzè aci. Mpindyewu, tudi bamanyè nè edi nditùkù dyà lupàndu, mùdi Nzambì munkaci mwà kubìikila bantu munkaci mwà bàà pa buloba, bwà kuumukabò mu nsòmbelu wa mpèkaatù, kubwela mu nsòmbelu wa mudimu. Nè mu ditùkù didì Nzambì mupòngòlòle Nyumà Wendè ùfùmina mu Dyulu, bimanyinu binène nè maalu à kukèma bìdi nè cyà kushindikija mudimu wà bwambi wà ditùkù edi. Eci cidi . . . cikondo cidi mvulà yàmbedi nè mvulà mishìishe yìlòka, cyàpàmwè. Nènku tudi bamanyè nè kùdi nè cyà kwikala bimanyinu binène nè maalu à kukèma. Byà bwalu, mu màngumba manène àbùngi, Eci ncidyombòdiibwe.

Kàdi ndi nè kusàkidila kwàbùngi bwà biibi byunzulula bìndi mupetè ebi, bwà kubwelamù, nè disonsodiibwa didìbi bipèeshe bansongà aba bu mùdi mpaasàtà wenù ewu. Didì dibenzèje . . . Nènku bu munkaaadi ngènda nkùlákajaja emu, kàbìdi mumanyè nè matùkù àànyì mmabala ku minu, nè mumanyè mpindyewu nè nsongàalùmè eyi yìdi mwà kwangata Mukenji ewu nè kuWùtangalaja too nè ku Dilwa dyà Mukalenge, Yèyè

kàyi mulwè mu lukòngò lwányi elu to. Mwômù emù, mmùndi ntèkemena bwà kuMumòna. Ndi muMwindile ku ditùkù nè ku ditùkù, mutàbàle, mudilamè mudilongòlòle bwà dîbà adi.

<sup>15</sup> Mpindyewu twàkulàayi nè Mwenawù kumpàlà kwà twètù kubala Mukàndà Wèndè, patùdi twinyika mitù yètù apa.

Taatù wa mu Dyulu, tudi nè kusàkidila Kùdi, bu mutùdi nè mwoyi dilòòlò edi, bwà kwalukila ku cimenga cinène eci. Basòmbe mu cipaapu cyà mmwènekeli wa mikùnà emu, batàngile kuulu tumòna nêjè, nè bilòngò byà oranges munkaci mwà kwela, musangu ùmwè, mbuloba kaayi bwowela byanza bùdi mutùpèeshe bwà twètù kusòbelamù's wè! Ne mùshindù mwinè wutùdi tumòna muntu mutàcishìbwe nè—nè mwenze maalu mu buloba ebu, bìdi bitùfikisha twètù biine ku didyùmwa bundù, Taatù.

Tudi kaaba aka, dilòòlò edi, bwà kuteeta kwenza diditacisha dyètù, bwà kuteeta kufikisha bantu ku dimòna cintu cinène cidi Nzambi mwenzè eci, nè kumanya nè kùdi cintu kampànda citàmbe bunène ànu dyàmwàmwa dyàdya. Twatàngilaku ku cyòci aci, dilòòlò edi, Taatù, patùdi tubuulula mu Dìyi Dyèbè nè tubala apa. Tudi mwà kuDìbala, Taatù, kàdi lekèlàku bwà Nyumà Mwimpè àtùbuulwilèDi ku dibuulula. Bwalu tudi tulòmba nùnkù mu Dìna dyà Yesù. Amen.

<sup>16</sup> Mpindyewu, nwénù bàdi baswè pàmwàpa kwangata tuntu tufùnda, nè—nè kubala Mifùndu pàmwè nè mwambi abu, bu mùtù—bu mùtùbo bàYibàla pa ciibidilu's. Nè bìvwa pa ciibidilu nè, pàmvwà... kùkaadi bidimu, kabìvwa bikèngela bwà mèmè kufùnda Mifùndu yànyì to, nè bikwàbò. Kàdi nkàadi mukùlumpè ndambù kacya ànu piinè apu. Nwamònu anyi? Ngafumu ku sisambwìsha bidimu makùmi àbìdi nè bìtaanu, ànu àbìdi àdi panshi aa, kùkaadi bidimu makùmi àbìdi nè bìtaanu's. Pa nànkù, bìdi byènza bibi ndambù. Kàdi ncidi ànu nteeta kushàala kacya ngàkwàta ku kantu nè kantu kàndi mumanyè mwà kwenza mu Dìyi Dyèndè aku, too ne pàdiYe ùmbiikila.

<sup>17</sup> Mpindyewu, tùbuululàayi mu Yone Munsantu nshapità wa 14, Mufùndu mumanyìke kùdi bònsò utùdi baswè kubala dilòòlò edi, bwà kupàtulaMù dyumvwija, bu Mukalenge mwà kwanyisha. Pàmwè ne bònsò mbamanyè cyòci eci. Mbimwèke ànu bu nè, misangu yàbùngì, bàtu bàkwàta nawù mudimu mu mayiisha à mu madilu. Pìikalàku kùvwakù cikondo címvwà muswè kuyiisha mu madilu, s'civwa nè cyà kwikala kùdi bàà pa buloba aba. Kubàlekela bàfwa nè bàlediibwa cyàkàbìdi. Yone Munsantu 14.1 too nè ku 7, ngèèla meeji nè, ndi mufùnde mwab'ewu.

Myoyi *yènu kayilubakanyi to*, panwikalà biitabùuje Nzambi, *ngitàbùuajaayi kàbìdi mèmè pàanyi*.

*Mu nzùbu wa Taatù wanyì mùdi bisòmbedi byàbúngì: . . . bu nè kabìvwa nàнку to, nùнку's ndi munwǎmbile. Ndi nya bwà kanùlongolwela kaaba.*

*Nèнку mèmè muyè mukanùlongòlwèle mwaba, nèndwe cyàkàbìdì, bwà kunwàngata kùndi mèmè mwine; bwà nè mwaba Ùndi awu, nwìkalapù pèènu.*

*. . . kùndi nya nudi bakùmanyè, nè njila nudi bamumanyè.*

*Toomààsè wàkamwambila nè: Mukalenge, tudi bamanyè. . . kùdi uya; kàdi mmunyi mutùdìku mwà kumanya njila?*

*Yesù wàkamwambila nè: Mèmè ndi njila, bulelèlè, nè mwoyi: muntu nànsha umwe kèna ùlwa kùdi Taatù to, ànu kùndi mèmè.*

*Bu nè nuvwa bammanyè, nuvwa mwà kwikala bamanyè Taatù kàbìdì: nè kubangila ku leelù nwàmumanyì, nè nwàmumònu.*

Mukalenge àsakidilèku mabènesha Èndè ku dibala dyà Dìyì Dyèndè. Nèнку netooshèKu kàbìdì dísù, mu bikondo patùdi twenda tutungunuka apa, patùdi baswè ànu kwakulaku pa kaadìleesònà kakesè kùdi Èkèleeziyà.

<sup>18</sup> Makèèlèlè dilòòlò awu, mvwa nsanganyibwa mu Yuma, mu Arizona, mwine amu, ke kwanyì kumbèlu patùdi twakula apa. Ndi—ndi. . . Pámvwà mwaba ewu kumpalà mvwa musòmbèle mu Jeffersonville, mu Indiana. Mpindyewu ndi mu Arizona, ku cikèèná-kumòna cintuma kuntwaku, kùkaadi ndambù wa bidimu. Nèнку tudi basòmbèleku mpindyewu. Ncyèná nè èkèleeziyà nànsha umwèpelè kuntwaku to.

Mwanèètù Green, mwanèètù wa balùme udi neetù ewu, mmutwàdìje tabernacle kuntwaku kùdi. . . umwe wa ku maAssemblées de Dieu, èkèleeziyà kampànda wa munkaci mwà cimenga, maAssemblées. Mbadisanga, nè ngèèla meeji nè bònsò mbakadisanga nè Mwanèètù Brock nè Mwanèètù Gilmore, bashiye èkèleeziyà ewu munda mutupù. Nèнку Mwanèètù Peary Green, wa ku—wa ku Texas, kubwelaye ne kwangatayè kaaba aku, mwine awu's ngudi muswikàkàne neetù. Tudi nè disànka dyà kumanya nè—nè Mwanèètù Green wákàngulu cyàkàbìdì èkèleeziyà ewu uvwabò bakàngè awu.

<sup>19</sup> Nèнку makèèlèlè dilòòlò awu, pámvwà ngàakula mu Yuma mwàmwa bwà Beena Kilistò baa Kantu-ku-byanza, mvwa mwakùle pa cyena-bwalu cyà *Dyambwibwa*. Mpindyewu, aci's ncifwànyine kwikala cyena-bwalu cyà pabwàci bwà kwakula munkaci mwà, ku didyà dyà—dyà mikùùkùkù, kàdi bantu bààbúngì kuntwaku bàvwa beena Kilistò. Nèнку awu ke mùshindù wùdìbi mu tùmpanyè etu nùнку, anyì mu—mu èkèleeziyà kampànda. Ndi mufwànyine kwamba mpindyewu nè:

“Mbanganyi bàà kunùdì bàdì beena Kilistò?” Pàmwápa cyanza cyónsò ncifwànyine kubànda. Wèwè udi mwena Kilistò. Nè pa nànkù, pìikalàbí nè tudì beena Kilistò, ngèèla meeji nè bìvwa bikèngela bwà twètù kudyànjila kumanyishiibwaku. Kabyèna bikèngela bwà twètù kudicinkidilaci ànu cyanaànà to. Tudì tumanyishiibwa bwà cìikalà kwètù kutúyaaya.

<sup>20</sup> Nènku ndi muswè kwakula pa cyòcì aci dilòòlò edi. Nè cyena-bwalu necìikalè nè: *Bintu Bidì Nè Cyà Kwikalakù*. Nènku mpindyewu, mvwa ngàakula makèèlèlè dilòòlò awu pa *Dyambwibwa*, nànkù dilòòlò edi, Ndi muswè kwakula pa cyena-bwalu eci, bwà ngaamòna mwà kuciswikakaja pàmwè nè Diyishi dyà makèèlèlè dilòòlò adi. Mpindyewu, nekwiikalè Dyambwibwa, bwà aci’s tudì bamanyè. Mmu matùkù àcìlwalwà, mwikalàcì.

<sup>21</sup> Mpindyewu, mwab’ewu Yesù ùdi munkaci mwà kwakula, bwà bwalu nè, mMudyanjile kuya bwà katùlongolwela mwaba. “Myoyi yènu kayilubakanyi to.” Mpindyewu, Yèyè ùvwa wàkula nè beena Yudà. Wàmba nè: “Mpindyewu, nuvwa biitàbùùje Nzambì, Ngiitàbùùjaayi Pàànyì. Ànu bu munùvwà biitàbùùje Nzambì amu, Ngiitàbùùjaayi Pàànyì, bwalu Mémè ndi Mwàna wa Nzambì.” Nwamònu anyi? “Nènku, Nzambì,” mu ngaakwilù mukwàbò nè, “Mémè ne Taatù Wanyì tudì Umwe. Taatù Wanyì mmusòmbèle munda Mwànyì. Ne cinùdì numòna cyènzeka, Mémè ngèenza, kì m’Mémè to, n’Taatù Wanyì udi musòmbèle munda Mwànyì. Yèyè ngudi wenza byenzi.”

“Nzambì ùvwa munda mwà Kilistò, ùpungisha bàà pa buloba ne Yèyè mwinè.”

<sup>22</sup> Bìvwa bipeepèle bwà beena Yudà bàvwà balongeshiibwe abu, mu nkòngo nè nkòngo, bwà kwitabuuja nè kùvwa Nzambì munène mutàmbe-mfùkìlu. Kàdi pa kwela meeji nè Nzambì awu ùvwa mutùùlùke ne mwikalè ùDìmwèneshila ku mupèrsònà wà Mwan’Èndè, Yesù Kilistò, Nzambì ùvwa musòmbèle mu mubidi wà musunya, aci cìvwa citàmba kubàkolela ndambu bwà ku—kuumvwa.

Kàdi Yèyè wàkamba nè: “Mpindyewu, bu munwitàbùùji Nzambì, ngiitàbùùjaayi kàbìdì Mémè. Bwalu mu nzùbu wa Taatù Wanyì mùdi bisòmbedi byàbùngì, nè Ndi nya bwà kunùlongolwela kaaba.” Mwoyi wà Yesù ùkaavwa pabwìpi ne kujika, pa buloba apa.

Yèyè ùkaavwa muleeje bantu, nè mubàjaadikile nè, Yèyè ùvwa Yèhowàh mumwènèshiibwe mu mubidi, ku bimanyinu binène nè maalu à kukèma, nè mèyi maleedila à mu Bible àvwa Yè muleedile, bwèndè Yèyè mwinè. Nè Yèyè wàkajaadika nè Yèyè ùvwa Nzambì, mumwènèshiibwe.

Mpindyewu Yèyè wàkamba nè: “Panùdì numòna mwoyi Wanyì wùtwa ku ndekeelu, wùdì wùtwa ku ndekeelu bwà kiipàcìlà kampànda. Nènku ndi nya, bwà kanùlongolwela



mwaba; bwà nè mwaba Ùndì awu, nwikalapù pèènù.” Ki bwà cinyi Yesù ùdì wàmabila bayiidi Bèndè nè mwoyi ewu kawèna ùshikidila mu lufù to.

<sup>23</sup> Mpindyewu, mwwa ngàmba nè eci cìvwa ncyena-bwalu cyà ku madilu. Vùlukàayi nè, twètù, lufù lùdì lùsanganyiibwa kumpàlà kwètù mene, nè katwèna bamanyè ní kùdì mwà kwikala bàmwè mu nzùbu emu dilòlòlò edi to bààpanga kupàtuka mwab’ewu biikàle nè mwoyi, mu mwoyi wa mubidi ewu. Mùshindù awu ki ùdibi bilubidile. Tusunsa tùtaanu kuumukila ku mpindyewu, mbifwànyine kwenzeka nè nsongà, yà mbuidi tumatuma, nè bunsongà bàdì mu nzùbu emu biikale citàlu mu tusunsa tùtaanu kuumukila ku mpindyewu. Aci’s ncilelèlè. Nènku kàbidi, mbifwànyine kwenzeka nè, mu tusunsa tùtaanu kuumukila ku mpindyewu, tudi bafwànyine muntu nè muntu kwikala mu Butùmbi. Katwèna ànu bamanyè to. Aci’s cidi mu byanza byà Nzambi. Yesù wàkamba nè Yèyè kàvwa mumanyè to, Yèyè mwinè, díbà diikala cikondo aci mwà kukùmbana, kàdi: “Aci cìvwa ànu mu byanza byà Taatù nkààyèndè.”

<sup>24</sup> Mpindyewu, kàdi, Yèyè ùvwa ùbàmabila, nè, paanyimà pàà lufù kùdì mwoyi. Bwalu: “Ndi nya nkalongòlòle mwaba,” mbwena kwamba nè, bwà kubààkidila, ùleeja mwaba awu nè, Yèyè ùvwa wàkula naabò, bwà nè kùvwa mwoyi kampànda—kampànda paanyimà pàà ewu mwoyi mumanè kujika. Kàdi mbusàmbi kaayi’s bùdì aci nè cyà kutùpèèsha twètù bònso, bwà kumanya nè, paanyimà pàà mwoyi ewu mumanè kujika, kùdì mwoyi kampànda, wutùdì tukabwelamù. Nènku paùdì wenda ukola, aci cidi citàmba kushààla bulelèlè kùdì wèwè. Paùdì ubanga kumòna matùkù à mwoyi wèbè ènda àseemena pabwìpì, díbà adi àdi àbanga, udi ubanga kwenda kudìlongolola wenda useemena, wenda udìlongolola bwà bwalu bunène abu. Cidi mpindyewu. . . Cidi nditùngunuka dyà mwoyi wùm wèwè wùm wèwè ewu mu buloba bukwàbò, mu mwaba mukwàbò.

<sup>25</sup> Dilediibwa dyèbè pa buloba apa divwa didyànjila kulongolola. Ngèèla meeji nè udi witabuuja aci. Yònsò wa kunùdì mmumanyè nè dilediibwa dyètù divwa didyànjila kulongolola. Uvwakù mumanyè nè buumùntù bwèbè kaaba aka kabwàkabanga ànu ku bwalu bukwàtakaja anyi meeji kampànda to anyi? Byònsò bìvwa bidyànjila kulongolola kùdì Nzambi, kumpàlà kwà difùkà dyà dyulu ne buloba, bwà nè wèwè ùvwa mwà kwikala kaaba aka. Nzambi udi kàyi mikàlù ùvwa mumanyè. Nè bwà kwikala—bwà kwikala kàyi nè mikàlù, bìvwa bìkèngela kumanya Yè nkùpà yònsò uvwakù mwà kwikala pa buloba, nè búngì bwà misangu yìvwàye mwà kupòdya. Ke kwikala kàyi mikàlù nkòkò aku. Nwamònu anyi? Wèwè, ètù makesè—ètù meeji makesè aa, kaèna mwà kudifwànyikijila cidi *kwikala kàyi mikàlù* cyùmvwija nànsha. Nzambi udi kàyi mikàlù, Yèyè ùvwa mumanyè bintu byònsò. Ki bwà cinyi, kakwèna cintu nànsha cimwè mu cincyòmpancyòmpana to.

26 Twétù bamanye Dìyì dyà Nzambì, tudi bamanyè mwaba utùdì ne mwoyi. Tudi bamanyè díbà ditùdimu nè mwoyi edi. Tudi bamanyè cìdì kumpàla. Tudi tumòna citùdì bapite. Nè Mukàndà wà Nzambì ndibuulula dyà Yesù Kilistò; Byenzi Byèndè munda mwà bikondo, bìvwà bisanganyibwa too nè ku Mukàndà wà Bwàkabuulwibwa abi, nè pashùishe milayi Yèndè yàlwà ayi. Pa nànkù, milayi Yèndè yònsò mmilelèlè. Nzambì kèna mwà kwambakù Dìyì nànsha òmwè kaDìyì dishìndikiibwe to. Dìyì dyònsò didiYe wàmba didi nè cyà kwenzeka. Kumpàlà kwà difùkà dyà dyulu nè buloba . . .

27 Bàmwè bantu bàtu bàbwejakaja Genèsè, mwaba awu, pàakambàbo nè: “Nzambì ùdi ùDyàmbulula.” To. Bìdi ànu nè, nudi nuumvwa bibì. Nwamònu anyi?

Nzambì, ku cibangidilu, Yèyè wàkamba nè: “Kwìkalè. Kwìkalè. Kwìkalè.” Buloba bùvwà ànu mìdimà cyanààna, mu cimvundù cinène. Nànsha pàakambàYe nè: “Bukènkè bwìkalèku,” kùvwà kufwànyine kwìkala nkàmà yà bidimu kumpàlà mene kwà bukènkè kupàtukabò. Kàdi pàakacyambàYe, cìdì nè cyà kwenzeka. Cìdì nè cyà kwìkala mùshindù awu. Nwamònu anyi? Nè Yèyè wàkaakula Dìyì Dyèndè. Mamiinu awu àvwa mwinshì mwà màyi. PàkuumishàYe buloba, díbà adi ke mamiinu kutòlokawù. CìdiYe wàmba cìdì nè cyà kwenzeka.

28 Wàkamba, kupìcila ku bapròfetà. Mvwa muciteele makèèlèlè dilòlò. Bu mùdì, tudi twangata Yeshàayi, wàkamba nè: “Virgò neimìtè difù.” Nganyi uvwa mufwànyine kwela meeji awu, bwà muntu uvwabò beelela meeji munkacì mwà bantu, bwà kwamba dìyì bu nànkù nè: “Virgò neimìtè difù”? Kàdi bwalu yèyè . . .

Mupròfetà ùdi lumwènu lwà Nzambì. Yèyè mmwenzà mu mùshindù wà nè kèna mwà kwamba èndè mèyi à sungasunga to. Cìdì nè cyà kwìkala Mèyi à Nzambì àdiye wàkula. Yèyè ùdi ànu mùdì lumwènu amu, nè yèyè ùdi mukana mwà Nzambì.

Nànkù awu, ki bwà cinyì, wàkamba nè: “Virgò neimìtè difù.” Pàngà apa kàvwa mwà kucyùmvwà to, kàdi Nzambì nguvwa mucyakwile kùdiye. Bwalu, Yèyè wàkalaya nè: “Yèyè kàvwa nè cyà kwenza cintu nànsha cimwè pàvwàYe kàyì muCìbuulwile basadidi Bèndè bapròfetà nànsha.” Pashùishe, pàakambàye cyòci aci, civwa mbidimu nkàmà mwandamukùlù kumpàlà kwà kwenzekacì. Kàdi civwa nè cyà kwenzeka.

Ndekeelu wa byònsò, Mèyi à Nzambì awu kwelawù lwongò mu difù dyà virgò kampànda, è kwimitayè difù nè kulelayè Èmanùwèlè. “Mbatùlele—Mwànà, mbatùpèeshe Mwànà wa balume. Dìna Dyèndè nedibìikidiibwè nè: ‘Mubedyanganyi,’ ‘Nzambì wa bukòlè,’ ‘Mukalenge wa Ditalala,’ ‘Taatu wa kashidi.’” Bìvwà bikèngela kwìkalabì mùshindù awu, bwalu Nzambì ùvwa mucyakwile mukana mwà bapròfetà Bèndè. Nè Mèyi wònsò à Nzambì àdi nè cyà kuula.

Ki bwà cinyì, tudi bamanyè nè Yesù mmuyè bwà kulongolola mwaba, bwà kwangata cisàmbà kùdì Yèyè mwinè. Bantu abu mbanganyi, ndi ntèkemena nè tudi citùpà cyà bantu abu dilòlòlò edi. Byôbi kabiyi nànkù to, mulundà wanyì, Nzambi mmusebè njila, mùshindù kampànda, wà wèwè kubwela mu cyôci aci pawikalà muswè. Udi pa budishikaminyi bwà disungula. Udi mwà kwenza maalu mu mùshindù wùdì muswè. Kàdi mpindyewu mònàayi, mpindyewu, mu buloba bùcilwalwà ebu. Kùdì buloba bùcilwalwà.

<sup>29</sup> Ànu mùdì dileidiibwa dyèbè pànwapa, mûmvwà mwambe, wèwè uvwa mulungòlòdiibwe. Nzambi ùvwa mumanyè nè wèwè newikalè mwab'ewu.

Nènku mpindyewu udi mumanyè, nànsha mene bintu bìvwà baledi bèèbè benzè, mpindyewu, bantu bàdi bèèla meeji nè abi kabyèna bìya ku lukòngò nè lukòngò to, kàdi pààbì's bìyaaya.

<sup>30</sup> Mu Mukàndà wà Ebèlù, ngèèla meeji, lwà ku nshapità wa 7 aku, bàdi bààkulamù, kùdì Pòlò muntwamu, mufùndi, ngèèla meeji nè ùvwa nyéyè, ùvwa wakula pa—pa bwalu bunènè bwàkenzekela Abraham, bwà nè wàkafuta byàdiikùmì kùdì Melekisedekè, pàvwàye wàlukila ùfùmina ku dishebeya dyà mfùmù. Nènku mpindyewu kwambayè, ne: “Lewì ùvwa mu twonyi twà Abraham, pààkatwilanganàye nè Melekisedekè, pàvwàye ùfùmina ku dishebeya dyà bamfùmù apu.” Nènku wàkacibala nè cìvwa “Lewì ùvwa mufutè byàdiikùmì, yéyè pèndè, pàvwàye mu twonyi twà Abraham,” kakwèndè wa tatwèndè wa kakwèndè.

Ne Yèyè ùdi ùbadila mpèkaatù yà bantu pa bààbò—bààbò bânà balela, ku lukòngò nè ku lukòngò, lwikala kalùyì lulamè Diyì Dyèndè alu. Nwamònu anyi?

<sup>31</sup> Nwènù bònsò nuvwa badyànjila kulongolola kùdì Nzambi. Kakwèna cintu nànsha cimwè cidi cyènzekà ku mpùùkàpùùkà to, bwà Nzambi. Mmumanyè byònsò pa bwalu abu. Byònsò mbidyànjila kulongolola, bidyànjila kulongolola kùkaadi nkòngò yàbúngì, bwà wamòna mwà kwikala kaaba aka dilòlòlòlò edi. Nuvwakù bamanyè aci anyi? [Disangisha didi dyàmba nè: “Amen.”—Muf.]

Anji elààbì meeji tǔng, bwà nè, wèwè, musangu kampànda. . . Nèngàmbulule cyôci eci kàbidì. Wèwè, musangu kampànda, uvwa munda mwà tatwèbè, mu mifungù yà tatwèbè. Mpindyewu, yéyè kàvwa mukumanyè mwinè musangu awu to, anyi wèwè kùvwa mumumanyè to mwinè musangu awu. Kàdi, nudi numòna's, pashiishe wèwè kuteekiibwa mu dibùulà dyà buloba bwà dyela mamiinu, munda mwà maamù, mu dibàkà dinsantu. Nènku ki wèwè kulwa muntu mupàtwila patòoke mu cimfwànyì cyà tatwèbè, dîbà adi kùdì bwobùmwe.

<sup>32</sup> Mpindyewu, mùshindù ùmwèpelè wùdì mwà kwikala mwànà wa balùme, mwànà wa bakàji wa Nzambi, bwalu bìdi

bikèngela bwà wèwè kwikala . . . bikèngela wikalè nè Mwoyi wà Cyendèlèlè. Ne kùdi mùshindù ànu wùmwèpelè wà Mwoyi wà Cyendèlèlè, ne mwinè awu's m'Mwoyi wà Nzambi. Mùshindù ànu wùmwèpelè wà Mwoyi wà Cyendèlèlè, wùvwa n'Nzambi. Mwaba awu, bwà kwikala mwànà wa Nzambi, bìvwa bikèngela bwà wèwè wikalè munda Mwèndè misangu yònsò. Mutòlokù wà Mwoyi wèbè, Mwoyi wa nyumà, dilòlò edi, ùvwa munda mwà Nzambi, Taatù awu, kumpàla mene kwà kwikalakù nànsha kapwishi. Nwamònu anyi? Nè wèwè kwènà cinga cintu nànsha ànu dimwèneshiibwa dyà mùtòlokù wà Mwoyi ùvwa munda mwà Nzambi, bu mwànà wa balùme wa Nzambi.

Mpindyewu udi muleejìibwe patòòke, paanyimà pàà Dìyi Dyèndè dimanè kubwela munda mwèbè, bwà Kukenkesha cikondo eci, wèwè udi dyakula dyà patòòke: Mwoyi wà Nzambi munda mwèbè, bwalu wèwè udi mwànà wa balùme anyi wa bakàji wa Nzambi. Ki bwà cinyi, nudi búmvwè cìndi muswè kwamba aci anyi? [Disangisha dìdi dyàmba ne: "Amen."—Muf.] Nwamònu anyi? Udi mu. . . Udi mpindyewu mwenjìibwe, udi musòme bu èkèlezìyà emu, dilòlò edi, bwalu wèbè mudimu ngwà kuleeja Nzambi patòòke kùdi ditunga edi, nè mutumba unùdi basangile naawù ewu.

Mwaba wònsò wùdi awu, Nzambi ùvwa mumanyè nè newikalè kaaba aka, bwalu bìdi bikèngela wikalè umwe wa ku mìtòlokù Yèndè, anyi byambiibwà Byèndè. Bìvwa bikèngela bwà wèwè kwikala nànkù. Bu nè wèwè uvwakù kwònsò eku, pawikalà nè Mwoyi wà Cyendèlèlè, dìbà adi Wòwò wùvwa misangu yònsò ànu Mwoyi wà Cyendèlèlè. Nènku Nzambi, kumpàlà kwà kwikalakù cishimikidi kampànda, cyà buloba, ùvwa mumanyè nè wèwè uvwa mwà kwikala kaaba aka. Nènku pàdi Dìyi, anyi màyi, "dyowesha dyà nè màyi à Dìyi adi" dikumacìle pambidi pèèbè—pèèbè, byambiibwe patòòke mu kampànda. Mpindyewu udi mu bwobùmwe nè Tatwèbè, Nzambi, ànu mùdi naabù ne tatwèbè wa pa buloba awu amu. Nwamònu anyi? Nwènù nudi beena-mwàbò bàà Mfùmù; kí mbeena-mwàbò to, kàdi nudi bàna, bàna bàà balùmè nè bàà bakàji bàà Nzambi udi nè mwoyi, piikalàbi nè Mwoyi wà Cyendèlèlè mmusòmbèle munda mwèbè.

Mpindyewu, dìbà adi, bu Wòwò musòmbèlemù, Yesù's ùvwa kaabujimà kàà Nzambi kamwèneshiibwe. Yèyè's ùvwa kaabujimà kàà Bunzambi mu mùshindù wà mubidi. Ki bwà cinyi, pàakalwàYe pa buloba nè kumweneshiibwa mu mubidi, nuvwa mwab'ewu munda Mwèndè dìbà adi, bwalu Yèyè ùvwa Dìyi. "Ku cibangidilu kwàkadi Dìyi; Dìyi dyàkadi nè Nzambi, nè Dìyi dyàkadi Nzambi. Nè Dìyi dyàkavwijiibwa mubidi, nè dyàkasòmbela munkaci mwètù." Dìyi dyàkavwijiibwa mubidi. Ki bwà cinyi, wèwè wakenda Nèndè, paùvwa munda Mwèndè, pàvwaYe pa buloba apu. Wakakènga Nèndè, nè wakafwà Nèndè. Wakajiikiibwa Nèndè. Nènku mpindyewu nudi babiishiibwe ku

lufù pàmwè Nendè, nè biikàle byambiibwà bimwènèshiiibwe byà Nzambi, basòmbe mu myaba yà mu Dyulu; bamanè kubiishiibwa ku lufù, babiishiibwe ku Mwoyi mupyamùpyà, nè basòmbe mu myaba yà mu Dyulu mu Kilistò Yesù. Kaa, aci's cidi nè musinga wàbúngi be, mu matùkù aa, Èkèleeziyà wa yààyà! Aci's cidi nè musinga wàbúngi kutùdi, bwà kudimòna basòmbe bilondèshile myaba mu Yesù Kilistò!

<sup>33</sup> Mpindyewu, piikalàbi nè twètù tudi byambiibwà byà Nzambi abi, katwèna mwà kwikala nè mwoyi ku twitabàayi to. Katwèna mwà kwikala nè mwoyi ku cyena-màngumba to. Tudi nè cyà kwikala nè mwoyi ku Dìyi, bwalu Mukàji-musèla udi citùpà cyà Mubàki, bu mùdi mukàji kanà yònsò ewu mwikàle citùpà cyà bàyendè. Ki bwà cinyi, tudi nè cyà kwikala Mukàji-musèla Dìyi awu. Nènku Mukàji-musèla Dìyi cinyi? Dimwènèshiiibwa dyà dībà edi, Mukàji-musèla, kī ntwitabàayi anyi ndingumba to; kàdi dīyi dyà mukana mwà Nzambi didi nè mwoyi, cyambiibwà cidi nè mwoyi cyà Nzambi, cileeja patòòke kùdi bàà pa buloba byambiibwà byà Nzambi, mu difumbà dyà Mukàji-musèla udi nè cyà kuleejiiibwa patòòke mu dībà ditùdi nè mwoyi mpindyewu edi.

<sup>34</sup> Martin Luther kàvwakù mwà kuleeja patòòke byambiibwa bitùdi tuleeja patòòke ebi to, bwalu aci cìvwa ku cibangidilu, dibiishiibwa dyà ku lufù, bu mùdi lutete lwà blé lwàkabwela mu buloba.

<sup>35</sup> Mpindyewu, tudi tuteela cyàkàbidi cyòci eci. Nutu pàmwápa babale mukànda awu, mùvwa mwena Allemagne awu munkaci mwà kungelulwila, è kwambayè mùmvwa mukoleshi wa maalu wa ku bakoleshi bònsò bàà maalu. Kakùyi mpatà to yèyè ùvwa—yèyè ùvwa ùbèngangana nè cyònsò cìvwa cibiiikidiibwà nè n'Nzambi aci, nè wèlulwila mene nè Nzambi. Yèyè nè: “Nzambi uvwa mwà kukangula Mbú Mukúnze nè,” mwàkambaye, “kupàtula cisàmbà Cyèndè; nè kusòmba muvùnga mabòko mutèke mu difù Dyèndè, kàdi kulekela (mu bikondo byà midimà abi) bantu bònsò abu bàfwa nè bàkènga, bàna bakesè abu bàdiibwa kùdi nyama yà ntambwe.”

<sup>36</sup> Nudi numòna's, ndongamu mujimà—mujimà, Èkèleeziyà mujimà, mmwibakila pa dibuulula dyà kùdi Nzambi. Yesù wàkamba, mu Maatàayi Munsantu, nshapità wa 16 nè: “Kī mmunyiinyi nè mashi bìdi bikubuulwile eci to, kàdi Taatù Wanyi udi mu Dyulu ngudi mukubuulwileci.” Cìvwa ncinyi aci? Dibuuulula dyà nè Yèyè ùvwa Nganyi. “Nè pa lubwebwe elu, Nèngiibakilèpu Èkèleeziyà Wanyi, ne biibi byà ifèrnò kabyèna mwà kuMutàmba bukolé to.” Nwamònu anyi?

Dibuuludiibwa dyà Yesù Kilistò mu dībà edi, kī ncìvwàYe mu dībà dikwàbò to, cìvwaYe mpindyewu aci, Bible ùdi wàmba patòòke, cidi cyènda cikola mu Mukàji-musèla, too nè ku cipidi cikumbànàngane. Ki bwà cinyi, bu nè lutete lwà blé, Kilistò,

lùvwà nè cyà kumata mu buloba, ki mùvwà kàbìdì Mukàjì-musèla nè cyà kumata mu buloba, munda mwà bikondo byà mîdimà. Lutete lwônsò lùdì lùya mu buloba lùdì nè cyà kufwà, bwà cyanààna kalwèna mwà kuvulangana to, kuvulangana kàbìdì to. Nè Èkèleeziyà munène wàkaasayè mu Ditùkù dyà Mpenta awu, ku ditùma dyà Nyumà Mwimpè, byàkakèngela bwà kukengayè bwà kufwila diitabuuja nè kubwela mu buloba, kubwela mu buloba mu cikondo cyà mîdimà, bwà kulòpola cyàkàbìdì mu cikondo cyà Luther, nè kupàtuka kuya ku cipidì mu kaabujimà cyà Mukàjì-musèla wa Yesù Kilistò bwà ditùkù dyà ndekeelu edi. Nwamònu anyi? Kakwènakù mùshindù nànsha wùmwe. . .

<sup>37</sup> Ki bwà cinyi, Mukàjì-musèla, mu Dyambwibwa, neàpàtukè. Nènku ke kùdì bônso bàvwà badyànjila kulongolola kùdì Nzambì abu, baakaja bônso. Kacya ànu ku cibangidilu, Yèyè uvwa mumanyè muntu yônso, mwaba wônso, uvwa mwà kwikala musòmbe awu, nè byônso pa bwalu abu. Byônso mbidyànjila kulongolola. Nzambi úvwa mumanyè nè cívwa mwà kwikala kaaba aka. Nènku—nènku piikalà. . . Yèyè wàkacyènza mùshindù awu, bwà patwàfikà kuntwaku. . . Yèyè mmuyè bwà kutùlongolwela kaaba. Nènku patwàfikà kuntwaku, byônso nebùikalè bilongolola ànu mene mùdì dilòlò edi dilongolola, ànu mùdì dîbà edi dilongolola emu. Èyowà. Didyànjila-kumanya Dyèndè dinène dîdì diMwambila bintu byônso ebi, ku didyànjila-kumanya.

<sup>38</sup> Yèyè ùdì myaba yônso bwalu mMumanyè byônso; mmumanyè byônso bwalu Yèyè ùdì myaba yônso. Ki bwà cinyi, ku didyànjila-kumanya Dyèndè. . . Mpindyewu, Yèyè kèna mwà kwikala ànu mùdì cipeepèlè pa buloba to, bwalu Yèyè ùdì Kampànda. Yèyè kèna ànu bwalu bukwàtakaja to. Yèyè ùdì Kampànda. Útu ùsòmba. Útu ùsòmbela mene mu nzùbu kampànda. Útu ùsòmbela mu mwaba wùdì wùbùikidiibwà nè n'Dyulu. Nènku ki bwà cinyi, ku Dyèndè dyônso-, mwikàle myaba yônso; mwikale mumanyè byônso, bu mùdìYe mumanyè bintu byônso, dîbà adi Yèyè ùdì myaba yônso bwalu Yèyè mmumanyè maalu ónsò.

<sup>39</sup> Wèwè, mpindyewu, udi wenda ukola kuumukila ku dilediibwa dyèbè, pawàkalediibwa nè muleejùibwe mu buloba ebu. Nzambi úvwa mumanyè nè uvwa nè cyà kwikala mu buloba ebu, ki wèwè kukola kuumukila ku dilediibwa nè ku dikùlumpa. Bintu bìvwà bimwèka byà pabwàbì kùdì, mu bunsongààkààjì bwèbè, bunsongààlùmè bwèbè amu, panùcìvwà bânà, mpindyewu bidi bimwèka bilelèlè menemene. Kùvwà mwà kucyùmvwà paùcìvwà mwànà to. Kàdì mpindyewu, bu muwakùlumpi, wabangi kuumvwà nè kujandula nè bintu byônso bìvwa bilongolola ànu bimpè. Nènku, wèwè, ncyà bushùwà nè bìdì nè mushinga kùdì mpindyewu.

<sup>40</sup> Ki mùdìbì kàbìdì mu dilediibwa dyèbè dyà nyumà. Udi wenza bintu byùdì kùyì umvwa to, paùdì mwànà mukesè wa mu

mabòkò, ulwa ku cyoshelu. Udi ufla mwoyi wèbè kùdi Kilistò. Udi wenza bintu byà pabwàbì bu nùnkù. Udi udikonka bwà cinyi udi mubyènze. Kàdi paanyimà pàà katancì, paùdi ukola, bu beena Kilistò bakolè, dîbà adi udi ubyùmvwà. Nwamònu anyi? Kùdi cintu kampànda cidì cibàkula. Udi umòna bwà cinyi bìvwà bìkèngela bwà wèwè kucyènza. Dilediibwa dyèbè dyà mu nyumà! Dilediibwa dyèbè dyà mu mubidi dìdi cimfwànyì cyà dyèbè dyà nyumà.

Mùshindù—mùshindù menè ùvwàci cikukùmbàne, mu mwoyi ewu, paùvwà wenda ukola, bintu byònsò bikùmbàne ànu bîmpè, bwalu uvwa mwenjiibwe bwà cyòci aci. Kacivwakù cintu cyà pabwàci, dilòlò dyùvwà mubwele utètuka mu citanda, mu disangisha dyà mu ntentà, anyi kaèkèleeziyà kakesè aku mwaba kampànda mu ditumba, nè cintu kampànda cyàkayiisha muiyishi awu aci, cyena-bwalu kampànda, kàdi wèwè kudyèla ànu panshi ku cyoshelu? Nwamonu anyi? Nwamonu anyi? Nzambì ùvwà mumanyè aci, kumpàlà kwà difùkà dyà dyulu nè buloba. Nwamònu anyi? Civwa—civwa cimwèka cyà pabwàci kùdi, bwà nè mbwà cinyi wakacyenza musangu awu. Kàdi mpindyewu udi múmvwè; uvwa mumanyè cyàkenzekà. Cìdi citàmba kukukùmbana mu mwoyi ewu, nè necikumbanè kàbìdì mu Mwoyi ùcilwalwà. Buloba ebu nè mwoyi wàbò bùdi bùmwèka bwè—bwènda bùyà kumpàlà paùdi wenda ukola. Cintu cyònsò cìdi cimwèka cyènda bîmpè kùdi.

<sup>41</sup> Mèmè ncyèna ngiitabuuja mu nè. . . nè muntu ùvwà mulwè ànu mwab'ewu ku mpùùkàpùùkà to. Mpindyewu anji elàbi ànu meeji, paùdi ulwa pa—pa buloba, bìvwà bìkèngela bwà cintu cyònsò kwikalaci cidyanjila-kulongolola bwèbè wèwè, anyi cidyanjila-kulongolola's, èyowà, bwèbè wèwè. Ncyèna ngùmvwà nè mmùshindù kaayi utùvwà mwà kwela meeji nè Nzambì uvwa mwà kulongolola bintu byònsò byà bîmpè ebi bwà katùyìku mwà. . . katùyì mwà kuMweyemena. Bwà nè, piikalàYe wàkatubweja mu cimvundù cinène citùdì tusanganyiibwamù mpindyewu eci, nè mutulongolwele bintu bîmpè byà mu mwoyi kaaba aka, ambààyaaku tũng mutwàbèngà kutàmba kuMweyemena bwà kulongolola bintu bìcilwalwà, nwamònu's, bintu byà Cyendèlèlè! Mbyenze ànu bu nè, ndi ngàmba nè, mbyà dikèma be.

<sup>42</sup> Nènku ncyèna—ncyèna ngèèla meeji nè Dyulu mmwaba wùvwà mààmù wanyi nè ciibidilu cyà kungambila awu to. Ndi ngèèla meeji nè Èkèleeziyà ùkaadi mukolè mupite apu. Bwà kwela meeji nè, bìvwà pa ciibidilu nè, kùkaadi bidimu lukàmà, anyi nkàmà yìbìdì, ngèèla meeji nè beena kale bàvwà nè ciibidilu cyà kwela meeji nè bantu bònsò bàvwà bàfwa bàvwà bàbànda mu Dyulu nè bàpeta lunzènzè, nè—nè bàsòmba muulu mwàmwa pa matutu nè—nè bìmba lunzènzè. Mpindyewu, bàvwà bamanyè nè kùvwà mwaba kampànda wùdìbo bàbìikila nè n'Dyulu. Kàdi, bóbò abu, byòbì nànkù, bimbi bònsò bàà mijikì aba's

mbafwànyine kutùtamba, nudi numòna's. Kàdi twètù... Kàdi kí—kí mmwaba wà mùshindù awu to. Kí nkwinba kwà lonzènzè to, nànsha kakesè. Ngèèla meeji ne, ncyènà ngèèla meeji nè Bible ùtu ùlongesha aci nànkú to. Kàdi aci's civwa mmwènenenu uvwabo nendè kumpàlà kwà kaabujimà kàà Dìyi kwikalanganakù, anyi dikangula dyà Bitampì Mwandamutekète, bidìbo batùlayè mu eci cikondo eci, bwà twètù kuumvwa dìbà adi.

Mémè ndi ngiitabuuja nè Dyulu mmwaba wà cyà bushùwà, ànu mùshindù wùmwèwùmwè ùdi ewu mwaba wà cyà bushùwà emu, nwamònu's, bwalu Nzambi wàkabanga neetù mu dikola dyètù dyà nyumà mu mwaba ewu. Nè mémè ndi ngiitabuuja nè Dyulu mmwaba wà cyà bushùwà ànu menemene bu mùdì ewu emu, mutùdì katùyi tusòmba bwà Cyendèlèlè nè tusòmba ànumù pa ditutu kampànda to. Twètù katwèna ànu tufiita minu pa lonzènzè lwètù, bwà byònsò—byònsò kuumukila pànwapa, nè kashidì to. Kàdi tuyàaya mu mwaba mulelèlè mutwikala mwà kwenza bintu, mutwikalà mwà kusòmbela. Netùkakwatè mudimu. Netùkasànkè. Netwikalè nè mwoyi. Netùye ku Mwoyi, ku Mwoyi mulelèlè wà Cyendèlèlè. Tuyàaya mu Dyulu, mpàladiizò kampànda. Ànu mwàkakatà Adàmà nè Evà mudimu amu, nè mwàkadìbo nè mwoyi, nè kudyà, nè kusànkabo, mu budimi bwà Edènà kumpàlà kwà mpèkaatù kubwelayè, tudì mu njila twalukila cyàkàbidì kuntwaku, ncyà bushùwà, twalukila kwòkò aku. Adàmà wa kumpàlà, ku mpèkaatù, wàkatùpatula. Adàmà Mwibìdì, kupicila ku bwakàne, wàkatwàlujamù cyàkàbidì; kutùbingisha nè kutwàlujamù.

<sup>43</sup> Nwènù bàdì bàngata mikàbà yà mēyi aba mpindyewu, mukenji wà “dìbingishiibwa,” ndi muswè nùwàngatè. Nè nutu nwanagata mikàbà yà mēyi, ndi muswè nùpete wòwò awu. Ndi mwakùlepù, mwab'ewu kùkaadi cikondo kampànda.

<sup>44</sup> Tàngilàayi mùdì muledi webè wa pa buloba ewu, kumpàlà kwà wèwè kulwa pànwapa, kumpàlà kwà kumanyabò nè wèwè uvwa ulwa, bàkadìlongolola bwà dilwa dyèbè. Anji elàngànaayi ànu meeji pa bwalu abu mpindyewu, baledi bèènù bàà pa buloba apa. Bwalu, muledi wa pa buloba ùdi ànu cimfwànyì cyà Muledi wa mu dyulu. “Patwikala bamanyè mwà kupèesha bàna bèètù balela mapà mimpè, munyì mùdì Taatù wenù wa mu Dyulu mutàmbe kumanya mwà kufila mapà mimpè kùdì bàna Bèndè.” Yesù's ngwàkaakula Mēyi aa. Nwamònu anyi?

Bàakalongolola dilwa dyèbè. Bàkenza kalàalu kakesè, anyi kupeta tuntu tukesè, túsàbaatà kampànda tukesè, nè tulàmbà tukesè, nè bikwàbò. Bàakalongolola, byònsò bwà wèwè kufika, bilongolola kumpàlà mene kwà wèwè kulwa pa buloba.

<sup>45</sup> Yesù mmuyè bwà kulongolola dilwa dyètù kuntwaku. Mpindyewu mònaayi. “Mu Nzùbu wa Taatù Wanyì mùdì bisòmbelu byàbùngi.” Anyi, twikalàayi... .



Ncyèna nè meeji à kusàkidila ku Díyì to, anyì kuumushilaKù to, bwalu katwèna nè cyà kwenza nàнку to. Bwàkabuulwibwà 22 mmwâmbè nè: “Ewu yônsò wadìdinga kusàkidila díyì kampànda, anyì kuumushilaKù Díyì kampànda.” Kàdi lekèlaayi ngenzè ànu eci, kaciyì bu kutentakaja to, kàdi ànu bwà—bwà kupàtula kanungu kampànda patòòke.

“Mu Nzùbu wa Taatù Wanyi mùdi bisòmbedi byà mishindù yàbúngì.” Ncyèna ngiitabuujà nè patwàfikà mu Dyulu netwikalè, bantu bônso tumwèka ànu bafwànàngàne to. Ncyèna ngiitabuujà nè—nè bônso nebiikalè nè nsuki mikùnze to, anyì mifiikùlùke, anyì—anyì bìpì, anyì—anyì banène, anyì—anyì bônso bale bàà mfyondo to.

Ndi ngiitabuujà nè Nzambi ùdi Nzambi wa mishindù yàbúngì. Buloba bùdi bùjaadika cyòci aci. Yèyè ùdi nè mikùnà minène nè mikùnà mikesè. Ùdi nè mpàta. Ùdi nè bipèèlà. Ùdi nè bintu bishiilèshiiàngàne, bwalu Yèyè mmubyenzè mùshindù ùvwàYè mubiswè. Nè wàkenza mivù; movù wà luuyà, movù wà mashika, movù wà bintu bitòloka, movù wà mabèji àpòòpoka. Mmwenzè mivù. Cidi cileeja nè Yèyè Nzambi wa mishindù yàbúngì. Mmunwenzè nwènu mu mishindù kabùkabù. Bàmwè bantu bàdi menemene bà mabùlùbùlu; nè bângà mbiimanyinyi bàà mèyi menemene; nè bakwàbò balenga; bakwàbò biikàle bàà kalolo. Kàdi nudi ànu nusangana bantu bàà mishindù yônsò mishiilèshiiàngàne, biinè abu mu Bukalenge Bwèndè. Nwamònu anyì?

<sup>46</sup> Tàngilàayi Peetèlò Munsantu, kàdi mupàlakajaayi ne Andèlè. Nwamònu anyì? Andèlè mmulwanganyi wa mvità wa disambila awu, ùvwa ùshààla yèyè ànu ku binù díbà dyônsò. Nè mùpostòlò Peetèlò ùvwa umwe wa ku milonda mijoona mu mudilu uvwa uyiisha, nè—nè bikwàbò. Kàdi Pòlò ùvwa yèyè ùmwèka mutàmbe kulonga kàlaasà bikolè, mutàmbe kwenza bu . . . bu mupròfetà, anyì cintu kampànda, nè ùvwa ùkwàtakù makàsà.

<sup>47</sup> Nènku, nwamònu’s, Mòsà ngwàkafùnda Mikàndà yinaayi yà kumpàlà yà Dipungila Dikùlukulu. Bwalu, yèyè ngwàkafùnda Dipungila Dikùlukulu. Bikwàbò byàdi bivwa mmikenji, nè bakalenge, nè misambu, nè bikwàbò, nè bivwà muntu kampànda mufùnde bwà bapròfetà abi. Kàdi Mòsà wàkafùnda mikenji, Mikàndà yinaayi yà kumpàlà yà Bible: Genèsè, Ekèsòòdè, Lewitiki, nè Dutèlònòmà.

<sup>48</sup> Nè pashiishe Pòlò ngwàkafùnda Dipungila Dipyadipyà. Aci’s ncilelèlè. Maatàayi, Maakò, Luukà nè Yone bàakafùnda byenzedi bivwà byenzèke, nè bikwàbò. Kàdi Pòlò wàkatàpulula mikenji nè ngàsà, nè wàkabitèeka pa kaaba kààbì. Nwamònu anyì? Yèyè nguvwa mufùndi wa Dipungila Dipyadipyà. Yèyè mmutùpe mifùndu yà Dipungila Dipyadipyà, ùtèeka Díyì dyà Nzambi mu bulongame.

Mpindyewu mōnaayi nè, *byàbùngì*, “bisòmbedi byàbùngì,” bisòmbedi byà mishindù yàbùngì.

<sup>49</sup> Bu mùdì, tukùnà twà mishindù yàbùngì; bu mùdì, misùlù yà mishindù yàbùngì, tusùlù, majiba. Bìwà muwab’ewu panùdì balwè kaaba aka, dyàmbedi, bwalu musàngèelu wà Taatù webè wa mu Dyulu mmubitèeke kaaba aka. Bwalu, bàmwè bantu bàtu banangè mikùnà. Bàmwè bantu bàtu banangè màyi. Bàmwè bàtu banangè bipèèlà. Pa nànkù, nudi numòna’s, dilwa dyèbè adi, Yèyè ùwà mumanyè ngiikàdilù webè nè cyùdì mufwànyine kwikala, pa nànkù Yèyè wàkacyènzà ànu mu mùshindù wùdì mufwànyine kucisankila awu. Kaa! Ndi ngèèla meeji nè awu’s n’Taatù mulenga wa dikèma, nwamònu’s, pa kumanya nè Yèyè mmucyènzè mùshindù ewu.

Ndi nè disànka bu mwàkenzàYe mikùnà. Mémè—mémè ntu munange mikùnà. Mémè. . . Nè mémè—mémè ntu munange aci. Pàdibi nè, bakwàbò bôbò: “Kaa, ncyèna mwà kutwàla. . . Kaa, Yèyè ùwà mwà kwikala mutùnkùmwine bìwà mu cinu Cyèndè pambèlu apu.” Èè, Yèyè wàkabitùnkumuna bwà ngaamòna mwà kusànka naabi. Nudi numòna anyi? Ki dìbà adi kwamba nè: “Mémè ntu munange mpàta, mùndì mwà kumòna kule menemene amu.” Èè, ngiikàdilù yìbìdì mishìilàngàne ayi, twètù bònsò bàbìdì beena Kilistò.

Kàdi Taatù ùwà mumanyè nè wèwè uvwa mwà kwikala kaaba aka, nè mukulongòlwèle byònsò kumpàlà kwà wèwè kufika apa. Amen. Dilwa dyèbè dyà kumpàla, kaaba aka, Yèyè ùkaavwa mukulongòlwèleci bwà pawàfika apa. Aci kí ncilenga cyà dikèma bwà kwela meeji ku cyàkenzàYe anyi?

<sup>50</sup> Mpindyewu, mpindyewu, kàdi vùlukàayi nè, aa àdi ànu mapà à citùpà cìpi, mu cimfwànyì. “Mpindyewu, tudi bamanyè nè Mòsà, mu kwibaka kwà tabernacle mu cipèèlà, anyì kumulongolola, wàkamba nè ùwà mwènzè bintu byònsò bilondèshilàngàne nè bulondyanganyi bwà ciwàye mumòne mu Dyulu.” Nwamònu anyi? Pa nànkù, bintu byà pa buloba bìdì ànu byùmvwija cìdì bintu byà Cyèndèlèèlè. Nènku buloba ebù butùdì basòmbèlemù leelù ewu ebù, bùdì bunène mùshindù ewu, mùshindù mwinè ùtùdì babùnangè’s wè; nè banange kusòmbelamù, nè kupuuyakana lupeepèlè, nè kumòna bilòngò nè bikwàbò; piikalà—piikalà aci, piikalà eci nùnkù ngaakwilù, cìdì cìfwa cìdì ànu cyàkula bwà cìdì cyà Cyèndèlèèlè. Paùdì umòna mucì ùdisuba, wènda ùdikòka, ùteeta kwikala nè mwoyi, aci cìdì cyùmvwija nè kùdì mucì mwaba kampànda wùdì kawùyì nè cyà kwenza nànkù to.

Paùdì umòna muntu kaaba aka, ùsumpakana bwà kwikala nè mwoyi, muntu kampànda mu lùpitaadi, anyì mu bulàalù bwà disaamà, anyì mu njiwù kampànda, munkaci mwà kùsumpakana, nè cyonà cyà lufù ciikàle pa muminu wèndè, nè ùdikòka, nè ùdila myadi, nè wèla mbilà mikolè ùlòmba mwoyi,

cìdi cyùmvwija cinyì? Kùdi mwaba, mwaba kampànda, kùdi mubidi ùdi kawùyì ùsumpakana nè wèla mbilà mikolè bwà mwoyi nànsha. Nwamònu anyì? Kawèna ùcèyèna to.

<sup>51</sup> Mpindyewu, mmapà à citùpa cìpì kutùdi, bintu ebi, àleeja ànu nè kùdi Ùmwè kùdi wa Cyendèlèlè Awu ùsanganyiibwa. Ki cìdi Yesù muyè bwà kulongolola ncyòci aci, wà Cyendèlèlè Awu bwètù twètù. Mpindyewu, bìdi ànu byùmvwija nè kùdi citàmbe bunène cyà mùshindù wà mwomùmwè ewu, bwalu mbyà mùshindù wùmwèwùmwè.

<sup>52</sup> Mpindyewu, vùlukàayi nè, Bible mmwâmbè nè: “Ntentà wa pa buloba wa cisòmbedi cyètù ewu, yèyè mwà kubùtuka, musùnsùlùdiibwe, tukàadi nè mukwàbò mwindile.”

Ànu mùdi mwànà mukesè wa mu dibòkò awu, tusunya twèndè tukesè atu, munda mwà maamù amu, tùdi tùdinyonda nè tükùdimuka. Nènku, kàdi ànu . . . Nwamònu anyì? Nènku nudi numòna nè, udi mwà kwangata mukàjì kampànda, nànsha yèyè mwikale wa cikisu wa bìshi; kàdi pàdiye ùlwa maamù, katancì kakesè kumpàlà kwà mwànà wa mu dibòkò awu kulediibwayè, kùdi musàngelù kùdi mukàjì awu. Seemènà pabwìpì nendè, kùdi misangu yònsò cintu kampànda, mmutàmbe kwikala nè dinanga. Bwà cinyì? Kùdi nyumà mukesè wa mwanjèlò mwindile bwà kwakidila mubidi wà mu bufùki awu. Pàdiwu ànu nè wàledìbù, mweyelu wà mwoyi wùdi wùbwelamù. Nènku Nzambi ùdi ùwùpwìdijamù, nè ùdi ùlwa musùkà wùdi nè mwoyi. Mpindyewu, ànu pàdi mwànà ewu munkaci mwà kulediibwa apu, díbà adi mubidi wà nyumà wùdikù bwà kumwakidila.

Nènku mpindyewu, pàdi mubidi ewu wùmata kaaba aka, mu buloba ebu, ànu mùdi mwànà awu mumatè, kùdi kàbìdi mubidi wà kawùyì ùfwa mwindile bwà kwakidila cyàkàbìdi nyumà kumwaluja munda mwèndè. Kaa, cintu cinène kaayìpu's wè! Tudi—tudi mpindyewu mu Kilistò Yesù, (amen), bânà bàà mu mabòkò, bânà bàà mu mabòkò mu Kilistò, bânà bàà Nzambi, bindile disùngidiibwa mu kaabujimà, ku Dilwa dya Mukalenge wetù Yesù, kùdi . . . bwà kutwàkidila kùdiYe, díbà diikalà mubidi, wà cifwàkà ewu, newùlwatè dibènga kufwà.

<sup>53</sup> Difwàngana, bintu byònsò byàkenzàYe abi, bìdi bìleeja bintu bicilwalwà. Ànu mùdi mubidi wùkupèesha kaaba aka, ànu mùdi mubidi ewu, ùdiYe mukupèeshe bwà wèwè kusòmbelamù amu, ùdi ùleeja ànu nè kùdi ùmwè ùdi mutàmbe bunène, ùcìdi ne cyà kulwa. Nwamònu anyì? “Twètù balwàte, anyì bambùle cimfwànyì cyà wà pa buloba, netwàmbulè kàbìdi cimfwànyì cyà wà mu Dyulu,” ùdi kawùyì ùlama mìbì mu ewu ùdi nè cyà kulwa awu to. Mpindyewu, ewu ùdi ùlama bubì, dìsaamà, lufù, kanyinganyinga. Ndi mufùme ku dyamba patòoke mwab'ewu, kí nkwanji kunenga to, pàmvwà nyiisha pa *Dishintuluka Dyà Ku*

*Dìyì Dyà Nzambì*, bwà mùshindù ùdi—ùdi mubidi ewu's, ùdi nè bubì munda mwàwù.

<sup>54</sup> Nè dishidimuka dyònsò dyà cyena-leelù ditùdimu nè mwoyi edi ndyà dyabùlù. Kanwèna nwitabuuja aci anyi? Bible ùdi wamba nè ki mùdibi; buloba ebu, bukalenge bwònsò. Katwèna baswè kwitabuuja aci to. Kàdi Bible ùdi ùcyàmba bitòòke tòò, nè bukalenge bwònsò, bukalenge nè bukalenge bwònsò bwà pa buloba, udi naabu ndyabùlù nè mbukòòkesha kùdi dyabùlù. Yesù wàkangaciibwa kùdi Sàtaanà, muulu, nè kuMuleejayè makalenge ònsò à pa buloba àvwàku awu, àvwa mwà kwikalakù, nè bikwàbò kàbìdì. Kàdi Sàtaanà wàkabyàmba nè, mbyèndè, nè Yesù kààkakòkanganakù nendè to, bwalu yèyè ùdi nzambì wa buloba ebu. Nwamònu anyi? Ki yèyè nè: “Nènkupèèshèbi bu Wèwè mwà kupòna panshì nè kunkuukwila.” Nwamònu anyi? Úvwa ùteeta bwà kubipèèsha Yesù, kakùyì didikengesha to. Nwamònu anyi? Civwa ndipwekesha dyà mushinga divwàye nè cyà kuMwenzela.

Kàdi bàà pa buloba bàvwa benzè mpèkaatù. Pa nàнку, cibawu cyà mpèkaatù civwa ndufù, nè byàkakèngela bwà Yèyè kufwà. Ki bwà cinyì Nzambì wàkamwèneshiibwa mu mubidi, bwà Wàmòna mwà kuMwimikila lufù, bwà kufuta cibawu aci. Kawèna cintu nànsha címwè cyà kufuta nànsha. Kacyèna cilaminyina to. Kakùyì mpatà to, ncifuciibwe cyanààna. Dibànzà dyònsò ndimana kufuta. Cikaadi Cyèndè mpindyewu. Nè tudi baaminyàmpalà bàà Bukalenge Bwèndè, badìsangìshe kaaba aka dilòòlò edi, mu Dìna dyà Yesù Kìlistò Mfùmù wetù, basòmbe mu myaba yà mu Dyulu.

<sup>55</sup> Mpindyewu, mu buloba butùdi basòmbelemù ebu, dilonga dyà kàlaasà edi, ndi muswè kunùjaadikila nè, dilonga dyà túlaasà, maalu à mamanya, dishidimuka, nè bintu byònsò bitùdi tumwèka bù bàdi bàbisànkidila bikolè leelù ewu ebi, mbyà Sàtaanà, nè nèbìbutukè. Wèwè udi wamba nè: “Mwanèètù Branham, dishidimuka?” Èyowà's, mukalenge. Edi dishidimuka ndilwìlè kùdi Sàtaanà. Genèsè 4 ùdi ùcìjaadika. Mwànà wa Kaayinà, nwamònu's, wàkabanga dishidimuka edi, dyasa dyà bimenga, nè bisanji byà orgues, nè bikwàbò. Nè dishidimuka dyàkalwila ku dimanya. Dimanya ki ditù dyabùlù musùmbishe Èvà, mu budimi bwà Edènà, dyàkamufikisha ku ditebuka, kushipa dīyì ditùma dyà Nzambì.

Pa nàнку nekwikale dishidimuka kampànda mu buloba butùdi tuya amu, kàdi kadyàkwikala dishidimuka dyà mùshindù ewu to, bwalu mu edi dishidimuka tudi nè mabèèdi, tunyinganyinga, dyalakana, lufù, bintu byònsò mu edi dishidimuka, mbìbì. Kàdi mu dishidimuka adi kamwàkwikala nànsha címwè cyà ku bintu ebi to. Kabyàkutùkèngela maalu à mamanya to.

Maalu a mamanya ndinyangakaja dyà cyà ku cibangidilu,

nànsha bìshi. Nwamònu anyi? Wèwè udi upanda kasùnsukilà, bwà kukòsolola tupwishipwishi nè kwenza *cikampànda*, bwà kukutaayisha. Udi wangata kapyà kàà mu cingoma, utùdisha *cikampàndà*, bwà kushipa cintu kampànda. Udi wangata kàshinyi. Nè upàtula kàsòloonyi mu buloba, nè byamù byà kukènza naabi mwinshi mwà buloba, bwà kukòsolola tujilu, bwà byàmòna mwà kutaayika. Nè upweka nè njila mu lùbilu lwà kilòmèètà lukàmà nè makùmi ànaayi nè yinaayi ku dîbà òmùwè, kàdi ushebeya muntu kampànda. Nwamònu anyi? Kaa, nè mutù munyùngùlùke bikolè, mu didikàma, mu dilwijakaja; bikèngela túsakè, twàngatè. Kaa! Nwamònu anyi? Byònsò abi mbyà dyabùlù.

Bukalenge bwà Nzambi kabwàkwikala nè màshinyi, ndèkè, anyi abi byenzedi byà bulòbò byà mu maalu à mamanya to. To. Kabwàkwikala nè dilonga dyà kàlaasà to, nànsha kakesè. Necìikalè dimanya ditàmbidìle edi nùnkù, mu mùshindù wà nè edi kabààkudivùlukakù to. Nwamònu anyi? Dilonga dyà kàlaasà, dishidimuka, nè byònsò ebi, bìdi bifùmina kùdi Sàtaanà.

Mpindyewu, wèwè udi wamba nè: “Mwanèètù Branham, dîbà adi, cyùdi ubadila ncinyi?”

<sup>56</sup> Nwamònu’s, ànu bu mùdi nè, bwà cinyi ndi mvwàla bilàmbà mpindyewu? Mu dishidimuka òmùwè nè cyà kulwa adi, òmùwè dyàmbedi adi, kabàwva dijinga nè bilàmbà to. Bàwva babwikila. Kabàwva nè kabingila kàà kuvwàdila bilàmbà to, bwalu kabàwva bamanyè nè bàwva butakà to. Mpindyewu nwènù. . . Mpindyewu nudi nujandula nè, patùdi twakulangana apa, dîbà adi, tudi tumanya nè tudi—tudi—tudi—tudi butakà, mpèkaatù mmusòmbèle mwab’ewu, kí bwà cinyi tudi nè cyà kulwàta bilàmbà. Kàdi kabìwva nànkù ku cibangidilu to; kakùwva mpèkaatù nànsha umwe to. Nwamònu anyi?

<sup>57</sup> Mpindyewu, cintu cìmwècìmwè aci cidi mu njila wa dishidimuka, ànu menemene. Tudi tubala, tudi tufùnda, tudi twenza cikampàndà, kàdi kanùjalamanganyikù nè aci to. Kanwènjikù aci nzambi wenù to, bwalu aci’s n’nzambi wa communisme. Nwamònu anyi? Kí ncyà kùdi Yesù Kilistò to.

<sup>58</sup> Yesù Kilistò nku diitabuuja; kí nku cyùdi mwà kujaadika bilondèshile maalu à mamanya to, kàdi cyùdi witabuuja aci. Ncyèna mwà kunùjaadikila ku maalu à mamanya, dilòlò edi, mu nzùbu emu, nè kùdi Nzambi kampànda to, kàdi nànsha nànkù ndi mumanyè nè Yèyè ùdi kaaba aka. Kàdi, ku diitabuuja dyànyì, didì dìcìshindika.

Abraham kàwva mwà kunùjaadikila ku maalu à mamanya nè yèyè ùwva mwà kulela mwànà nè mukàji awu to, nè yèyè mukàji mwinè awu nè bidimu bìpacila ku lukàmà. Kàdi diitabuuja dyèndè dyàkacishindika. Nwamònu anyi? Kàwva dijinga nè dishindika nànsha òmùwè dyà maalu à mamanya

to. Mòna's, kùdì...Mòna's, ngàngàbukà ùwà mufwànyine kwamba nè: "Mukùlumpè ewu mmupàle, mwab'ewu wènda wàmba nè neàpete mwànà wa—wa mu dibòkò kùdì mukàjì wàwa; yèyè nè bidimu lukàmà, nè mukàjì nè makùmì citèemà." Kàdi, nudi numòna's, Nzambì ngudi mwàmbè nàнку, pa nàнку kabyèna bikèngela maalu à mamanya to. Bidi bikèngela diitabuuja, bwà kwitabuuja Dìyì dyà Nzambì, kî mmaalu à mamanya to.

<sup>59</sup> Pa nàнку, bilongelu byètù nè bikwàbò byònsò nditaayishiibwa. Bu mùdì, Nzambì kacya kàtu mwàmbè nè: "Ndaàyi nùkaasè bilongelu," anyi nànsa nè: "enzaàyi bilongelu byà Bible" to. Nudi bamanyè aci anyi? [Disangisha didi dyàmba nè: "Amen."—Muf.] Yèyè mmwàmbè nè: "Yishàayi Dìyì." Aci's ke cyà bushùwà menemene. Ndongolwelu yètù yà bulongeshanganyi nyidi yitùmùshà yitùtùma kule nè Nzambì kutàmba ní ncinyi cyònsò cìndiku mumanyè, ncyà bushùwà, kule menemene nè Nzambì. Kî nkwiwàka tùlaasà, mpitàadi, nè bikwàbò to; aci cìwva mbwà bàà pa buloba nè bwà kasumbù aku. Kàdi, mèmè ncyèna naabi cilumbù to; bidi bikwàta wàbi mudimu, kàdi aci kacyaèna ànu cyòci aci to.

Tudi twiwàka lùpitàadi, lulènga lwà njàajàmà, nè tukwàta mudimu nè manga matàmbe bwìmpè atùdì naawù, kàdi bantu bàfwàfwamù ku binunu ku ditùkù nè ku ditùkù. Kàdi, kaa, ekèlekèle, mu Bukalenge bwà Nzambì, kamwèna lufù to, kamwèna tunyinganyinga to. Amen. Kamwèna mùkèngela bintu byà pa buloba ebi to. Kàdi tudi buumùke ku cintu eci, babwelè mu byà cyà bushùwà byà Nzambì; pàdì apa tudisuba bikolè menemene bwà kutèeta bwà kupeta, ku maalu à mamanya. Kàdi patùdì tutàmba kutwela mu maalu à mamanya, tudi tutàmba kuditwàdila lufù pambidi pèètù. Tudi tulwangana mvità yà bamana kucìmunyibwa mwaba awu, pa nàнку uumùkaku. Nè ku diitabuuja, itàbùùjà Yesù Kìlistò Mwànà wa Nzambì, dilòòlò edi, nè Mwitaba. Yèyè ki Yèyè Awu.

<sup>60</sup> Maalu à mamanya àdi àkulongolwela cinyi? Lufù lutàmbidile. Ncyà bushùwà. Tuzùbu tùdì twènda tùbùuka muulu, nè bintu bikwàbò byònsò ebi, bwà kutangalaja lufù nè bikwàbò byònsò pa buloba bujimà. Kanùbitàngidi to. Bàndishàayi mutù muulu menemene kupita apu, batàngile mu Dyulu. Tàngilàayi kùdì Yesù musòmbe nè: "Ku dyàbalùme dyà Nzambì," dilòòlò edi, "mwikàle nè mwoyi kashidi bwà kutwàkwila pa ditonda dyètù," dyà citùdì twitabuuja, nè Dìyì Dyèndè m'Bulelèlà.

<sup>61</sup> Mpindyewu, tudi tusangana nè, mwoyi ewu mmulame bintu bibì byà mishindù yònsò, nàнку ki bwà cinyi mwoyi wùdì nè cyà kulwa kawàkwikala naabi to. Ewu wòwò ùdì nè dyàlakana, nè disaamà, nè lufù. Bwalu, ùdì cinyi? Kî nnzùbu udiYè muyè bwà kulongolola to. Ewu nnzùbu wa beena cikupi. Mbanganyi bàdi bamanyè cidì nzùbu wa beena cikupi? [Disangisha didi

dyàmba nè: “Amen.”—Muf.] Èyo. Èè, kî mûdi musòmbèle. Nzùbu wa beena cikupi mmwaba ùvwàbo bàtèeka bantu bònsò bàvwà bàsaama. Èè, s’ki cyòci aci cidi mpèkaatù mutwènzèle, mmutùtèèke mu nzùbu wa beena cikupi wa pa buloba. Wèwè uvwa . . . Kabàvwà bàlekele muntu nànsha umwe ewu ùbwela mu nzùbu wa beena cikupi to, bwalu kùdi twìshì twà mishindù yònsò tùbùuka eku nè eku muntwamu, nè—nè bantu nebàkwàcike twìshì etù nè—nè nebìikalè bàsaama, bòbò biinè. Nè mpèkaatù mmutùbweje mu nzùbu wa cikupi wa dyabùlù.

<sup>62</sup> Kaa, kàdi mukwàbò yèyè ùdi ùbìikidiibwa nè: “Nzùbu wa Taatù Wanyì.” “Nènye kanùlongolwelakù kaaba. Kukupatula mu nzùbu wa beena cikupi ewu nè kukusungila kukubweja mu Nzùbu wa Taatù Wanyì.” Amen. Ki bwalu mbwòbù abu’s; kukupàtula mu nzùbu wa kale wa beena cikupi ewu. Yèyè mmuyè kalongolola mwaba, mwaba mupwàngàne ùdi bubì kabùyì bùsanganyiibwa, disaamà kadyènamù to, bukùlàkàjì kabwènamù to, lufù kalwènamù to.

Mmwaba mupwàngàne ùdi ùkùbìikila ku bupwàngàne abu, nè bikèngela wèwè kwikala mupwàngàne bwà wèwè kufikakù. Bible ngudi mwàmbe nànkù. Yesù mmwàmbe nè: “Ki bwà cinyi ikàlaayi bapwàngàne, ànu mùdi Taatù wenù mu Dyulu mupwàngàne amu.” M’Bukalenge bupwàngàne, pa nànkù cidi nè cyà kwikala cisàmbà cipwàngàne cyàlwà. Bwalu, bìdi bikèngela bwà wèwè kwimana nè kusèdiibwa kùdi Mwàna wa Nzambi mupwàngàne, nè wèwè udi nè cyà kwikala Mukàjì-musèla mupwàngàne. Pa nànkù mmunyi mùdiku mwà kucyènzela mu cingà cintu cidi kaciyi Díyi dipwàngàne dyà Nzambi, didi diikàle: “Màyi à ditàpulula, àdi àtùsukula ku mpèkaatù yètù”? Amen. Ncyà bushùwà. Mashi à Yesù Kilstò, elàayiKù meeji’s, Díyi dìmata Mashi, diikale dizòlòloka. Amen. Mashi, Díyi dyà—dyà Nzambi didi dìmata Mashi, bwà kusukulamù Mukàjì-musèla. Amen. Èyowa’s, mukalenge. Yèyè mmwimàne mupwàngàne, virgò, wa kàyì musopakaja ewu. Kacya kàtukù mwanjì kwenza mpèkaatù to, twamb’eku twamb’eku. Amen. Wàkakwàciibwamù mu butèyi. Nwamònu anyi?

Ki Nzùbu wa Taatù udiYè muyè kalongolola.

<sup>63</sup> Ewu yèyè wàkalwila ku disangila dyà mulùme nè mukàjì, nè muumùkile ku cibùlà, nè ùdi nè cyà kudishinda nè cibùlà. Nànsha bu wèwè mwà kulamakaja cintàkanyì cyà kale aci bilenga byà bishi, cyòci necidishinde, nànsha byà munyi. Bwàci mmbutùke, bwalu cikaadi cyà kabùtù, bwalu Nzambi ngudi mwàmbe nànkù. Kwàci nkumanè kujika. Nzambi neàcibùtùlè. Yèyè ngudi mwàmbe nànkù. Nèkwikalè divwija dyà cintu cyònsò aci cipyacipyà mu kaabujimà. Nudi nwi tabuuja nànkù anyi? [Disangisha didi dyàmba nè: “Amen.”—Muf.]

Ku cibangidilu, pàvwà buloba bupetà dileidiibwa dyàbù, pààkakòkà Nzambi màyi, dyàmbedi, kuwùmusha pa buloba,

bu mwàkapàtulàye mâyi munda mwà maamù, kùvwa buloba kampàndà bulediiibwe. Èyowà. Ki bantu kubangabò kusòmbelapù pààkabàtèkàbopù kùdì Nzambi. Ki pashiishe kubangabò kwenza mpèkaatù. Nè bwàkabàtìijiiibwa, mu kwinyijiiibwa kwà mu mâyi, mu matùkù à Noà. Pashiishe bwàkajidiibwa ku Mashi à Mufùki àkabùmacilà.

Nènkù mpindyewu mùshindù awu ki wùdì ulwa, mu dibingishiibwa, bwà kwitabuuja Nzambi. Wàkabàtìijiiibwa bwà kunyingalala, anyi, bwà, bwà dilekelediibwa dyà mpèkaatù yèbè. Wèwè wàkatonda mpèkaatù yèbè kumpàlà kwà Nzambi, nè Yèyè wàkakufwila luse bwà bwalu abu. Nè wàkabàtìijiiibwa, bwà kuleeja nè wèwè uvwa, uvwa mufwidiibwe luse; mwikàle ujikula kùdì bantu, nè uleeja bàà pa buloba nè, udi witabuuja nè Yesù Kilistò wàkakufwila. Nènkù wèwè. . . Yèyè wàkangata kaaba kèèbè, nè mpindyewu wèwè udi mwimàne pa kaaba Kèndè. Yèyè wàkalwa wèwè, bwà wèwè wamòna mwà kulwa Yèyè.

Dìbà adi bukolè busantwishi bwà Nzambi mbusukùle biibidilu byònsò abi mu nsòmbelu webè. Kale wàwa uvwa nè ciibidilu cyà kunwà mfwankà, kunwà maalà, kwenza bintu bìvwà kabìyi bìmpè nànsha, ushima, bintu byònsò. Pashiishe bukolè busantwishi bwà Mashi à Yesù Kilistò bùdì bùlwa mu mwoyi wèbè nè bùumusha bintu byònsò abi kùdì. Byòbì bikwenzèkèle bwà wambè cintu kampànda cyà mashimi, nè lùkàsà lwònsò ambà nè: “Anji indilà kakesè. Mfwilèku luse. Ncìvwa nè meeji à kucyàmba mùshindù awu to.” Nwamònu anyi? Dyabùlù ùvwa nè butèyi bwela mwaba awu. Kàdi udi nè ngàsà wa kwalukila, pawikalà mwena Kilistò mulelèlà, wamba nè: “Mvwa mupiiile.” Èyowà. Nènkù, ki bwà cinyi, mpindyewu, kùdì. . .

<sup>64</sup> Mpindyewu, cintu cìdì cìlondà cyùdì upeta, cìvwa ndibàtiiza dyà Nyumà Mwìmpè nè Kapyà.

Mpindyewu, Nzambi, pààjika Bukalenge bwà bidimu cinunu ebu, Nzambi neàpeeshè buloba dibàtiiza dyà kapyà. Necitaayishè cintu cyònsò mu kaabujimà. “Maulu nè buloba nebikwate kapyà.” Peetèlò ngwákamba nànkù. Nènkù cintu aci necipètè dibàtiiza dyà kapyà, divwijulula dyà cintu cyònsò cipyacìpyà mu kaabujimà. Nè pashiishe nekwikalè maulu mapyamàpyà nè buloba bupyabùpyà. Aci aci's, ke dìbà, nè mwaba ùdì bwakàne bùsòmbela.

Awu ke mwaba utùdì. Tudi buumùke ku bifùkiiibwà byà cifwàkà, ku bifùkiiibwà byà cikondo, bayè ku bifùkiiibwà byà Cyendèlèlè. Pàdì Díyì dyà Nzambi dìteemesha misùùkà yètù, nènkù tudi tulwa bàna bàà balùmè nè bàà bakàji bàà Nzambi, nè byambiibwà, mùtòlokù wà Nzambi munda mwètù, bwà kwikala bàna bàà balùme nè bàà bakàji bàà Taatù, Nzambi wa mu Dyulu, twela mbilà nè: “Abba, Taatù! Nzambi wanyì, Nzambi wanyì, mu Nzùbu wa Taatù wanyì.”



<sup>65</sup> Mpindyewu, buloba bwà kale ebu bùdi nè cyà kudishinda, bwalu bùvwa bufùmína ku disangila dyà mulùme nè mukàji. Nènku bùvwa bulwila ku cishikù, ku cibangidilu. Nè tudi balediibwe pànwapa ku disangila dyà mulùme nè mukàji, ku cibulà, nè cidi nè cyà kwalukila ànu mùshindù wùm wèwùm wè awu, ku cibulà. Kàdi ùdiYe munkaci mwà kukulongolwela mpindyewu ewu, kawèna mwà kudishinda to, bwalu Yèyè ùdi ùwènza nànkù. “Ndi muyè. . .”

Ambàayibi tǔng bu nè bìvwa bikèngela ànu bwà twètù kushàala mu mubidi wà mùshindù ewu? Kanwènaayikù nè disànka mùdiku cintu bu lufù anyi? [Disangisha didi dyamba nè: “Amen.”—Muf.] Mpindyewu aci kí mbwalu bwà dikèma anyi? Kàdi mpindyewu, twàmbèbi, cileejilu. . .

Kùkaadi ndambù wa bidimu, mwà mwànà mukèsè, kàdi mpindyewu nkàadi muntu mushindàme. Ndi nè mulundà musòmbe mwaba awu mene, Mukalenge Dauch, nè yèyè wākumbaji bidimu makumi citèèmà nè bisàtù, kùkaadi ndambù wa matùkù. Mutàngilààyaaku mpindyewu. Bidimu makumi ànaayi anyi makumi ànaayi nè bitaanu bikwàbò, s’ki mǔndi mufwànyine kwikala. Mpindyewu mutentèkèlaayi bikwàbò bidimu makumi ànaayi pamutù apu. Nkwepi kunwikalè bafwànyine kuya? Cintu cimwèpelè. . .

<sup>66</sup> Ndi nè disànka dyà nè kùdi cintu kampànda cyàtùpàtulà mu nzùbu wa beena cikupi ewu. Kùdi ciibi cyunzulula, nè cidi cibìikidiibwa nè n’lufù. Yesù mmwimàne mu ciibi aci. Amen. Yèyè neàndombòlè dyàm wàmwa dyà musulù. Yèyè neàm pìcishilè mu ciibi aci. Kùdi ciibi cinène ciimàne dyàm wàmwa, cibìikidiibwa nè n’lufù. Nè musangu wònsò wùdi mwoyi wèbè wùtuuta, udi utamba kusemena pabwipi naaci ku dituuta dimwè dyà mwoyi. Nènku dǔngà ditùkù nèngùikalè nè cyà kulwa ku ciibi aci. Udi nè cyà kulwa kuntwaku. Kàdi pàngààfikà kuntwaku, ncyèna muswè kwikala muntu mutulùmùke to. Ncyèna muswè kwela mbilà mikolè kàdi kwalukila to. Ndi muswè kulwa ku ciibi aci, kudǔjǔngila mèmè mwine mu mìzàbì yà bwakànè Bwèndè (kí mbwànyì mèmè to), Bwèndè Yèyè.

Ku cyòci eci ndi mumanyè, nè: “Ndi muMumanyè mu bukolè bwà dibìikà Dyèndè dyà ku lufù.” Bwà nè, pààbìikilàYe, nèmpàtukè munkaci mwà bafwè, bwà kwikala Nèndè, kupàtuka mu nzùbu wa beena cikupi ewu. Mwaba kanà wònsò wikalà mubidi ewu mwà kumacila awu, nè mwaba kanà wònsò ùvwàwù mufwànyine kutùlukila awu, nànsha cyòci ciikàle cinyi, nèmpàtukè dǔngà ditùkù, bwalu Yèyè mmuCìndayè. Nènku tudi tucitabuuja. Èyowà’s, mukalenge. Yèyè ùdi wènza Ewu ùdi kawùyi mwà kudishindakù to.

<sup>67</sup> Mònaayi mùdi maamù udi mwimite, pa buloba leelù ewu, mùdi mubidi wà maamù mwikalè wùjinga bintu kampànda. Ndi munkaci mwà kwakula, ndi ngèla meeji nè ntèkemena, nè

bakùlumpè bônso nebùúmve. Maamù awu, mu dilediibwa dyà mwànà wa mu dibòkò awu, kwòkò kupangike cintu kampànda mu mubidi wèndè, ùdi ùtwàdija kujinga cintu kampànda. Tàngilàayi mùdi papa . . .

Ndi mvùluka nè tuvwa bakolèshiiibwe, dîkù dyà bapèlè bàà dikèma, nè—nè katùvwakù nè kantu kiine kàà nsongu kàà kudyà patùvwà bàna apu to. Bààbúngì bàà kunùdi bààkakènga cintu cimwècimwè aci.

Pa nàнку mùshindù mwinè wùdibi, nè, kumpàlà kwà mwànà awu kulediibwayè, mààmù ùvwa mwà kuumvwa cintu kampànda cimusaamina mwoyi. Nènku papa ùvwa mwà kudítwa keelè, nè mwèndè mwónso, bwà kumupetelaci. Nwamònu anyi? N'yéyè, mubidi awu, mubidi wèndè, kàlisiyumù nè bikwàbò byà mubidi wèndè, nè vitamines yidiye ùkèngela. Junie ùdi munkaci mwà kufwimbiibwa, nwamònu's, nè ùdi ùjinga bintu, byàkudyà bwà mwànà ulwàlwa awu. Nè mùshindù mwinè ùdibi nè, baledi abu, bàdi bàteeta bwà kubipeta bwà mwànà awu wàlediibwa mupwàngàne nè disànka nè mwèndè mwónso. Nwamònu mwènzàbo kùdi baledi bèènu anyi? Pàdiku cintu kampànda cikèngediibwa, maamù ùdi ùcijaadika, nwamònu's, ndongolwelu wèndè mmwakaja nàнку. Nudi bùmvwe anyi? [Disangisha dìdi dyàmba nè: "Amen."—Muf.] Ciinè aci, twambè bishì pàdiku cintu kampànda cikèngediibwa mwab'ewu, kùdi mwànà udi nè cyà kulwa awu, ma—maamù ùtwàdija kucijinga.

<sup>68</sup> Mpindyewu, anjì indilà kakesè. Bwà cinyi tudi nè matàbuluja? Tudi tudisangisha pàmwe bwà cinyi? Ndi misangu yònsò ànu munkaci mwà kutàndisha bantu bwà cinyi? Cìndi nnwèlela mbilà cinyi nwènù bakàjì bàà cyena Mpenta aba nè: "Lekèlaayi kulaaba kwà tupenta, bilaabu byà kwisù, nè kubebula kwà nsuki yènù, nè bintu byà mùshindù awu?" Ndi ngàmba nàнку bwà cinyi? Bwalu, mùshindù wa cyena kale wà mpenta awu kawùvwa wà kwenza nàнку to. Mùshindù mulelèlè wa Bible kí ngwà kwenza nàнку to. Nwènù nudi nuvwàla tùpùtulù nè bilàmbà byà bantu balùme, nutukù bamanyè nè Bible ùdi wàmba nè aci ncinyangu bwà Nzambi anyi? [Disangisha dìdi dyàmba nè: "Amen."—Muf.] Kàdi's tudi tucyànyisha. Nyumà Mwìmpè ùdi ùshààla ànu wèla mbilà bwà cinyi? Mmumanyè nè nkupangike cintu kampànda mwaba awu. Tudi nè cyà kwikala mu cipidì mu kaabujimà cyà Yesù Kilstò. Tudi nè cyà kwikala bàna bàà balùme nè bàà bakàjì bàà Nzambi. Tudi nè cyà kwenza maalu bu bàna bàà Nzambi.

<sup>69</sup> Kùkaadi ntàntà mule, bààkalonda kaabwalu kakesè kampànda. Mvwa mumòne mwanèètù kampànda wa bafìke musòmbe lwà paanyimà pààpa. Mu Sud, bàvwa nè ciibidilu cyà kupàànyisha bapika. Nènku ewu, cikondo cìvwàbo nè bapika kwìnshì kwàka, cikondo cìvwàku bupika, kumpàlà kwà budishikaminyi, kwà kwambiibwabu patòòke. Nènku bàbwa

mwà kuya nè kubàsumba, bantu abu's, ànu mùvwàbo mwà kusumba kà—kàshinyi kàà kale amu, kùdi ngèndàmùshingà. Bàvwa nè ticket wa mushinga, kàdi bàsùmbisha bantu bèètù abu byènzè ànu bu bàvwa—bàvwa tùshinyi twà kale. Uvwa upeta ticket wa mushinga ùdi mufutè bwàbò.

<sup>70</sup> Cikondo kampànda musùmbi kulwayè mwab'awu, mwendedyanganyi wa mushinga. Nènku ùvwa nè cyà ku... Ùvwa nè cyà kunyùnguluka mu madimi manène amu wèndà ùsùmba bapika. Ki kufikayè mu budimi bunène kampànda mùvwàbu nè bapika bààbùngì, nè kujingayè bwà kumòna bùngì bùvwàbu naabò. Nènku bààkabàpàtula bònsò pambèlù apu, munkaci mwà kwenza mudimu. Kàdi bàvwa—bàvwa babungàme. Bàvwa kule nè kwàbò. Bàvwa bàà mu Àfriké.

Bàvwa balwe naabò kùneeku. Ba Boers bàvwa babàtwàlè nè babàsùmbishe bu bapika, nènku ki bwà cinyi bàvwa babungàme. Bamanya nè kabàvwa bafwànyineku kwalukila kàbìdi ku mààbò to. Bàvwa bafwànyine kusòmba nè kufwila mu buloba abu. Nènku bàvwa, misangu yàbùngì, bàvwa mwà kulwa nè mfimbù è kubànyàkulayi. Bòbò bàvwa cintu cyà cyà mwenabù, nè yèyè ùvwa wènza naabò mùvwàye mumòne amu. Nènku bàvwa ànu... Bu yèyè mwà kumushebeya, ùvwa ùmushebeya. Nènku bu yèyè, cyònsò cìvwàku aci, yèyè ùvwa ànu ùcyènza's. Aci's ke bupika, ànu mùvwà Izàlèlèlè amu, nè—nè matùngà àbùngì àvwa mabwejiùbwe mu bupika. Ne bìvwa bìkèngela bwà kwangatabò bapika bakwàte nè byà luse abu. Bàvwa ànu bàkwàta mudimu. Bàvwa bàdila myadi, nudi bamanyè's, dìbà dyònsò, nè babungàme.

<sup>71</sup> Kàdi bààkamòna nè umwe wa ku bapika abu, nsongààlùmè wa citende awu, ùvwa nè cyàdì citàdika, mutù mwela muulu mùshindù *ewu*. Yèyè kabivwa bìkèngela bàmwelè mfimbù nànsha. Kabivwa bìkèngela bàmwambilè cyà kwenzayè nànsha. Ki mwendedyanganyi wa mushinga awu kwambayè nè: “Ndi muswè kusùmba mupika *wàwa*.”

Yèyè nè: “Kí ngwa disùmbisha to.”

Yèyè nè: “Ndi muswè kumusùmba.”

Yèyè nè: “To. Yèyè kí ngwa disùmbisha to.”

Yèyè nè: “Yèyè ki mfùmù wa bakwàbò bònsò abu anyi?”

Yèyè nè: “To.” Yèyè nè: “Yèyè kí m'fùmù to. Mmupika.”

Yèyè nè: “Èè, pàmwàpa wèwè udi umudiisha bishiilàngàne nè mùdi udiisha bakwàbò abu.”

Yèyè nè: “To. Bònsò bàdi bàdila pambèlù mu cikukù amu, bònsò pàmwè.”

Yèyè nè: “Ncinyi cìdi cyènza nè nsongààlùmè awu ikalè mushiilàngàne bikolè nè bakwàbò bònsò abu?”

Kwambayè nè: “Cintu cìmwèpelè ncyôci eci. Mwua ndikonka munda mwà mukùngùlù mule, mèmè pàanyi. Kàdi nsongàalùme awu, mmwenyi wa ku Àfrikè, kàdi mu Àfrikè amu tatwëndè yêyè ki mfùmù wa cisàmbà. Kàdi, nànsha nànkù, pèndè mwenyi nè mwikale kule nè kwàbò. Ùdi udìtwàla bu mwànà wa mfùmù. Yêyè mmumanye nè, mu ditunga adi, nè tatwëndè ùdi mfùmù wa cisàmbà. Nènku mpindyewu ùdi ùdìtwàla nànkù, bwalu mmumanyè nè yêyè mmwànà wa mfùmù.”

<sup>72</sup> Kaa, mwanèètù wa balùme, mwanèètù wa bakàji, wèwè nè mèmè, pa buloba butùdi nè mwoyi ebu, tùdìtwàlaayi bu bânà bàà balùme nè bàà bakàji bàà Nzambi. Tudi beenyi pànwapa, kàdi bìdi bìkèngela bwà didìtwàla dyètù diikalè bilondèshile mèyi matùma à Nzambi, bwà nè tudi bânà bàà balùme nè bàà bakàji bàà Nzambi. Didìtwàlà dyètù, tuvwa nè cyà kubìnduluka nè kwenza, bintu byònsò, bilondèshile mikenji yìdi Nzambi mwelè.

“Nè ncinyangu bwà muntu mukàji kulwàtayè civwàlù cidì cikùmbànyine muntu mulùme.” Mbìbì nè byà mpèkaatù: “Bwà yêyè kukòsa nsukì yèndè,” ke mùdi Bible mwámbe nànkù, “ncintu cidì kaciyi cikùmbànyine nànsha bwà yêyè kusambilayè to.”

Wèwè udi wamba nè: “Kàdi bishi bwà eci?”

<sup>73</sup> Muntu kampànda kundwilayè; mwambi munène, mumanya bîmpè, àbìdi àdì panshì aa. Yêyè kwamba nè: “Mwanèètù Branham, lwàkù. Ndi muswe nkutentèkèlè byanza.” Yêyè nè: “Wèwè’s neunyagakajè mudimu wèbè wà bwambi.”

Mèmè kwamba nè: “Cinyi?”

Yêyè nè: “Ùtândisha bantu abu mùshindù awu.”

Mèmè nè: “Ndi ngàmbara . . .”

Yêyè nè: “Ndi ngìtabuuja aci.” Yêyè nè: “Mèmè pàanyi, ndi mwena Mpenta. Ndi ngìtabuuja nè bakàji kabàvwa nè cyà kwikala nè nsukì mîpì to, kabàvwa nè cyà kwikala bàlaaba tupenta to, nè bintu bu byà mùshindù ùdìbo bènza ewu, balaaba bilaabu kwisù.” Yêyè nè: “Kabìvwa bìkèngela kwenzabo aci to. Kàdi,” yêyè nè, “Nzambi mmukubiikile bwà wèwè kusambidila babèedi.”

Mèmè nè: “Mmumbiikile bwà kuyiisha Èvànjeeliyò.” Èyowà’s.

Ki yêyè nè: “Ndi ngìtabuuja aci. Kàdi,” yêyè nè, “udi wela meeji awu anyi?”

Mèmè nè: “Èyo. Tàngilà ùmonè cyùdi naaci, ndongamu yònsò minène eyi, yà ku tèleviziyò, nè bikwàbò byònsò. Ncyèna nè cyà kufila dyandamuna kùdi cintu nànsha cìmwè to ànu kùdi Nzambi.” Ncyà bushùwà. Mèmè nè: “Ncyèna nè cyà kufila dyandamuna kùdi cintu nànsha cìmwè to ànu kùdi Nzambi.”

Yèyè nè: “Ndi—ndi—ndi. . . Wèwè’s neùnyangakajè mudimu wèbè wà bwambi.”

Mèmè nè: “Mudimu kanà wònsò wà bwambi wikalà Dìyì dyà Nzambi mwà kunyangakaja awu, wùvwa nè cyà kunyangakajiibwa.” Ncyà bushùwà. Cyà bushùwà. Aci’s mmwòmò menemene.

Yèyè nè: “Èè, s’neùwùnyangàkàje.”

<sup>74</sup> Mèmè nè: “Wacyàmba nganyi dìbà adi? Nwamònu anyi? Bikèngela muntu kampànda àCyàmbè. Bikèngela muntu kampànda àtwe cidi Bulelèlè aci nyama ku mikòlò, nànsha Cyòci citàpa cinyi ku mwoyi.” Nènku balundà bàanyi, twètù bu beena Kilistò, bu bantu bàdi bìtabuuja nè tuyàaya mu Dyulu, Nyumà Mwímpè Yèyè mwinè neàtufwànyikijè mu Dìyì dyà Nzambi.

Yèyè nè: “Udi mumanyè cìvwa cikèngela wèwè kwenza anyi?” Yèyè kwamba nè: “Bantu bàdi bìtabuuja nè wèwè udi mupròfeta.” Yèyè nè: “S’bivwa bikèngela wèwè kwikala ulongesha bakàjì aba mwà kupeta mapà à cipròfeta nè bintu byà mùshindù awu, nè bintu binène, bitùmbùke pamutù pàà kantu kakesè.”

<sup>75</sup> Mèmè nè: “Némbàlongèshè makumi makolè bìshi pàdìbo kabàyi nànsha baswè kuyiila ABC? Pàdìbo kabàyi nànsha baswè kwenza cintu cyà pàtupù eci to, nwamònu’s, cintu cyà mu bufùki eci, neùbàlongdèlè bintu bitùmbùke bìshi?” Paùdi kùyi nànsha mwà kubangila ku. . . Udi muswè kutèèka dikàsà ku mutù kwà cibàndilu kùyi mwanji kufika pa cidyacidi cyà kumpàla. Ki bwà cinyi udi upona. Nwamònu anyi?

Twàdijila kwinshì, nè tũgunuka nè kubànda mùdi Nzambi ùkulombola kùùlu aku amu. Nwamònu anyi? Kùmbaja nsòmbelu wèbè nè londa ànu katòba nè katòba kàà Dìyì dìvwa Nzambi mukulongòlwèle bwà wèwè kwenza adi.

<sup>76</sup> Mpindyewu elàngànaayi meeji mùdi Nzambi. . . Bivwa bikèngela bwà twètù kudìtwàla nè kwenza maalu bu beena Kilistò. Bivwa bikèngela bwà didìtwàla dyètù kwikaladi bu beena Kilistò. Bwalu, tudi beenyi pànwapa. Apa kì Nkwètù nànsha. To. Tuvwa ànu batèèkiibwe mwab’ewu, bwà cipòòlù cikesè. Bikèngela tuye, muntu nè muntu wa kutùdi, dilòòlò edi.

<sup>77</sup> Mpindyewu elàngànaayibi meeji. Pìikalàbi nè Nzambi, mu luse Lwèndè, mmwènzè nè maamù, kumpàlà kwà mwànà mutòòke kulediibwayè, vitàminè kampànde yidi yimusaamina mwoyi, nè mèyi à maamù àdi àjikula ne: “Papa, ndi—ndi—ndi njinga cantaloupe, anyi cibimbi. Ndi dijinga nè cintu kampànda, cikwàbò.” Kacyèna mu. . . Mòna’s, yèyè’s neènzè cyònsò cidiye pèndè mwà kwenza aci, bwà kucipeta, bwalu mmumanyè nè mmuswè bwà mwanèndè kulediibwayè mupwàngàne nè mwèndè mwònsò. Nwamònu anyi? Ne yèyè neènzè cyònsò cidiye pèndè mwà kwenza aci, bwà kumupeta.

<sup>78</sup> Mmùshindù kaayi mene ùdiye Yèyè mutàmbe kwikala mukùmbànyine, bwà kucipeta! Yèyè's m'Mufuki. Mpindyewu elàngànaayi meeji mùdiYe mukùmbàne, bwà kutùlongolwela mubidi, bwà kwikala nè nsòmbelu mufwànàngàne nè mubidi Wèndè Sungasunga wà butùmbi awu, bu twètù baswè kwikala nè mwoyi. Kùdi cintu kampànda munda mwètù, cibìikila, bwà kwikala nè mwoyi. Nè kùdi cintu kampànda munda mwètù cidì cibìikilà bwà kwenza cidì cijaalàme. Pashiishe Nzambi nèàbìikilè muntu kampànda ku cibùmbà cyà ku cyambilu, anyi ku cyambilu, wíkala mwà kuyiisha Bulelèlè bwà kabùyì dyela mpatà abu. Bwà cinyi? Nwamònu anyi? Cidì cikuleeja. Dìbà adi, wèwè mwikàle mwànà mulelèlè wa Nzambi, udi ubanga kwela mbilà mikolè nè: "Nzambi, cyuumùsha kùndi. Ntengùlè ùmushe cintu eci kùndi. Umùshà bintu ebi kùndi." Bwà cinyi? Bidi bikèngediibwa nàнку bwà Nzùbu webè wa mu dyulu kuwikalà mwà kuya aku, kùdiYe muyè kalongolola aku. Bikèngela wikalè Mukàji-musèla mulelèlè Dìyì wa Kilistò.

<sup>79</sup> Mvwa nyiisha kùkaadi ndambù wa malòòlò pa mulàmbù, mu matùkù à difuta dyà cibawu. Mvwa munkaci mwà kuyiisha pa mwaba ùmwèpelè ùdi Nzambi, Èkèleeziyà ùmwèpelè wíkala Nzambi mwà kutuutakeenamù nè muntu, nèнку mwòmù amu, Yèyè mmwambè nè, mmwaba wùdiYe mutèèke Dìna Dyèndè. Mmwambè nè: "Ncyàkutwilangana naabò mu mwaba mukwàbò kanà wònsò to ànu mwaba awu, ciibi cìNdì mutèèkemù Dìna Dyànyì." Mpindyewu, Yèyè kèna ùtwilangana neenù mu ciibi cyà ba-Méthodistes, ciibi cyà ba-Baptistes, anyi ciibi cyà beena Mpenta to, anyi ní nganyì wa kùdìbo. Kàdi Yèyè wàkatèèka Dìna Dyèndè mu Mwàn'Èndè. Wàkamba nè: "Ndi mulwè mu Dìna dyà Taatù Wanyì."

Muntu kanà yònsò ewu ùdi ùlwa, nè mwànà kanà yònsò ewu, ùdi ùlwa mu dìnà dyà tatwèndè. Yèyè. . . Ndi mulwè mu dìnà dyà Branham, bwalu taatù wanyì ùvwa Branham. Nè wèwè udi mulwè mu dìnà dyèbè bwalu òvwa n'dìnà dyà tatwèbè.

Nèнку Yesù, Mwànà, wàkalwa mu Dìna dyà Taatù. Nè Yèyè wàkamba nè Wàkatèèka Dìna Dyèndè nè: "Mu ciibi eci mùNdì mutèèke Dìna Dyànyì, ke cìvwa mulàmbù ncyòci aci." Nè mu Yesù Kilistò ki mwaba wùmwèpelè wuwikalaku mwà kupeta bwobùmwè nè dikuukwila dyà Nzambi.

Wèwè udi wamba nè: "Èè, mèmè's ndi wa mu èkèleeziyà." Aci kaciyèna cishintulula cintu nànsha cìmwè to. Bikèngela wikalè munda mwà Kilistò.

Mwambi kampànda wa cyena màngumba, diloòòlò adi, kungambilayè, kwamba nè: "Mukalenge Branham, tàngilà kùnweku. Yesù mmwambè nè: 'Ewu yònsò udi witabuuja.' Bible mmwambè nè: 'Ewu yònsò udi witabuuja nè Yesù Kilistò m'Mwànà wa Nzambi, mmulela kùdi Nyumà wa Nzambi.'"

<sup>80</sup> Mémè nè: “Bible kèna kàbìdì wàmba, nè: ‘Muntu nànsha umwe kèna mwà kubiikila Yesù nè Kilistò to, ànu ku Nyumà Mwímpè’ anyi?” Nwamònu anyi? Kanwèna mwà kufikisha Bible ku dishima nànsha. Bìdì nè cyà kunwàngana.

Pa nàнку kakùyì mpatà to bikèngela ùlediibwè cyàkàbìdì, ku Nyumà Mwímpè munda mwèbè, udi ufila bujaadiki abu, wèwè mwine, udi mumanyè nè Yèyè m’Mwànà wa Nzambi. Nè pashiishe pawikalàmu, nè mwikale citupà; pawikalà mwànà wa Nzambì, mu Dìyì dyà Nzambi; mmunyi mùdì mwà kuvila Dìyì? Mmunyi mùdiku Nyumà Mwímpè mwà kukufikisha ku diitabuuja twitabàayi kampànda, wa nè bidì bikèngela bwà wèwè kwenza cintu kampànda cyà mùshindù ewu, pèndè Bible mwàmbè cintu kampànda cikwàbò? “Bidi bikèngela bwà twètù kuya kashàala bàà mu èkèleeziyà kampànda, nè kwenza *cikampànda*, anyi kwenza *cikansanga*,” pèndè Bible ùkwambila bitòòke tòò cyà dyenza? Nwamònu anyi? Nènku pashiishe díbà dinùdì numòna Cyòci aci, nè nudìbwinka ànuMù, nudi ànu naaCì díbà adi. Tùngunuka wèwè ànu nè kuya wenda ubànda, nè ukola ànu kukola.

Byenze bu ci—ci—civuba pàdici cibwela munda mwà mukàjì mwikàle nè diyì. Nènku pashiishe díbà didì diyì dikesè adi ditwàdija kwenda kudyunda, nè ditwàdija kupàtula bivuba, kadyèna dipàtula civuba cimwè cyà muntu, nè civuba cyà mbwa, nè civuba cyà ngombe nànsha. Didì dipàtula byònsò ànu bivuba byà muntu.

<sup>81</sup> Nènku pàvwà mwànà wa Nzambì, pàvwà mudyànjila-kulongolola awu. . . Awu’s mmwàkù mubi wà kwamba’s, kàdì’s n’Nzambì. Bible wa Nzambì nyèyè ewu. Didyànjila-kumanya dyà Nzambì didì mwà kudyànjila kulongolola, kwenza bwà bintu byònsò bikwacishanganè bwà lumù Lwèndè. Pàvwà dimiinu didyànjila kulongolola adi, òvwà dikèngela bwà wèwè kwikala adi, ki Nzambì kukubiikilaYè, nè kaamukankù kakesè kàà dimiinu muntwamu aku kùumvwa Dìyì dyà Nzambì, nekuungwije, Dìyì dimwè pamutù pàà dikwàbò, pa mutù pàà dikwàbò, pa mutù pàà dikwàbò. Kadyàdyàkusambakana nè twitabàayi nànsha umwe to.

<sup>82</sup> Mònaayi. “Mu biibi ebi, ditùkù dyònsò, bivwa bikèngela bwà kudyàbo kosher mupyamùpyà. Nè kakùvwa kufwànyine kwikala lwevènyì nànsha lukesè munkaci mwàbò to, munda mwà matùkù mwandamutekète.” Ncyà bushùwà anyi? [Disangisha didì dyàmba nè: “Amen.”—Muf.] Bikondo mwandamutekète byà èkèleeziyà, díbà adi, kakùyì cintu cidì ciikàle nè lwevènyì to, twitabàayi nànsha umwe, cintu nànsha cimwè cisakidilaku to. Kakùyì mpatà to bikèngela ciikalè dyàmpà kadiyì nè lwevènyì to. “Lwevènyì nànsha lukesè kalwàkusanganyibwa munkaci mwènù to, nànsha kakesè.” Ànu lwevènyì cyanààna, Dìyì Dyòdì diinè, ki cintu cimwèpelè ncyòci aci. Nè Dìyì adi didì Nzambì. Nè Nzambì wàkavwijiibwa mubidi, mu Mupèrsonà wà Yesù

Kilistò, mbwena kwamba nè, ke Ciibi ncyôci aci. “Ke Ciibi cîNdi ntwilanganamù neebè ncyôci aci, bwà kukuukwila, paùdi ulonda mêyi matùma à Nzambi.”

<sup>83</sup> Ki bwà cinyi, pawikalà wêwè, dilòòlò edi, mulwè ànu cyanààna, wamba nè: “Ndi ndàmbula Yesù Kilistò mwoyi wànyi,” nè kacya kùyiku mwânji kupeta Nyumà Mwîmpè to; bwelà munda Mwèndè. Udi nè cyà kucyènza. Udi nè cyà kukolela mu Yèyè. Lòmba Nzambi bwà kutentakaja Dîyi pamutù pàa Dîyi, mùshindù awu, too nè pawàlwà cipidi mu kaabujimà cyà mwànà wa balùme wa Nzambi, anyi mwànà wa bakàji wa Nzambi.

Nkwangata bintu byà pa buloba anyi? Yone wa Kumpàla ùdi wàmba nè: “Wêwè munangè maalu à pa buloba, anyi bintu byà pa buloba, mbwalu dinanga dyà Nzambi kadyèna nànsha mene munda mwèbè to.” Udi museeswishibwe. Udi nè dinanga dyà bintu byà pa buloba muntwamu, nè ndikuseeswishe, dyabùlù mmukuseeswishe, mu dikwimikilamù bintu, nè dikuleeja. Nwamònu anyi? Kwèna mwà...Èè, dîbà adi, kwèna mwà kupàtula Dîyi nànsha òmwè dyà Nzambi mu Bible to.

Cyàkakèbà mpèkaatù wa kumpàla ncinyi? Kaciyi ànu ku mafi manène matòòke tòò nànsha, kàdi mbwalu Evà wàkuumvwa bibi, dyabùlù wàkamumvwija bibi, Dîyi òmwèpelè. Dîyi òmwè, dyàkakòsa mùnyòòlòlò, nè kubèngayè kwangata Dîyi òmwèpelè. Aci civwa ntwàdijilu wa Bible.

Yesù wàkalwa munkaci mwà Bible. Yèyè wàkamba nè: “Muntu kààkwikala nè mwoyi ànu ku dyàmpà nkààyadi to, kàdi ku Dîyi dyònsò didi dipàtukà mukana mwà Nzambi.” Aci’s n’Dîyi dyà Nzambi mu kaabujimà. Nudi nwitabuuja nè Aci ndibuulula dyà kùdiYe anyi? [Disangisha didi dyàmba nè: “Amen.”—Muf.] Dîyi dyà Nzambi mu kaabujimà.

Pashiishe, mu Bwàkabuulwibwà 22, Yesù wàkalwa kùdi Yone, pa cisanga cyà Paatèmò. Ki Yesù nè: “Mèmè Yesù ndi mutùme mwanjèlò Wanyi bwà kufilayè bujaadiki bwà maalu aa.” Nwamònu anyi? “Ewu yònsò wadìdinga kuumushila Dîyi òmwèpelè ku Dyòdi edi, anyi wasàkidilaKù dîyi òmwèpelè awu, Mèmè nèngùumushè cyèndè citùpà ku Mukàndà wà Mwoyi.”

<sup>84</sup> Kì nkwamba ànu nè: “Èè, mèmè—mèmè ndi ngiitabuuja Yesù Kilistò, Mwànà wa Nzambi” to. Abi’s mbîmpè. Pashiishe sàkidilakù bikwàbò byà ku Cyôci aci. Wêwè udi wamba nè: “Ndi mubingishibwe. Ndi mulabule mwambi ku cyanza. Ndi ngiitabuuja Yesù Kilistò.” Dîbà adi bidi bikèngela ùlediibwè cyàkàbidi. Udi nè cyà kuujibwa tètè nè Nyumà Mwîmpè. Nwamònu anyi? Tùngunuka wêwè ànu nè kusàkidila’s, paùdi utùngunuka ànu nè kwenda kuya apu. Udi wenda ukolela mu cipidi cyà mwànà wa balùme nè wa bakàji wa Nzambi. Ekèlekèle!



Nzambi, mmukumbàne bwà kutùlongolola, nè kutùpèèsha dijinga adi mu nsòmbelu wetù, didi dyènza nè twikalè baswè kumòna cintu kampànda. Mbanganyi mwab'ewu bàdi baswè Nzambi búngì butàmbidile? [Disangisha didi dyàmba nè: "Amen."—Muf.] Mòna's, bidi bileeja nè kùdi byàbúngì bitàmbidile bwèbè wèwè. Nwamònu anyi? Nudi munkaci mwà kucijinga. Bisaamà byènu bikesè byà pa lululu bìdi byènda bilwa. Nwamònu anyi? Bidi bikukèngela byàbúngì, bwà twamònakù mwà kwikala nè disànka, nè badishikàmìne, nè bapwàngàne. Bidi bìkèngela bwà twètù kwikala nànkù.

<sup>85</sup> Bu mùdi kaa—kaacivuba kakesè—kakesè kàà mwoyi aku kiikàle... munda mwà Nzambi, ànu bu, nènku civuba cyà mwoyi cidi mund-... munda mwà maamù. Nzambi wènda ùkolesha; nè wènda ùya, muyè, katùlongolwela mwaba, mwaba wà Cyendèlèlèlè pàmwè nè Yèyè mwinè; kì mmwaba udi nzùbu wa beena cikupi, mwikàle ùfwa, nè mpèkaatù, nè masandi, nè bukooya bwà pa buloba apa to. Pìikalà meeji èbè pa cyòci aci, cidi cileeja nè kacya kaàtukù mabwele mu dipetangana nè Nzambi to. Nwamònu anyi? Udi musalùke. Udi nè cibwejàkàji mu cyeledi cyà meeji.

Udi ànu ukashàala wa mu èkèleeziyà cyanààna wamba nè: "Èè, mémè's ndi wa mu *cikampànda*. Màmù's ùvwa wa mu *cikansanga*." Abi's mbifwànyine kwikala bimpè mu ditùkù dyà mamwèbè, kàdi tudi nè mwoyi mu ditùkù dikwàbò.

<sup>86</sup> Mukenji wà Wesley kawùvwakù mufwànyine kwikala... Yèyè kàvwa ànu mufwànyine kwangata Luther to. Luther wàkiitabuuja mu dibingishiibwa, kàdi Wesley ùvwa nè dijidiibwa. Beena Mpenta bààkalwa, kabàyi mwà kwangata ànu dibingishiibwa cyanààna, dijidiibwa to. Bòbò, civwa ncikondo bwà dyalujulula dyà mapà. Mpindyewu tudi tuumuka ku abi. Nwamònu anyi?

Bipidi bisàtù byà—dikola dyà Mvinyò. Cyàkumpàla, nkabèji kakesè, Luther wàkajuuka, ùmukila ku dilongolola. Eyo. Aci civwa cicolakola. Tàngilàayi bufùki. Nzambi nè bufùki bàdi bàkwàta mudimu mu ntùngunukilu, bwalu Nzambi ùdi mu bufùki. Nwamònu anyi? Civwà cilondà cyàkalwà, m'wepu, bungungu bwà bilòngò, cikondo cyà ba-Méthodistes. Pashiishe kulwakù beena Mpenta, kaa, ekèlekèle, bipwàngàne ànu menemene, nwamònu's, ànu mùdi lutete lwà blé lùfwànàngàne nè blé mupwàngàne amu, lutete lwà blé. Lùkàngulàayi, kamwèna blé mundaamu nànsha umwe to, nànsha kakesè. Ncizubu, cyambudi cyàCi, kàdi Mwoyi awu wùdi wùkwàta mudimu too nè ku ndekeelu. Nwamònu anyi?

<sup>87</sup> Bòbò kale wàwa mu cikondo cyà Luther bàkiitaba Luther. Mwoyi awu wàkatùngunuka, kàdi wàkaya nè kudyènza dngumba. Katanci aka anyi, cyàkashàalà ànu cyà cyena dngumba civwà ndekeelu waci nè cyà kwoshiibwa. Nwamònu

anyi? Cikolakola cidi cyùminyina; cidi ànu cyambudi cyanààna. Bàmwè bàà kùdìbò bàcidi ànu bàteeta kushààla mu cikolakola cyà kale cyàmbudi aci, kabàyi bamanyè kantu nànsha kàmwè pa bìdì bitàngilà Nzambi to, mbafwè. Bàdi bàmba nè: “Èè, tàngilà, twètù’s tudi dibèjì. Tuvwa Luther.” Ncyà bushùwà. Kàdi tàngilàayi kùdìci mpindyewu. Nwamònu anyi?

“Tuvwa ba-Méthodistes.”

Nè nànsha mene: “Twètù tuvwa beena Mpenta.” Kàdi tàngilàayi ku Mpenta, mùdiyè wènda ùshààla wa mashìka nè wa maalu à kwìsùkwìsù, mùshindù mene ùdì bantu bònso bènda bàpàtukamù. Nwamònu anyi? Ncinyi aci? Cìvwa cyambudi cyà Dimiinu dilelèlè. Nwamònu anyi? Bikwàbò byònso ebi bìvwa cyambudi, kàdi byàkashààla dìngumba. Wèwè wamba nè: “Mémè ndi Mpenta,” aci’s kacýèna nè musinga nànsha mukèsè kùdì Nzambi kutàmbà ànu bu mùdì wèwè mwà kwamba nè wèwè uvwa mwena Kàtòlikè kàà cyena Loomò anyi mwena Yudà, anyi cyònso cyùdì mufwànyìne kwikala aci.

<sup>88</sup> Bikèngela ùlediibwè, nè Mwoyi wàkapàtukilà ku cyambudi kwaka awu. Kùshààdi mu cikolakola amu to. Kùshààdi mu dimiinu to. Tùngunukà ùpàtukè ùkabwelè mu citùpà cipwàngàne.

<sup>89</sup> Mpindyewu, vùlukàayi, nè dilongolola dyònso ditùvwà bapetè, mu ba-Luthériens bònso abu nè bikwàbò, mu bidimu bisàtù bàdi bàdìvwija bulongolodi. Ncyà bushùwà. Ditàbuluja dyònso dyàkatwàla bulongolodi munda mwà bidimu bisàtù.

Anji elàayibi meeji nè ntàntà bule kaayi udi edi munkaci mwà kwenzeka, bidimu makumi àbìdì nè byà mu njila, kakùyì bulongolodi nànsha bùmwè to. Bwà cinyi? N’Dimiinu, dilwa, didìfwimba mwìnshì mwà cizubuzubu, nùnkù *ewu*. Ndidýàdije mwaba awu, mpindyewu dìdì nè cyà kushààla mu Bwikadi bwà Mwánà awu, bwà kuboba kulwa lutete lwà butùmbi bu mùdì Elu lwàkabwèlèmu dyàmbedi alu. Èkèleeziyà mulèlèlè wàkapweka mu buloba, dyàmbedi awu, neàbandè buludì mu cikolakola, bwà kupàtukayè, mukwàbò Èkèleeziyà, pàdì katùmbà kàà dinowa naakù kàlwa bwà kuMwambula. Mwoyi wàkapweka mu Luther awu, Mwoyi wàkapweka mu ba-Méthodistes awu, mwoyi wàkapweka mu beena Mpenta awu, newùbwelè mu lutete. Byònso nebikabwelè too nè mu lutete, nè nebipatukè, bifwimba Mubidi mupwàngàne wà Yesù Kilistò.

<sup>90</sup> Ànu mùtù dìbà dibànda amu, mu dindà. Kwénà mwà kutàngila ku bufùki nànsha bùmwè kabùyì bùfidila Nzambi bujaadiki nànsha. Kabyèna mene bikukèngela Bible, bwà kumanya nè kùdì Nzambi kampànda to. Kaadìbà kakesè kalediibwe, kànà katekète kàà mu dibòko. Patùdì twipacila ku dìbà mwandamutekète jaajaaja, dyaaya, ditwàdija kuya mu kàlaasà. Pa dìbà dikumi anyi dikumi nè òmwè jaajaaja, dipàtuka. Pa dìbà dikumi nè ibìdì jaajaaja, dìdì mu dikànda

dyàdì. Pa dîbà isàtù wa mapingaja, dikaadi dyènda dikùlakaja. Dîbà mwandamutekète anyi mwandamukùlù, isambòmbò... Dîbà itaanu anyi isambòmbò wa mapingaja, makaaya àdi àdikòbama. Didi dîfwa. Ki ndekeelu wadì awu anyi? To. Didi dibìika ku lufù mu dindà didi dilondà. Mwoyi, lufù, dijiikiibwa, dibìika dyà ku lufù!

<sup>91</sup> Tàngilàayi mùdì mabèji àtòloka ku mucì. Didi dipàtuka, dibèji dîmpè, dilenga; dîtwàla dilèji; ùkwàma mamuma àwù. Cidì cilonda, katanci aka anyi, muvù wà mabèji àpòpoka ewu pwàà, ùwùkwàta, ke lufù alu's; ùpweka buludi too nè mu miji, muwinshi mwà buloba cyàkàbìdì. Ki ndekeelu wadì awu anyi? Mu muvù wà bintu bitòloka wùdì wùlondà wùdì wùpingana cyàkàbìdì bwà kufila bujaadiki. Kaa! Ki mwoyi wà ku musangu nè ku musangu ngwòwò awu.

Kàdi, mwanèètù wa balùme, mwanèètù wa bakàji, tudì nè Mwoyi wà Cyendèlèlèlè. Tudì nè Mwoyi wà Cyendèlèlèlè ku Munène Wàkalwa ewu, wàkaya, mmukùmbàne bwà kutùlongolwela mubidì. Nènku bisaamà byà dikola bitùdì tuumvwa ebi, bu panùdì nwènù bakàji nudyùm vwa bapishìibwe bwà binùdì nwenza, nwènù balùme bàdì kacya nwèla nzàdì ku malongesha à sèminère, nè bikwàbò, nwènù bònso nudi baswè kwamba nè: “Ntu—ntu ngàmba twitabàayi ewu ku mwoyi. Ntu ngèna *cikampànda*.” Kàdi kùdì cintu kampànda munda mwèbè amu, paùdì umòna mèsù à bampofò àtàbala; mpudimaci yùmvw- . . . mpofò. Bintu byònsò bidì bilayìibwe ebi. Umòna Dìyi diyìishìibwa mu bukolè Bwàdì. Umòna ndumbà kampànda, muumùshìibwe mu mùsèèsù, muvwijìibwe inàbànzà. Umòna ka—umòna kanwàyì kampànda ùpàtukamù, nè ùlwa mwena Kilistò mulelèlè wa Nzambì. Ekèlekèlè! Nwamònu anyi? Kùdì cintu kampànda, Mwoyi munda amu. Kàdi wèwè kubanga kudyùm vwa nè: “Èè, pàmwàpa kabìvwa bikèngela mèmè kwenza nàнку to.” Kàdi, nwamònu's, cidìku ncyà nè, ncintu kampànda cidì Mubidì wèbè wà dyàm wàm wà awu mwikàle ùjinga. “Lwàkù.” Kàdi Nzambì ùdì nè maavitàminè ànu munda *Emu* mene bwà kantu nè kantu kàà Mubidì awu. Yesù mmuyè bwà kulongolola mwaba munda mwà Nzambì; èyowà's, mukalenge, kaacivuba kakesè, mwànà wa balùme wa Nzambì, mwànà wa balùme mutekète anyi wa bakàji wa Nzambì.

<sup>92</sup> Yesù wàkalòmba cintu ànu cimwèpelè, mu disambila Dyèndè kùdì Taatù. Nudi bamanyè nè civwà ncinganyì anyi? Cintu cimwèpelè, paanyimà pàà didikèngesha Dyèndè dyònsò dyàkenzàYe pa buloba apa adi, lwendu lwà kendàYe alu, kajila kààkendèlèYe aku. Wàkalòmba ànu cintu cimwèpelè nè: “Bwà nè mwaba Ùndì, bìikalèpu bòbò pààbò.” Yèyè wàkalòmba bwobùm wè neetù. Ke cintu cimwèpelè cyàkalòmbàYe Taatù mu disambila aci, bwobùm wè bwà kashidì neebè. Panwikalà baswè kubala bwalu ebu mu Yone Munsantu 17, mvensà wa 24. Dîbà adi

bìwà bikèngela bwà twètù kuMujinga bìshi's? Yéyè ùjinga . . .

Mpindyewu tèèlejàayi. Pawikalà bulelèlè mulediibwe kùdì Nyumà wa Nzambi, aci ncìdì nè mushinga kutàmba bintu bikwàbò byònsò kùdì. Nwamònu anyi? Kí mmukàndà kampànda wà tunungu to. Kwèna nè nsòmbelu wa mikenji kampànda nè bikwàbò to. Udi nè mwoyi ku ngàsà wa Nzambi, Nyumà wa Nzambi.

<sup>93</sup> Nkààdi misangu yàbùngì mwambàmbe bwalu ebu. Mémè bu mpàndànjlà, mvwà nè cyà kuya dyàmwàmwà dyà mbú. Ambàayibì túng bu mémè mwà kubweja mukàjàanyi mu nzùbu, nè bàna bàanyi kubàmbila nè: “Mpindyewu tàngilàayi kùnweku, nwènù bàna! Tèèlejà kunweku, Màndàmù Branham! Mémè kí mbàyebè. Kwakwìkala nè balùme bakwàbò pangìikalè muyè to. Wèwè mwenze nàнку, nènkwùlè dikoba pàngìikalà mwalùkile kumbèlu”? Uh-huh. Nwamònu anyi?

Ntuuta mikùmà panshì nè: “Nwènù bàna, nudi nuumvwa cìndì ngàmba aci anyi?”

“Èyo. Èyowà, papa. Èyowà, papa.”

“Ndidìngè ngùmvwè nè nudi bashìkùkile ku kantu nànsha kàmwèpelè? Nwamònu anyi?” Nwamònu anyi? Mpindyewu, aci kí ncifwànyine kwìkala dìkù anyi?

Mpindyewu ambàayibì túng bu yéyè mwà kwamba nè: “Mpindyewu, wàjikìjì anyi, mukalenge? Mpindyewu ndi muswè nkwambile cintu kampànda. Mukalenge Branham, mémè's ke mukàjèèbè musèla wa dibàkà dyà kàbandù! Kùpecikù mulundà mukàjì nànsha umwe to paùyaaya apu, wèwè pèèbè”? Mpindyewu, aci kí ncifwànyine kwìkala dìkù anyi? Mpindyewu, aci's ncifwànyine kwìkala cintu kampànda.

Katwèna twenza nàнку to. Mémè ndi mumunange, nè yéyè munnange. Pàdiye mumanyè nè ndi nya, mmumanyè nè ncyèna mwà kuya pàdì Mukalenge kàyì mumbiikile bwà mémè kuya nànsha. Tudi tutwà binù panshì, nè tukùngwija bàna. Tusambila. Mémè nè: “Nzambi munanga, kùbakù nyàànaanyi mukesè ewu, nè bàna bàanyi.” Bàdi bàmba nè: “Nzambi, kùbakù papa patwìkalà bayè, pìikalàye muyè.” Nènku dìbà adi patwìkalà bayè kuntwaku . . .

<sup>94</sup> Mpindyewu, ambàayibì túng bu mémè mwenzè cintu kampànda cyà cibì kuntwaku? Ambàayibì túng bu nè mvwa mushebèye mikenji, mwenzè cintu kampànda cyà cibì? Kàdi mémè kwalukila è kuya kùdì mukàjì mukesè mukwàte nè byà luse wànyì mémè awu, kwimana mwaba awu kumutàngila nè minyèngù mu mpàla, nè nsuki yèndè yènda yitòloka mvyà, Mémè kuya tamakatamaka è kwamba nè: “Munanga wanyì, ndi muswè nkwambilè bwalu kampànda. Udi mumanyè nè ndi mukunangè.”

“Bushùwà's, Bill, ndi mumanyè nè udi munnangè.”

<sup>95</sup> “Ndi nkwabwila cîndi mwênzè. Ndi muye ne nsongàakàjì kampànda kumbèlu.” Ndi—ndi ngàmba nè: “Udikù mwà kumfwila luse bwà bwalu abu anyi?” Ndi ngiitabuuja nè mmufwànyine kumfwila luse. Ndi ngiitabuuja nànkù. Kàdi ndi mufwànyine kwenza ciine aci anyi? Pàndi ntàngila, mwimàne mwaba awu, mmòna nsukì ayi yènda yitòloka mvyà, nè mmanya nè mmwimànèmànè pankaci pàanyi nè bantu bònsò, nènku ndi mumanyè mùvwàye mukàjì mulelèlè, mvwakù mwà kwenza cyòci aci anyi? Mbipiciibwe nè mèmè—mèmè mufwè pamutù pàa kumutàpa ku mwoyi. Mmwômò.

Nènku byòbì nànkù, mu dinanga dyà phileo kùdì mukàjàanyi, mmùshindù kaayi wàtambàbi kwikala binène bwà dinanga dyànyì dyà agapao kùdì Nzambi’s! Kaa, ncyèna mufwànyine kwenza cintu nànsha cimwè bwà kuMutàpa ku mwoyi to. Nànsha kakesè. Ndi—ndi muMunangè. Ndi muswè kwenza cyònsò cidìYe—cidìYe muswè bwà mèmè kwenza aci. Ndi muswè kukùmbanangana nè Dìyì dyònsò òvwàYe mwàmbè, nànsha bàà pa buloba bàmbè cinyì. Bòbò, bòbò kabàakuCìitabuujakù to, nànsha bishi. Ndi muswè kumanya cidìYe mwàmbè bwà mèmè kwenza. Nènku mèmè mupangile cintu kampànda, ndi muswè bwà Yèyè kucimpèèsha. Nè kwenda bwà bwalu Bwèndè, tudilama twètù biinè ku maalu à pa buloba.

<sup>96</sup> Mubidi wà kale wà pa buloba ewu wùdì nè cyà ku... Lekèlaayi nwwàmbilè. Mubidi wà buloba ewu unùdì nutàmba kwelela meeji àbùngì, unùdì nutentula naawù Hollywood awu. Nudi nendè pabwìpì menemene. Kàkwikala mwaba awu ntàntà mupitèpìte bule to. Nudi bavùlùke. Nukàadi bùmvwè cipròfètà aci, nwamònu’s, cyàkampèèshà Mukalenge nè: “Neàtùkinè mwinshì mwà buloba.” Èyowà’s, mukalenge. Mònaayi. Neàtùkinè. Tàngilàayi ànu cyanàànà. Mpindyewu, kacya kaCìtukù cyànji kungambila cintu cyà mafi to, too ne leelù ewu. Nènkonke muntu kanà yònsò udi muswè kwamba awu. Ncyèna mumanyè nè ndìbà kaayi anyi nè mpenyi to, kàdi bwèndè mbutùuka. Cilumbulwidi ncilembèlèlè kumutù kwèndè. Kakwèna bupikudi bwèndè yèyè to; mbumane kupita. Nwamònu anyi?

<sup>97</sup> Mpindyewu mònaayi eci. Ikàlaayi nè mwoyi Bwèndè Yèyè, nudilama ku maalu à pa buloba. Mpindyewu tàngilàayi. Nudi nutàngila ku tèlèviziyò, bàmwè bàà ku nwènu bàna bèètù bàà bakàjì, nè nupweka mwab’ewu kàdi biikàle nè dijinga adi, nwènu nsongàakàjì. Nwènu’s nudi bansongà. Ndi mumanyè nànkù. Kàdi nudi beena Kilistò. Nwamònu anyi? Nudi bashiilàngàne. Kanwèna baswè kufwànangana nè bàà pa buloba to. Nudi banangè maalu à pa buloba. Kì ng’ànù nwènu bansongà to; bamwe bàà ku nwènu bakùlumpè. Nwamònu anyi? Èè, cidì cyènza aci ncinyi? Nwamònu anyi? Nudi nutàngila tèlèviziyò, nudi nupweka ku màkàjiinyi, numòna tulàmbà tukesè twà kale tùdì bakàjì bàvwàla etu, twà bukoya etu.

Nudi bamanyè cìikalà mwà kwenzeka mu Ditùkù dyà Cilumbulwidi anyi? Udi mufwànyine kwikala ànu mudilamè kùdi bàyebè nè mwèbè mwònsò, kàdi mu Ditùkù dyà Cilumbulwidi nebi-kèngelè bwà wèwè kulumbulula bwà dyenda dyà masandi. Yesù wàkamba nè: “Ewu yònsò ukàtàngidi muntu mukàji bwà kumwalakana wàmanyi kwenda nendè masandi munda mwà mwoyi wèndè.” Wa kutàndisha ki nganyi’s? Ng’wèwè. Nwamònu anyi? Uvwa mudileejè wèwè nkààyebè, tùpùtulù atu nè mipanù.

Mukàji kampànda wàkangambila, àbìdì àdì panshì aa, wàmba nè: “Ncìtu mvwàla tùpùtulù to, Mwanèètù Branham. Ndi nsàkidila Mukalenge bwà cyòci aci. Ntu mvwàla mipanù.”

<sup>98</sup> Mémè ne: “Aci’s ncitàmbe bubì.” Aci’s ncitàmbe bubì. Ncyà bushùwà.

<sup>99</sup> Mbikukolèlè too nè bwà kusumba nkanzu, wetù ewu, bwà wa mukàji. Yèyè kwamba nè, mukàji kampànda wàkamba nè: “Èè, wèwè’s wàmbi bulelèlè. ‘Kwèna mwà kusumba nkanzu to. Kwèna mwà kumusumba to.’” Kàdi bàcìdì ànu bàsùmbisha bilàmbà nè biikàlè nè màshinyi à bilàmbà. Nwamònu anyi? Pa nànkù kakwèna pàà kubingila to, nànsha kakesè. Nwamònu anyi? Nwamònu anyi?

Bìdì bìleeja nànkù’s, mwanèètù wa bakàji. Mémè ndi mwanèènù wa balùme. Nè mémè ndi musadidi wa Kilistò, udi nè cyà kulumbulula ku Cibàsà cyà Cilumbulwidi bwà cìndi ngàmba kaaba aka dilòòlè edì eci. Nwamònu anyi? Neùkiimànè, mupùile bwà masandi, bwalu dinanga dyà Nzambi dìvwa dipangìke munda mwà mwoyi wèbè. Wèwè ucìdì ànu uya mu èkèleeziyà. Udi mufwànyine kwikala ànu ujà maja mu Nyumà. Udi mufwànyine kwikala ànu wakula mu myakulu. Nènku bintu abi bìdì ànu bìmpè, kàdi kì ncyànji kwikala ànu Cyòci to. To, mukalenge.

<sup>100</sup> Vùlukàayi nè, Bible mmwàmbè nè: “Mu matùkù à ndekeelu nekùlwe ba-Kilistò bàà mashimi,” kì mba-Yesù bàà mashimi to. Aci kì mbafwanyine kucitwàla nànsha. Kàdi, “ba-Kilistò bàà mashimi,” balaaba maanyi bàà mashimi. Kakùyi mpatà to mbalaabibwe kùdi Nyumà, nè Nyumà Mwîmpè, kàdi biikàlè ànu bàà mashimi. Nwamònu anyi? Kùdi bàbìdì . . .

<sup>101</sup> Kùdi bantu bàsàtù mu wèwè amu. Lwà pambèlu apa mmubidi. Udi nè byumvwilu bitaanu, byùdì ulenga naabì cisòmbedi cyèbè cyà pa buloba aci. Lwà munda mùdì nyumà. Kùdi byumvwilu bitaanu mwaba awu, dinanga nè kondò kàà mwoyi, nè bikwàbò, byùdì upetangana naabì. Kàdi lwà munda mwà cyòci aci mùdì musùukà.

<sup>102</sup> Vùlukàayi nè: “Mvùla ùtu ùlòkela bìmpè nè babì.” Mvùla umweumwe wìkala mwà kwenzà nè lutete lwà blé lutòlokè nyèyè udi wenza nè mpoopù yitòlokè pàayi. Nwamònu anyi? Ncinyi cìnè aci? Munda mwà dimiinu adi mùdì ngiikàdilù kampànda,

ne ngiikàdilù awu ùdi ùdileeja patòòke, ùdi ùdileeja nkààyendè patòòke. Cìdi mwà kwimana mu budimi bùmwebùmwe abu, mwaba awu mene pàmwe nè lupèlà. Lupèlà nè blé bìdi bìimana pàmwe, bìdi bicyònkomoka ànu mùshindù ùmwè. Mutù wèndè mmwinyika. Wùdi wùfwa nè nyòòtà yà máyi à kunwà. Pàdi mvùla ùlwa, mpoopù ùdi mwà kwela mbilà nè díyi dikolè ànu mùdì blé mwà kwela amu. “Kàdi ku mamuma àbò nkunwàbàmanyinà.” Nwamònu anyi?

<sup>103</sup> Beena Kilstò, ndi mwà kupanga kunùmònaku cyàkàbìdi. Nwamònu’s, kùkaadi bidimu kùmvwà mwab’ewu. Ndi mwà kupanga kunùmòna cyàkàbìdi bwà kashidi. Endàayi mu mulongo wà Díyi dyà Nzambi. Tàngilàayi mu lumwènu.

Byènzè bu mwànà wa balùme mutekète musangu kampànda, uvwa mukolele ku musòkò, kacya kàyiku mwànji kumòni lumwènu to. Kulwayè ku nzùbu kwà tatwèndè mukàji. Kubangayè kubànda bibàndilu abi. Kumònayè lumwènu, è kumònayè mwànà mukesè wa balùme mu lumwènu amu. Kutùngunukayè nè kubànda, wènda ùtàngila. Kàdi ùvwa mwà kukùpa cyanza, nè mwànà wa balùme mutekète awu ùvwa mwà kukùpa cyanza. Ki yèyè kutùngunuka nè kutàngila. Kacya kàvwa mwànji kudimòna mu lumwènu nànsha. Nènku mmwènzè ànu ùfika pabwipi menemene nè cyòci aci, ùkùdimuka, kwambayè nè: “Mòna’s, Maman, s’mmèmè!”

<sup>104</sup> Udi nè mmwènekelu kaayi, mu lumwènu lwà Nzambi? Ùdi ùleeja mwànà wa bakàji anyi mwànà wa balùme wa Nzambi anyi? Kùdikù cintu kampànda, cyà nè, paùdi umvwa Cyòci aci, cìdi cikufikisha ku dikina muntu udi uCyàmba awu anyi? Anyi, kùdikù cintu kampànda cikoka, cyàmba nè: “Ndi mumanyè nè muntu awu mmubingè bwalu aci cidi mu Mifundu anyi?” Dìbà adi, abi’s mvitàmine yidi yikèngediibwa bwà mubidi ewu yidi milongolola bwà kwikalayiku, nzùbu wíkala mukwàbò awu nè cyà kukèngela dìbà diwàfikàmu. Nwamònu anyi? “Nzùbu ewu; patwikalà bavwàle wa pa buloba.”

<sup>105</sup> Mpindyewu vùlukàayi nè, tutu tutàmba kwela meeji àbùngi bwà mubidi ewu. Tutu tuwùvwadika bilàmba byàbùngi be. Tutu twenza bintu byàbùngi, biinè abi, bìdi kabiyi bikèngediibwa to, tushintulula ànu kushintulula ànu kushintuilula, nè bintu byònsò ebi. Nènku—nènku, kaa, s’cidi ànu bantu bònsò.

Lekèlà ànu muntu kampànda àtwadijè cintu kampànda. Laabà mùkubù mukunze ku bibàndilu byèbè kàdi ùtangilè mùdì ba Jones bàlaaba byàbò. Wèwè mushintùlùlè màshinyi à Chevrolet mwangàte à Ford, nènku kabàyi mwà kucitwàlakù to. Ncikondo cyà ditembangana. Lekèlà ànu. . .Lekèlà mukàji kampànda àlwe mu èkèleeziyà, muvwàle cifulu cyà mùshindù kampànda, tàngilà mùdì bakàji bònsò bàcipeta; nangananga mukàji wa mpaasàtà, nwamònu’s, tàngilàayi ànu nùmonè cidi cyènzeka. Mpindyewu, aci ncilelèlà. Aci mbulelèlà bwà kabuyi

kwela mpatà to. Ncikondo cyà ditentulangana. Mwanèètù, bìvwa bikèngela kwikalaci dîbà dyà ditentulangana. Nè bintu byònsò abi—byònsò abi bìdi—bìdi bwà kiipàcìlà kampànda.

Ncitu ncyùka nè nkooci wanyì mmukumbànàngàne nè mupanu anyì to. Nènkù mwà nsanganyibwa mu bwalu bukòlè. Mukàjàànyì anyì mukàjì wa mwanàànyì, muntu kampànda, ùvwa nè cyà kungambila mùshindù wà—wà kàlàvwandà kàà kuwùvwàla naakù. Mèmè—mèmè ncyènà ncyùka ní mbikumbànàngàne anyì to, nànsha nànkù. Ndi muswè bwà dilabula dyànyì dikumbananganè nè Dìyì dyà Nzambì. Ki cintu ncyôci aci, bwalu mwômò amu ki mùndì ndumbila bwà kusòmbela; kî mmu masangu à njila mwàmwa nè ba-Jones to, kàdi mu Butumbi mwàmwa mùdi Yesù ùsanganyibwa, muye bwà kutùlongolwela mwaba. Èyowà's, tudi baswè aci. Èyowà's, mukalenge. Dikàndaayi ku cyònsò eci.

<sup>106</sup> Tabernacle wa kale wa pa buloba ewu, nudi bamanyè cìdìci anyi? Mubidi ewu ùdi bu nkooci wa kale ùdi mulwàte, nkooci kampànda ùvwa mulwàte musangu kampànda. Kàdi mpindyewu udi nè mukwàbò mutàmbe bwîmpè, kucyènà umulwàta kàbìdì to. Cyùdì wenza ncinyi? Udi umukùdika mu kabàdi kàà mu cimanu, bwalu udi nè mukwàbò mutàmbe bwîmpè. Udi nè nkooci mutàmbè bwîmpè. Ngwa mupyapùpyà kutàmba ùvwa nè ciibidilu cyà kulwàta awu, awu ùkaadi mutòòkòlòke. Ncinyi aci's? Ncivwàlu aci. Wèwè ke cidi munda mwà cyôci aci amu. Cìvwàlu aci ncyenze ànu cinyi? Ncyambùle cimfwànyì cyèbè. Wamònu anyi? Kàdi kùcyènà ucikèngela kàbìdì mpindyewu to. Udi mucikùdike kuulu. Cìkaadi mikùsù.

Nènkù mùshindù awu ki ùdi mubidi wà kale ewu, wèwè, wòwò awu mmwambùle cimfwànyì cyà dyulu. Kàdi nànsha nànkù, kî ngwèwè to. Wèwè udi munda mwà mubidi awu. Wèwè, Nyumà wa Nzambì, ùdi munda mwà mubidi awu. Ki cidi cyènza nè pambèlu pìikalè pàkòòkela, bwalu munda mùdi mùkòka cyôci eci, nwamònu's, ucibweja mu njila wa Dìyì dyà Nzambì; munda mwèbè, wèwè mwìnè, buumùntù bwèbè.

Mubidi ewu ùdi ànu nkooci wa kale. Nè dîngà ditùkù, newènzè naawù cinyi, bwalu wèwè uvwa—uvwa ànu mu cìvwàlù amu bwà katanci kakesè cyanààna? Aci cidi bu cìvwàlù cyà pa buloba; mubidi ewu. Mubidi wèbè—wèbè wà cyà bushùwà ewu, wèwè mwìnè mulelèlè, ngudi munda mwà cinkooci cyà kale cyùdì ubiikila nè ng'William Branham eci, anyì Susie Jones, anyì ní nganyì. Nwamònu anyi? Dîngà ditùkù newùlebelele mu cibambalù cyà buloba cyà cìvùlukilù cyèbè. Neùwelè munda mwà lukità mwàmwa, nè dîngà ditùkù neùwikilèpu dîbwe dyà pa lukità, “Apa ki pàdì palààle Révérend *Kampànda* ewu, anyì John *Kampànda*, anyì *Kansanga*.” Newìkalè mulààle mwaba awu bu cìvùlukilù cyèbè. Bantu mbakumwènena ànu mu eci. Nènkù cyùvwà aci, wèwè wa cyà bushùwà, ùvwa munda mwà



cyôci aci. Kàdi nkooci wa kale awu, yêyè mwinè, ùwwa ànu “mwambùle cimfwànyì cyà mu Dyulu.”

Kaa, bantu wa yààya, nukàadiku balamishe mwaba bwà kushintululula nkooci anyi? Nukàadi balamishe myaba yà mu Dyulu anyi? Vùlukàayi nè, nudi nè cyà kwikala nè myaba milamisha. Kanwènà mwà kubwelamù nwènù kanùyì naayi to.

Ndi ngàakula neenù mu ngaakwilù wa cyena leelù mpindyewu, unùdi bamanyè. Nwènù bayè ku cilàala-beenyi, nwamba nè: “Èè, mèmè’s mvwa nè. . .”

<sup>107</sup> “Uvwa mulamishe mwaba anyi? Èè, mfwilàku luse. Myaba yònsò mmyùlè.” Udi ushàala pambèlu mu mashika, bwalu uvwa mupangile bwà kulamisha mwaba.

Kàdi wèwè mwà kufika ku ndekeelu kwà lwendu lwà mwoyi wèbè, kùyì mulamishe mwaba to, kakwàkwila Muntu wàkwakidila nànsha. Nebikèngelè bwà wèwè kubwela mu Cyendèlèlè cyà mîdimà mwikalà mbilà mikolè amu, nè myadi, nè ditwà dyà mikèmu, nè disumakaja dyà mènù. Udi nè cyà. Kwènà mwà kubwela mu Cimenga aci, wèwè to, bwalu kwènà mulamishe mwaba to. Udi nè cyà kwikala naawù mulamisha, bwà kubwela mu Cimenga aci, mùkaadi Yesù muyè kakulongolwela mwaba kampànda. Vùlukàayi nè, nudi nè cyà kwikala balamishe mwaba, nè civwàlù cyà lupàndu, pambidi. Cyanàànà kwèna ubwela to.

<sup>108</sup> Mu Maatàayi, ndi nè Mufundu kaaba aka. Ndi ntàngila Mufundu, Maatàayi, makùmi àbìdì nè-. . .22.1 too nè ku 14. Ncyèna ne dîbà dyà kucibala to, bwalu dîbà dîkaadi dyènda dipita be. Ndi mwakùle ntàntà mupitèpìte bule, neenù’s. Kàdi vùlukàayi nè, mfùmù wàkatùma bantu ne bàakalongolola didyà dyà dilòlò. Kushipaye ngombe yèndè yònsò, nè-nè kulongololayè bânà bàà ngombe bàà maanyi nè bikwàbò byònsò, ùwwa mulongòlòle didyà dinène dyà dilòlò. Ke kutùmayè bantu, nè kubiikidija bantu bààbùngì bwà kulwabò.

Umwe kwambayè nè: “Èè, udi mumanyè’s, twamb’eku twamb’eku, mèmè ndi wa mu *cikampànda*.” “Nènku ndi nè *cikansanga*.” “Bikèngela bwà nye ku ferme wanyi.” Nè mungà kwenzayè bintu byàbùngì. Nè kutùmaye kàbìdì bantu, nè kubènzèlabò maalu mabì. Ki ndekeelu wa byònsò. . .Aci civwa ndukòngo lwà beena Yuda, bàvwà Yesù wàkula naabò abu. Bàvwà nè cintu kampànda cikwàbò cyà dyenza.

Pashiishe, ndekeelu wa byònsò, kutùmayè díyì nè: “Nènku kwamba. . . Ndàayi. Kanwikadikù ànu. . . Nùbenzèjè ku bukolè bwà kubwelabò ànu cyanàànà. Bwelàayi mu misèèsù nè mu bibeeba, nè myaba yònsò, nè nubenzèjè bwà kubwelabò.” Nènku paanyimà pàà cyôci aci, mumanè kupàngadika nè nzùbu wèndè ùwwa. . .Didyà Dyèndè dyà dibanjì dyà dilòlò divwa nè cyà kwenjiibwa. Mùdi nè cyà kwikala babiikidiibwe muntwamu.

Ki pashiishe kusanganaye muntu muntwamu kayi muvwale civwalu cyà dibanji to. Úvwa muswè kushàala mukwàte ku cinkooci cyà kale aci. Kàdi tàngilàayi cyàkambàye. “Wèwè mulundà wanyì, paanyimà pàà mèmè mumanè kukubiikila ku didyà dyànyì dyà dibanji, kì mèmè kukubiikila nè kukupèèsha dibiiikila bwà kulwa!”

<sup>109</sup> Kàdi panwikalà kacya bayèku ku matungà à ku Mubàndu, kùntùku nkaadi muyiishè misangu yàbúngì, didyà dyà dibanji dyà dilòlòlò adi dïcidi dyènjiibwa ànu mwàdi nè kale. Mubàki awu, bwalu, byònsò abi, úvwa nè babiikidiibwè búngì kampànda bàvwàye nè cyà kwakidila. Pàmwàpa, Mwanèètù Kopp, pàmwàpa ukàadi mucibandile mu Inde mwàmwa. Nwamònu anyì? Bàvwa nè babiikidiibwè búngì kampànda bàvwàye nè cyà kulòmba; twàmba nè neàlombe babiikidiibwè makumi àsatù.

Mpindyewu, mubàki úvwa nè cyà kubàpèèsha mizàbì. Úvwa nè cyà kubàpèèshayì, kì bwà cinyì kùdi muntu kampànda mwimàne ku ciibi aku. Nènku udi ulwa nè kabèjì kèèbè kàà dibiiikila. Údi úkenketa kabèjì kèèbè kàà dibiiikila aku nè úkuvwàdika civwàlu, mùzàbì kampànda. Biinè abu, bàmwè bàà kùdibo mbabanji, nè bàmwè bàà kùdibo mbapèlè, nè bàmwè bàà kùdibo mbashiilàngàne, kàdi bònsò bàvwa bàmwèka bafwànàngàne pàvwàbo balwàte mizàbì ayi. Bàvwa bàmwèka bafwànàngàne.

Nè bìdi bikèngela bwà nwènú bònsò kwikala bafwànàngàne. Kanwàkwikala, kwamba nè: “Mèmè ndi Méthodiste lwà *apa*. Mèmè ndi Presbytérien lwà *apa* nùnkù” to. Kaa, to. Kwàkubwelamù to, cyàkumpàlà. Nwamònu anyì?

Bikèngela úlwilè ku Ciibi. Yesù wàkamba nè: “Mèmè ndi Ciibi cyà cikùmbi cyà mìkòòkò.”

“Mèmè ndi mwena Mpenta. Ndi *cikampànda*. Ndi *cikansanga*.” Aci kaciyèna nè cidici cyàmba to.

Udi ulwa ku Ciibi aci. Nènku wèwè mulwè ku Ciibi aci, udi upeta mùzàbì awu.

<sup>110</sup> Ki muntu ewu, pààkambàye nè: “Mmunyì mùdi mubwelè mwab’ewu, mulundà wanyì?” Nwamònu anyì?

Byàkaleeja nè úvwa mupicile mu mukwàbò mùshindù kampànda, nè mubwelèle ku dididiishì, mubwelèle kunfunfu, kàdi kàyì mupicile ku ciibi to; kì nku Ciibi aci to, mùshindù wàkalwà Yesù awu, ku mulàmbù wà didifila; úfila byèbè byònsò kùdi Nzambì, nè wenda mutàngile ku Kàlvariyò nè mwediibwè Nendè ku nkùrusè. Nè mubiike cyàkàbìdì, bwà kuvwàla civwàlu Cyèndè cyà mulàmbù nè lufù ku bintu byà pa buloba aci.

<sup>111</sup> “Wèwè munange maalu à pa buloba, anyì bintu byà pa buloba, dinanga dyà Nzambì kadyèna nànsha mene munda mwèbè to.” Nwamònu anyì? Pawikalà ucidi ànu nè dinanga dyà maalu à pa buloba, muswè kwenza maalu bu bàà pa

buloba, nè kwenza mùdì bàà pa buloba amu; udi uteeta... udi... Pèèbè, mwikale mu èkèleeziyà, kàdi mwikale mpoopù mu budimi pàmwè nè blé; wèla mbilà pàmwè nè bakwàbò bônso abu, ùsanka pàmwè nè bakwàbò bônso. Mabènesha ònsò à nyumà ànu pambidi pèèbè.

Wèwè udi wamba nè: “Èè, mèmè’s ntu ngàmba cipròfetà.” Ki mwàkenzà Kaayifà. Ki mwàkenza Baalàmà. Aci kacyèna nè bwalu... .

<sup>112</sup> “Mèmè ndi nè dibàtiiza, Nyumà Mwímpè.” Aci kacyèna ànu nè bwalu mu cintu aci to. Aci’s cidi ànu dipà dyà citùpà cìpi bwèbè wèwè.

Dipà dilelèlè mmusùukà wèbè ùdì munda amu, nwamònu’s, wàkalediibwà kùdì Nzambi awu, nè ùdì ùkòntonona cintu cyònsò mu kaabujimà ku Dìyì dyà Nzambi nè diswa dyà Nzambi. Nènku ki mwaba ùdì ukolela ngwòwù awu’s, nwamònu’s, dîbà adi wèwè udi mwànà wa balùme nè wa bakàjì wa Nzambi. Udi mwànà wa Nzambi. Nè bintu ebi, paùdì useemena... . Bu mùdì maamù, mpindyewu udi munda mwà buloba, uteeta bwà kupàtuka. Wèwè udi mwànà wa Nzambi, munkacì mwà kupàtuka, kàdi umòna Dìyì dyàmba nè: “Bìvwa bikèngela bwà mèmè kwenza *cikampànda*. Bìvwa bikèngela bwà mèmè kulediibwa cyàkàbìdì.”

“Èè, mèmè’s ndi wa mu èkèleeziyà.” Aci kacyèna nè cìdici cyùmvwija to. Nwamònu anyi?

“Mèmè ndi Méthodiste; maamù wanyì.” Aci’s ncìmpè bwà mamwèbè.

<sup>113</sup> “Èè, ekèlekèle, mèmè’s ndi mwena Mpenta, s’ndi wa mu cyòci aci.” Wèwè kùyì utwà Dìyì adi mu nyimà to, kùdì cintu cìpampàlámùke. Nwamònu anyi? Dîbà adi, udi umòna’s, tatwèbè mulelèlè kì n’Nzambi to. Nwamònu anyi? Bwalu, aci cyàkabanga bulelèlè mu musùukà wèbè, kumpàlà mene kwà kwikalakù nyumà, kùvwa musùukà wèbè. Musùukà awu wòwò kawùyi mufùmine kùdì Nzambi to, pa dîbà adi kawùvwa mùtòlokù wà Nzambi to, ànu kwìnè kwònsò aku. Udi museeswishìibwe. Udi mu budimi bwà lupèlè ufila bujaadiki bwà maalu à pa buloba à lupèlè lùdì lùpàtuka alu’s. Udi wenza maalu bu bàà pa buloba, unanga maalu à pa buloba, mbwalu dinanga dyà Nzambi kadyèna munda mwèbè nànsha.

<sup>114</sup> Nènku mpindyewu nekwikalè balaaba maanyi bàà mafi mu matùkù à ndekeelu, kì mbaYesù bàà mashimi to. Kabàvwa mwà kutwàla aci to. Kàdi, balaaba maanyi, “bàà mashimi.” Mbalaaba maanyi, èyowà’s, mukalenge, kàdi mbàfwilàkanyì nè Kìlistò. Mbalaaba kùdì Nyumà, bwà kwenza bimanyinu nè maalu à kukèma byàkenzà Kìlistò, kàdi kabààkutwà Dìyì Dyèndè paanyimà to. Nwamònu anyi?

“Bààbùngì nebàlwe Kùndì, mu Ditùkù adi, bàmba nè: ‘Mukalenge, mèmè ewu ncitu mwambeku bipròfetà, nè mwipàte badémòns, mu Dìna Dyèbè anyi?’”

Yèyè ùdi wàmba nè: “Nguumùkìlaayi apa, nwènú benji bàà bubì abu. Kacya ncitukù nànsha munùmányè to.”

“Mèmè mvwa mwena Mpenta, Mukalenge. Butùmbi kùdì Nzambì’s wè! Ngàkeela mbilà. Ngàkaakula mu myakulu. Nè ngàkatentekela babèèdì byanza, nè kubwòndopa, kwipata baadémòns.”

“Nguumùkìlaayi apa, nwènú benji bàà bubì. Kacya ncitukù munùmányè nànsha.”

<sup>115</sup> Nudi búmvwè cìndì muswè kwamba aci anyi? Kaa, nwènú bàna bakesè, nudi nuumvwa dijinga dyà vitàminà dilòlò edi, cintu kampànda aci anyi? Kùdì mubidi kampànda mwindilè dyàmwàmwa. Kùdì mubidi kampànda ùdì mwindilè bwà kwikala mwakidiibwe. Cisàmbà, kanùseeswishii bu to. Kanùseeswishii bu to. Dyabùlù mmuseeswishanganyi. Nànsha mene ci—civwàlù cyà didyà dyà dibanji, udi nè cyà kuCìvwàla. Cìdi nè cyà kwikalakù nànkù.

<sup>116</sup> Mpindyewu tudi ku ìbaamulòlò. Mubidi wà pa buloba awu wùkaadi pabwìpì mpindyewu nè kuingutudiibwa, nènku tudi munkaci mwà kudilongolola bwà kubwela mu wà mu Dyulu. Nènku tudi tumvwa mpindyewu dibùkila dyà pabwàdì, dyà Nzambì, bwà kuya mu Edènà munène ewu. Kàdi kumpàlà kwà twètù kulediibwa kaaba aka, tuumibidi twètù tukesè atu twàkadila bwà cintu kampànda civwà—civwà nè cyà kufidiibwa, cyanààna tuvwa mwà kwikala mwànà wa mateketa mashilàngàne mwab’ewu bu twètù katùyì nànkù to. Nzambì kènà nè mateketa muulu mwàmwa to. Bòbò bàdi, muntu nè muntu, baakaja bilenga bipwàngàne, Mukàjì—musèla ànu menemene mùvwà Mubàki amu, Dìyì dimwenèshiiibwe mu muvù Wàdì. Nzambì enzàku nànkù, dilòlò edi, nwènú bàna, bwà muntu nè muntu yònsò wa kunùdì! Kùdì Dyulu dyà kuyamù. Kùdì ifernò wa kwepuka.

<sup>117</sup> Mpindyewu, bààbùngì beenu mbamanye nè Mukalenge mmumpèèshe bikèènà—kumòna, ku binunu byàbì’s. Cintu citàmbe bunène. . .Mvwa nciinaciina lufù. Kùkaadi bidimu bitwè ku bisàtù nànkù awu, nuvwa bamòne Beena Kilistò bàà Kantu—ku—byanza, *Dyàmwàmwà dyà Rìdò Wa Cikondo*. Ndi mumanyè nè ndi mufwànyine kubènga kuciisha bufuku ebu. Bidi mwà kwenzeka nè ncikaadikù mwà kunùmòna kàbidi mu mwoyi wànyì wà pànu ewu to, kàdi eci ncilelèlè. Ncyèna—ncyèna mumanyè ní ndi mufwànyine kubùkila eci nè ncikèènà—kumòna, anyi nè civwa ncinyì to.

Dìndà kampànda, àbìdì àdì panshi aa, mvwa. . .Mvwa mfùma ku ditabuluka. Mvwa mufùme ku masangisha. Nènku mukàjàànyì ùvwa mulààle mwaba awu, muyè mu tulù. Mèmè

kwamba nè: “Munanga wanyi, udi mutàbàle anyi?” Yéyè ùcivwa ànu mulààle tulù. Ndi mumanye nè bìvwa bikèngela bwà twètù kujuuka, bwà kafila bânà mu tulaasà.

Ki mèmè kwela byanza muulu, mùshindù *ewu*, ki mèmè kwamba nè: “Èè, amba tùng, Bill Branham, udi mumanye nè ukààdi mupite pa bidimu makumi àtaanu anyi? Wèwè, pawikalà muswè kwenza cintu kampànda bwà Mukalenge, mbimpè ùlwijakajè, bwalu kwèna nè dībà dipitepите bungi to.” Mèmè kudyàmbidila nè: “Ekèlekèle, ndi ntèkemena nè ndi mwà kwikala nè mwoyi bwà kumòna Dilwa dyà Mukalenge Yesù.”

Mvwa misangu yònsò ànu ngèela meeji, nè—nè patwàfwà, mvwa mwà kumòna, bu mùdi, mwanèètù wa balùme *ewu*. Ndi mufwànyine kwamba . . . “Èyo, wèwè ewu wàkayiisha mu èkèleeziyà wanyi, dilòòlò kampànda pa buloba, Mwanèètù Branham.” Kàdi, yèyè—yèyè ùdi nyumà, ncivwa mwà kumulabula ku cyanza to, bwalu cyanza cyèndè cìdi pambèlu apu mu lukitá, cibolè, nwamònu’s; nè cyànyì mèmè, pààci. Kale wàwa mvwa nè ciibidilu cyà kwela meeji nàнку.

<sup>118</sup> Kàdi mu dindà adi, dībà, dingàakuumvwa Cintu kampànda cingikila pambidi, ki mèmè kudyàmbidila . . . Pa ciibidilu, ànu bu mùdi cikèenà—kumòna cilwa amu. Ki mèmè kutàngila, nè mèmè—mèmè kutàngila. Mèmè kudyambidila nè: “Ekèlekèle! Ncinyi eci?” Ki mèmè kutàngila, tukùnà tunène, twà diikala dyà màyi à matàmbà. Nè nsongàakàji yivwa yifùmina myaba yònsò, ku binunu makùmi, nè nkàmà yà binunu. Nènku bàvwa bònsò munkaci mwà kulwa, nè nsuki mile mipwèkè paanyimà pààbò, bavwàle nkanzu mitòòke, ku makàsà kutupù, bèèla mbilà, bèèla mikunda nè: “Mwanèètù wa balùme!”

<sup>119</sup> Mèmè—mèmè kudyàmbidila nè: “Mpindyewu, ebu bwalu’s mbwà dikèma.” Mèmè kukùdimuka paanyimà e kutàngila. Ki mèmè wàwa mulààle mwaba awu mene, ki mukàjàànyì wàwa, mulààle mwaba awu pa bulààlù. Ki mèmè nè: “Mpindyewu, udi mumanye mùdi bwalu anyi? Mvwa ngáfù.” Mèmè kwamba nè: “Aci, ki cìdi cyenzèke ncyòci aci. Nkààdi—nkàadi mufwè.” Ki mèmè kwamba nè: “Ndi mufwànyine kwikala mupete dísamwè dyà mwoyi mwimàne, anyi cintu kampànda. Nkàadi mufwè. Ki mubidi wànyì ngwówù awu mulààle.” Mvwa ànu mudyàdije panshì mwaba awu nè byanza bitèèka paanyimà, mùshindù *ewu*, muumàkàne ànu ncyoncyoncyo. Mèmè kudyàmbidila nè: “Kacyèna ntàntà wa mètres àsambòmbò nè mwaba ùmvwà to.” Kàdi’s kì mèmè awu mwaba awu, mutàngile. Mèmè kudyàmbidila nè: “Aci’s . . . Kì mukàjàànyì wàwa. Kùdi, kùdi bintu byònsò. S’mmutèèlù wànyì wàwa mulembeleja pa dikunji dyà bulààlù adi.” Ki mèmè kudyàmbidila nè: “Mmèmè ewu.”

<sup>120</sup> Mèmè kukènzakana cyàkàbidì, nè bakàji aba bàvwa bàlwa bònsò. Nènku bàvwa . . . Mèmè kutàngila, bàlwila luseke *elu*, nènku ki bânà bèètù bàà balùme bàlwalwà aba. Kaa!

Mbashùwashùwàlè. Bònsò bwàbò bàvwa nè mmwènekèlu wa nsongààlùme. Bàvwa bèèla mbilà mikolè nè: “Mwanèètù wa mushinga mukolè!” Kaa, ncìvwa mumanye kwà kwela dìnù nè kwà kwela dikàlà to.

<sup>121</sup> Mémè kudyàmbidila ne: “Ebu bwalu’s mbwà dikèma.” Mémè kutàngila paanyimà, kàdi ncìvwa muntu mukulakaji to. Mvwa nsongà. Mémè kudyàmbidila nè: “Eci’s ncintu cyà pawàci.” Mémè kudyàmbidila nè: “Eci ncikèènà-kumòna anyi?” Nùнку ndisuma mènù ku munu. Ki mémè kudyàmbidila nè: “To. Kí mùshindù wà bikèènà-kumòna bintù mupete to.”

<sup>122</sup> Pashiishe, mwaba awu, Cintu kampànda kubangaci kwakula naanyi lwà kuulu *eku*, cyàmba nè: “Wàbwedi pàmwè nè bàà kwènù.”

Mémè kudyàmbidila nè: “Nè bàà kwètù? Bònsò aba mba-Branhams anyi?”

<sup>123</sup> Yèyè nè: “Mbawàkakùdimwisha mucìma kùdì Kilistò.” Nènku bakàji aba . . .

Nudi bamanyè nè mémè ntu ànu mubadiìbwe misangu yònsò, ànu bu mùtùbo bàmbiikila nè “mukinyi wa bàna bakàji,” kàdi kabyèna nàнку to. Nwamònu anyi? Bwalu, ndi ngèèla meeji. . . Ncyèna—ncyèna—ncyèna muswè beena nsòmbelu wa masandi, bapange bukàlàngà to. Mémè ntu munangè bàna bèètù bàà bakàji balelèlè, bashùwashùwàlè bàà Kilistò. Byòbì mùshindù awu, mbìmpè.

<sup>124</sup> Mvwa nè ndambù wa bibangu pancìvwà mwànà mutekète. Ndi mumanyè bintu byàkenzekà bìvwà byènzè bwà kumvwija mùshindù awu. Kàdi cyònsò cìvwa—cìvwa n’Nzambì, wènza, ùmfwimba bwà dìbà edi. Nwamònu anyi?

<sup>125</sup> Ndi ngèèla meeji nè mwanèètù wa bakàji mulelèlè, mushùwashùwàlè, kakwèna cintu nànsha cìmwè cyà citàmba aci ku bulenga to. Bu Nzambì mwà kupèèsha mulùme cintu kampànda cìmpè kutàmba lupandu, Nùнку’s Ûvwa mufwànyine kumupèèsha mukàji. Nwamònu anyi? Nàнку awu, dìbà adi, bu Yèyè mwà kufila cintu kampànda cyà citàmbe bwìmpè, nùнку’s Yèyè mmucyènzè. Nè pashiishe pa kumòna bàmwè bàà kùdìbo bàkùdimuka kàdi kabàyi nànsha bènza maalu bu mukàji to, bashipa micìpù yà mabàkà àbò, nè baabàybò mwomùmwè. Nudi bavùlùke, nudi baswikìibwe ntàntà yònsò unùcidi nè mwoyi, ewu kùdì mukwèndè. “Cìdì Nzambì úswika pa buloba, nciswikìibwe mu Dyulu kàbìdì.” Nwamònu anyi?

<sup>126</sup> Ki dìbà adi mémè—mémè kucimòna. Ki bakàji aba kulwabò lùbilu bènda bangeela mabòkò kunshìngù, nè bànguupukila, nè bàmbiikila nè: “Mwanèètù!” Mpindyewu, bàvwa bakàji, kàdi kakwèna mwà kwikala mpèkaatù mu mwaba awu to. Nwamònu anyi? Bàvwa mbakàji. Kàdi, nwamònu’s, cìdì citwènzè mpindyewu eci, mukàji mwikàle nè—nè kajilu, kajilu kàà bukàji, nè mulùme mwikàle nè kajilu kàà bulùme, mbwà

kukolesha bânà. Mwàmwa kakààkwikalakù to. Nebiikalè bônso kajilu kàmwè, kàdi nebiikalè ànu mu mmwènekelu awu's. Cimfwànyì cyà pa buloba cìvwàbo naaci pànwapa aci neciikalèku, kàdi kamwàdyàkwikala mpèkaatù to. Nudi bônso mùmwè. Kakwàkwikala kàbidì byà dikolesha bânà kuntwaku to. Nwamònu anyi? Ncyà bushùwà. Byònsò nebiikalè mùshindù awu. Ki mèmè kutàngila, nè bakàjì aba.

<sup>127</sup> Nènku kuntùtumunabo. Bânà bèètù aba kunsòmbeshabò pa mwaba mutùmbùke. Mèmè kwamba nè: “Bwà cinyi nudi mwà kwenza nùnkù?”

Yèyè nè: “Pa buloba wèwè uvwa mulombodi.” Ki yèyè—ki yèyè nè: “Wèwè. . . Bantu aba s'ki cisàmbà.”

<sup>128</sup> Nènku kùvwa mukàjì kampànda wàkajuuka. Yèyè nè: “Mwanèètù wa mushinga mukolè.” Mukàjì mutàmbe bulenga!

Mmwenze ànu ùpità mwaba awu, Dìyì edi kwimanadi, dyaamba nè: “Kwèna umùvùluka anyi?”

Mèmè kwamba nè: “To.”

Yèyè nè: “Wèwè's wàkamulombola kùdì Kilistò pàkaavwàye nè bidimu bisambùke pa makùmì citèemà. Nwamònu anyi? Kwèna mwà kumòna ki bwà cinyi yèyè ùdi wàmba nè ‘mwanèètù wa mushinga mukolè’ anyi?”

Mèmè nè: “Èè, udi—udi uya. . .”

Yèyè nè: “To. Tudi bindile kaaba aka.”

Mèmè nè: “Èè, piikalàbi nè nkàadi musambùke, ndi muswè kumòna Yesù.”

Yèyè nè: “Kwèna mwà kuMumòna mpindyewu to. Eci's ke Mufundu, ùdi mwàmbè nè: ‘Misùukà yidi mwinshì mwà cyoshelu.’ Yèyè ùdi ànu muulu mutùmbùke ndambù. Dìngà ditùkù Yèyè neàpinganè. Netwàlukilè pa buloba. Katwèna tudyà anyi tunwà apa to.”

<sup>129</sup> Mèmè nè: “Udi uswa kwamba nè mèmè mvwa nè bwòwà bwà cyôci eci anyi? Mòna's, eci. . .”

Kakwèna mwàkù nànsha ùmwè bwà kucyàmba to, balundà bàànyì. “Mbipwàngàne,” kì mbifwànyine—kì mbifwànyine kucilenga to, “mbitùmbùke.” Kakwèna mwàkù wà Anglais ùndiku pàànyì mumanyè, kakwèna mwàkù nànsha ùmwè, ùvwa mufwànyine kuumvwija cidici to. Ncipite kule nè kule cyònsò cindiku mumanyè. Ki yèyè awu's. Kakùvwakù ní mmabèèdì, ní ntuninganyinga to. Kùvwa mwà kufwà to. Kùvwa mwà kwenza mpèkaatù to. Cìvwa ànu cipwàngàne, ànu cipwàngàne menemene. Balundà bàànyì, kanwèna nè cyà kucyènza to, kanwèna mwà kucipàngila to. Vùlukàayi.

<sup>130</sup> Nènku pàncìvwà mwànà mutekète wa balùme, ngàkamòna cikèenà-kumòna cyà ifernò, pàncìvwà mwànà mutekète wa balùme. Nènku nudi bamanyè mùdì bainàbànza amu, leelù

ewu's, anyi bakàjì (inābànzà kí mmufwànyinekù kwenza cintu bu nàнку to), bàlaaba bilaabu ku mèsù àbò bu mùdì mbwa wa diitu, anyi cintu kampànda cyà mùshindù awu, nè bintākanyì byà bleu abi mwinshì mwà mèsù àbò. Mémè è kumòna cyòci aci. Mvwa ngènda ntùkina. Bu mwànà mukesè wa balùme, bàvwa bangàsè cingoma, nènku mvwa mulàle, mpùnga nè lufù mu lùpitaadi. Nènku mvwa misangu yònsò mumanyè nè kùvwa ànu Nzambì.

Ndi mvùluka disambila dyà kumpàla dínkaadiku muteete bwà kusambila adi. Cintu cìmwèpelè cìmvwà mufwànyine kwamba...Kacya ncitukù—ncitukù mwànji kwamba bwalu ebu kwònsò eku to. Ndi ndyùmva ànu nè ngàcyàmbaku mpindyewu mene. Bàvwa bangàsè cingoma, mulàale mwaba awu, mpùnga nè lufù mu mpàta. Nè bwakàna bumwèpelè bùmvwàku mufwànyine kuleeja Nzambì, mémè kwamba nè: “Udi mumanyè's, Mukalenge, kacya ncitukù mwanji kwenda masandi to.” Nwamònu anyi? Pàncìvwà mwànà mutekète, nsongàalùme wa bidimu bitwè ku dikùmi nè bitaanu, mémè kuteeta bwà kwikala nè nsòmbelu mujaalàme. Ki mémè kwamba nè: “Ntu mwende lwendu lukezùke.” Nènku ke cyònsò cìmvwàku mufwànyine kwamba ncyòci aci. Ke dikùmbanyina dyònsò dìmvwàku mufwànyine kuMulàmbula ndyòdi adi.

<sup>131</sup> Nènku díbà adi mulàale mwaba awu, díbà adi, pàvwà ngàngàbukà munshiye muyè, nènku mvwa mudyùmvwè ngènda ntùkina mbwela mu mîdimà yà Cyendèlèlèlè, nènku mmuvwàbi bìmwèka nàнку. Mémè kwela papa lubilà nè: “Kaa, papa, nkwaçishèku.” Kamùvwa papa muntwamu nànsha. “Maman, nkwaçishèku.” Kamùvwa maman nànsha. “Nzambì, nkwaçishèku.” Kamùvwa Nzambì muntwamu to. Mùvwa ànu kamùyi ndekeelu to, byènza bwòwà, kaa, byenze bu bilòòtálòòtà's! Ifernò udi wosha, ulàkuka awu mmufwànyine kwikala usànkisha, kupita cyòci aci. Ki ngènda ànu ndishìndamù, mémè kudyàmbidila nè: “Kaa, ekèlekèle!” Misangu nè misangu, ànu nùнку ewu. Mémè kubwela mu mwaba kampànda, mwíshì, nè mîdimà, nè bubèedi. Nènku, kaa, njijà yà mùshindù awu's! Cìvwa ndufù pambidi pàanyi.

Nènku mvwa mwà kumòna bakàjì abu bàbànda batàngile kùndi, biikàle nè mèsù malaaba tùpèntà mùshindù awu. Mpindyewu vùlukàayi nè, aci's nkùkaadi bidimu makùmi ànaayi nè bitaanu, kùkaadi bidimu bitwè ku makùmi ànaayi, mu mîshindù yònsò. Mu diya amu, bàvwa bènda bàya bèza nè: “Wuuh! Wuuh! Wuuh!”

Mémè nè: “Nèngìkalèmu bwà kashidi anyi?”

“Kashidi.”

<sup>132</sup> Mémè nè: “Éyi Nzambì, Wèwè mwà kumpàtulakù mwab'ewu, ncyà—ncyà—ncyàkuKufwà kàbidi bundù to.



Ncyàdyàkufwàku bundù to. Nzambi, bu wèwè mwà kuswà mpèshèku mpùngà.”

Katanci aka anyi, mémè kudyùmvwà ngènda ngààlukila. Nènkù ngàngàbukà úvwà údilakana, bwalu mwoyi wànyì úvwà ànu munkaci mwà kutuuta misangu dikumi nè mwandamutekète ku kasunsa. Mashi ànyì àvwà mazonze mapàtùke wònsò nè byònsò, mvwa mulààle mu mashi àànyì mémè mene. Nènkù mvwa ndikonka nè, dngà ditùkù cintu aci cyàdyàkwenzeka anyi?

<sup>133</sup> Kukaadi bidimu bitwè ku bibìdì, pangààkaya ku Tucson, mvwa nè mukàjàànyì lwà ku J. C. Penney. Mvwa musòmbe mwaba awu mùshindù *ewu*, nènkù nè mutù wànyì mwinyika, mwindile. Bwalu, nudi bamanyè mùdi bwalu's, bainàbànzà bòbò, bàtu bàsakula ntàntà mule. Nènkù mvwa—mvwa musòmbe mwaba awu, mutù wànyì mwinyika mùshindù *ewu*. Nè cikwèpà cìvwa cibànda. Kàdi ki bàmwè bàà ku bakàjì abu bàlwalwà aba, nè cisuba cyà nsuki mikosa ayi, nudi bamanyè's, bu mùdìbò bènzà amu, mùshindù *awu*. Bàbànda nè mèsù àbò àmwèka malaaba tupenta mùshindù awu. Nènkù bàvwa munkaci mwà kwakula ci-Espagnole. Kàdi ki bwalu abu's. Cyòci cyònsò (cikèèná-kumòna) kumwènekaci cyàkàbìdì. Ki cyòci aci nè: “Wuuh! Wuuh!”

<sup>134</sup> Mwanèètù wa balùme, mwanèètù wa bakàjì, lekèlà nkwbambìlèku cintu kampànda. Cìdi mwà kumwèka cyà pabwàcì mpindyewu, kàdi wáfikakù musangu kampànda's. Ncintu cyà dísù dikolè. Kanùlondikù awu njila nànsha.

<sup>135</sup> Mémè, bu muntu mukulakaji, mwambi, mvwa muyiishe pa buloba bujimà, mupete mìlìyò yà balundà, kàdi ndi mumanyè nè nengìikale nè cyà kwimana neenù dyàmwàmwa. Tàpulukààyi nè maalù à pa buloba. Nè kwòkò kwikàle cintu kampànda munda mwèbè, cyùdi ànu muswè kwenza mu mùshindù wùdì wenza awu, wèwè cyà bushùwà mwikàle nè bintu byà pa buloba munda mwèbè, vùlukà nè, wèwè kwèna nànsha wa Nzambi to. Wèwè udi ànu cidimba cyà èkèleeziyà cyanàànà, too nè pìikalà dibìikila adi; ndondo awu, mwikale ùbìikila Ndondo awu. Nwamònu anyi?

<sup>136</sup> Bu mùdì, kumpàlà kwà kwikalakù musààlálà pa mwongo wà mushipa, kùvwà nè cyà kwikala màyi kampànda à wòwù kowelamù, dyàmbedi, kabìyi nànkù to kawùvwakù mwà kwikala nè musààlálà to.

Kumpàlà kwà kwikalaku mucì wà—wà ùtòloka pa buloba, kùvwà nè cyà kwikala buloba, bwà cyanàànà kakùvwà mwà kwikala mucì bwà kukolawù munda mwàbù to. Kakùvwà mwà kwikala kabingilà bwà mucì, nè bwà kwenza bwà wòwù kwikalakù to.

<sup>137</sup> Kumpàlà kwà kwikalakù bufùki, bìdì bikèngela kwikalè Mufùki. “Bàà dyàkalenga ng'aba bàdì nè nzala nè nyòòtà

yà bwakàne.” Nwamònu anyi? Kùdi cintu kampànda munda mwètù. Nuvwa beelè cyanza cyènù muulu katanci aka nè: “Ndi muswè Nzambì wabûngì.” Nwamònu anyi? Kùdi cintu kampànda mu lukèngelu.

Nènku wêwè munange maalu à pa buloba, uya mùshindù awu, bintu byà pa buloba, neùye mu lwendu lwà pa buloba, nè neùdisangàne mu cibulà. Nwamònu anyi? Pàtukàayi. Nudi bàna bàà balùme nè bàà bakàji bàà Mfùmù kampànda, Mfùmù awu. Ikàlà inàbànzà nè muntu mukàlàngà. Endàayi bu beena Kilistò. Ikàlaayi nè nsòmbelu bu beena Kilistò. Enzàayi maalu bu beena Kilistò. Vuùlukàayi nè, nèntwilanganè neenù ku Cibàsà cyà Cilumbulwidi nè mèyi aa. Nwamònu anyi?

<sup>138</sup> Tàngilàayi mu lumwènù lwènù lwà didimwènamù alu, dilòlò edi, nè nùmonè. “Mùshindù kaayi ùndi mulombòdiibwe? Yesù ùdi munkaci mwà kulongolola kaaba bwànyì mèmè, mubidi kampànda anyi? Mubidi awu mmupwàngàne. Mubidi awu wùdi wènda mu mùshindù mupwàngàne. Mmwànà wa balùme anyi mwànà wa bakàji kumpàla kwà Nzambì. Nè mèmè ndi nè bisaamà byà pa kulela munda *emu*, bwà kulediibwa mu mubidi awu amu. Mèmè mucìikàle ànu munangè buloba, bìdi bìndeeja nè (ncyèna) ncyèna nè mubidi kuntwaku to. Ndi ànu cidimba cyà èkèleeziyà cyaanà. Mèmè ncìwwa mùtòlokù wà Nzambì to. To. Yèyè kí n’Taatù wanyì to.”

<sup>139</sup> Yèyè wàkamba nè: “Nwènù kanùyì mwà kutwàla dinyooka to,” ke cinùdi nupeta mpindyewu aci’s, “dìbà adi nudi bàna bàà panshì, kàdi kanùyì bàna bàà Nzambì to.” Kí ncyà bushùwà anyi? [Disangisha didi dyamba nè: “Cyà bushùwà.”—Muf.] Bible udi wamba nànkù anyi? [“Amen.”]

Pawìkalà kùyì mwà kutwàla dinyooka dyà Nzambì to, paùdi umòna Mifùndu yikutèeka mu njila, kàdi wêwè udi wamba nè: “Kaa, ncyèna muswè kuumvwa Bintàkanyì abi to. Ndi—ndi mwena Kilistò. Ndi ngènza . . .” Èyo. Tùngunukàayi. Nwamònu anyi? Ncileeeji cyà bushùwà ànu cimwèpelè cyà nè kwèna mwànà wa Nzambì to.

Kàdi mwànà mulelèlè wa Nzambì ùdi nè nzala nè nyòtòt. Bwà cinyi? Kwòkù Cintu kampànda munda mwà mwoyi wèbè, cìkwambila nè udi naaci dijinga, nè cidi nè dijinga muntwamu, cidi cileeeja Cintu kampànda munkaci mwà kusàka, citeeta kukukòka muntwamu. Kùdi mubidi kuntwaku, ùdi *ewu* nùnkù mwikale cimfwànyì cyà apa. Cyùdi ukwàcila naawù mudimu ncinỳì, bwà kutùmbisha dyabulù nè bàà pa buloba, nè myòdelè nè bikwàbò? Udi mutàngile mu Dyulu, kùdi cintu kampànda kuulu aku, udi utùmbisha Nzambì nè mwoyi wèbè anyi?

*Mu nzùbu wa Taatù wanyì mùdi bisòmbedi byàbùngì: bu kabiyì nànkù to, nùnkù’s ndi munwàmbile. Nènku nènyè nè nkanùlongolwela mwaba.*

. . . nè *kulwa cyàkàbìdì*, bwà *kunwàngata kùndì mèmè mwìnè*; bwà nè *mwaba Ùndì, nwikalapù pèènu*.

140 *Bintu Bìdì Nè Cyà Kwikalakù*. Bintu bidikù mpindyewu ebi, bìdì ànu byà citùpà cìpì, bibiikila bintu bìdì nè cyà kwikalakù.

Tùsambilàayi.

141 Anji elàayi meeji mu ndòndò. Nudikù mwà kwela meeji anyi, nwènu balundà bananga beena Kilisto? Anji elàayi meeji nwelelamù, katanci kakesè cyanààna. Twikalàayi ànu bapùwe menemene bwà katanci kakesè cyanààna. Nyumà Mwimpè adyàkwilè.

Mpindyewu, Mukalenge Yesù mmuntùme kunùdì nwènu beena Mpenta, kùkaadi ntàntà mule. Ki umwe wa ku bānā bēènu bāā balùme nyéyè ewu wākajuuka bwà kwikala mpaasàtā wenù, kwambayè nè: “Mmupātùkile ku mudimu wa bwambi.” Wākamōna Mukalenge Yesù utābeeja mēsù à mpofō; “kwenza,” kwambayè: “nè mitù yà kampōnā yìkèèpele.” Ncìcìdì ànu nè masangisha à dyondopa. Kādi ndi mfika ku dyumvwa nè nkāādìkù musambidile bantu bāābūngi bāvwa bāsaama bikolè be. Bāākondopiibwa. Mukalenge wākandamuna disambila, nè wākondopa babèèdì. Kādi, nudi bamanyè’s, bāmwè bāā ku bantu, bāākondopiibwa abu, bākaadi bamanè kufwā. Nènkū nānsa wèwè usaama munyi, pawikalā mwondōpiibwe, neufwe, nānsa bishi.

Kādi musùkà awu, mwanèètù wa balùme wa mushinga mukolè, musùkà awu, mwanèètù wa bakājì wa mushinga mukolè, kwènaku muswè kwela meeji pa bwalu abu mpindyewu anyi? Aci ncyā Cyendèlèlè. Dinanga dyā Nzambi adi dyōdì kadiyimù to, kākwenā cintu nānsa cimwè cikōka to, kwènaku muswè kulōmba Nzambi nè: “Éyi Nzambi wa yāāyā, ngenzùlùlā, mupyamùpyā, dilòlò edi. Ndi mukunangè, Mukalenge. Ndi muswè bwā Nkunangè. Nè cintu kampānda munda mwā mwoyi wānyì cidì cingambila nè ndi nè cyā kusōmbela pabwìpì Neebè. Ndi muswè kulwa, mpindyewu mene, Mukalenge, nè kwenza nānkū?” Pìikalābì nè muntu awu anyi bantu abu bādi mu nzùbu emu anyi pambèlu pāā nzùbu ewu, ndi nnùlōmba, bu musadidi wa Kilistò, mu Dīnā dyā Yesù Kilistò, udikù ànu, nè mutù wèbè mwinyika, mwā kwela cyanza muulu kùdì Nzambi wāmbè nūnkū ewu nè: “Nzambì, nkòkà pabwìpì menemene, pabwìpì menemene, Nzambì munanga. Ndi muswè kulōnda cintu cyōnsò cyùdì Wèwè naacì mu Dīyì Dyèbè ànyì”? Elāayi byanza byènu muulu. Mpindyewu ikālaayi ànu nè meeji matòoke à menemene. Anji elāayibì ànu meeji.

142 Mpindyewu, bādi bāmba nè: “Kaa, mèmè’s nkāādi mwenzè *cikampānda*. Mèmè, nkāādi mwelè mbilā, mu Nyumā. Nkāādi mwakùle mu myakulu. Kādi, tāngilāayi, kùdì cintu kampānda cidì cipangike mu nsōmbelu wanyì. Ndi ntāngila mu lumwènu lwā Dīyì dyā Nzambi, ndi mumanyè nè kùdì cintu kampānda.

Ntu nya mu èkèleeziyà, kàdi ncyèna cìvwà cikèngelà bwà mèmè kwikala to.” Nwamònu anyi? Aci cìdi cìleeja nè, kùdi cintu kampànda.

Mpindyewu, bu wèwè mwà kuditàngila wèwè mwìnè nè kumòna nè kwèna mu bulongàme nè DÛyì dyà Nzambì to, nè kakwènakù cintu nànsha cìmwè muntwamu cyàkufikishà ku dyela cianza muulu to, dîbà adi udi umanya nè kùdi cintu cipampàlamùke. Wèwè udi naaci. Kùdi . . . Määmù ùwva nè ciibidilu cyà kwamba nè: “Kwèna mwà kupeta mashi mu tuunèpà to, bwalu kamwèna mashi to.” Nwamònu anyi? Elàngànaayipu meeji, nwelelamu menemene. Eci ncifwànyine kwikala webè mpungà wa ndekeelu. Byanza makumi àsàtù, anyi makumi ànaayi mbyela muulu, kasumbù kakesè aka, nànsha mene kùdi balombodi bàà èkèleeziyà.

<sup>143</sup> Ikàlaayi ànu nè kaneemu kààbùngì menemene ànu bwà katanci cyanààna. Mpindyewu elàayi meeji malulàme menemene. “Nzambì munanga, ndi mwà kushipiibwa, dilòòlò edi, mu njìwù. Ndi mwà kufwà mu dîsaamà dyà mwoyi. Dimwè dyà ku maadindà aa, ndi mwà kubìikila ngàngabukà, nè kulwayè, nè dituuta dyànyì dyà mwoyi adi diikale dituuta dimwènekela pamutù pàà dibòko dyànyì dyà mutèèlu; ndi muyè. Mèmè munkaci mwà kushindikila ditàma dyànyì ku misàmu, nbiikila nè: ‘Éyì Nzambì! Éyì Nzambì! Éyì Nzambì!’” Nwamònu anyi? Mwoyi awu ùdi munkaci mwà kutuuta dituuta dyàwù dyà ndekeelu. Wèwè udi wenda ulwa ku Ciibi cinène aci. Kwàkupàtukakù paùdi kùyì mulediibwè cyàkàbìdi ku Nyumà wa Nzambì to. Kwàkupàtukakù to amba ànu kwikàle cintu kampànda munda mwèbè amu, paanyimà pàà wèwè mumanè kulediibwa ku Nyumà wa Nzambì, mwikàle nè nzala nè nyòtá yà kuya nè Nzambì. Cìdi nè cyà kwikala nànkù. Nwamònu anyi? Wèwè udi mwánà mu buloba, munda mwà buloba, mucikàle ànu mwindile bwà kulediibwa mu Bukalenge bwà Nzambì, kùdiYe muyè bwà kanùlongolwela mubidi mukwàbò, awu’s mmubidi mupwàngàne.

Mpindyewu elàngànaayi meeji mu ndòndò menemene, nè túsambilàayi pàmwè.

<sup>144</sup> Nzambì munanga, ànu mùndì mumanyè nè eci ncifùndiibwe mu mabèji à Mukàndà ewu, Cibungu cinène’s! Tudi nè dikùtakana mu maalu à mamanya, Mukalenge, bùngì bukùmbàne bwà kutùtabuluja, ku malelèlà bwà kumanya nè dinyungakana dyònsò ditùdi twenza dìdi dinyùnguluka ànu kunyùnguluka pa buloba bujimà, pa dîbà dimwèdimwè ditùdi tudyènzà adi. Tudi babipetèle ku ntèlèviziyò. Tudi bamanye bushùwà, Taatù, ne tèlèviziyò awu kàtu ùkwatakaja cimfwànyì to, ùdi ànu ùludika mu tujila di—dinyungakana bwà kubweladi mu kalubungu kàdi kènza cimfwànyì. Nànsha diikala mene dyà bilàmbà bitùdi bavwàle ebi, dìdi dileejikila mu nkwaaka yà ether yà lupeepèlè, dinyungakana adi pa buloba bujimà. Dîbà

adi mmunyi mùdi bânà bèètù bàà bakàji bavwàla bilàmbà abi, bènza maalu mùshindù awu, kabàyi nànsha nè nzala; kwisù kulaaba bilaabu, nsukì mikòsa?

Bambi bàdi bafwànyine kuya ku tèlòjì, ku sèminère kampànda nè: “Nè kwangata bintu byà ku díyi dyà muntu, bìdi byènza, ku bilèlè byàbò abi, bìdi byènza nè mèyi matùma à Nzambi kaàciyi nè bwenzeji pa bantu to, ku bilele byàbò,” bàmba nè bivwa bikèngela kwikalabò bàà mu èkèleeziya, nè ki cyònsò cìdiku ncyòci aci.

Éyi Nzambi, mbamanyèku nè díyi dyònsò ditùdi twamba, mbijaadikiibwe ku maalu à mamanya ne, ndikwàta pa mukàbà wà mèyi anyi? Nènku bìdi bibanga patùdi tubanga kwikala nè mwoyi mu buloba ebu. Bidi bìjika patùdi tufwà, nè mmùtèkiibwe mu album wa Nzambi, bwà kuwèlùlula cyàkàbìdi ku Cilumbulwidi.

Mmunyi mutwàpàndukà ku cyòci aci, ku dipiishiibwa dyà kùdi Nzambi, piikalàbi nè cintu cìvwà citòòkèshiibwe tòò kumpàla kwètù kàdi nànsha nàнку twètù kuCidyombola?

Éyi Nzambi munanga, Mèyi aa kaènakù mwà kufwà to. Àdi ànu àtùngunuka nè kuya. Mukàbà wà mèyi ùdibo bakwàta awu newèdiibwè mu Ditùkù dyà Cilumbulwidi. Wèwè wamònu byanza bìdi byela muulu abi, Taatù. Nebiikalèku ànu mwaba awu mene ku Ditùkù dyà Cilumbulwidi. Kàbìdi, cìvwà mwoyi wàbò munkaci mwà kwela meeji aci, neciikalèku ku Ditùkù dyà Cilumbulwidi.

<sup>145</sup> Mpindyewu, Taatù Nzambi, ndi nKulòmba, mémè bu musadidi Webè, ndi ndòmba bwà Wèwè kuumusha bubì bwònsò kùdi cisàmbà Cyèbè. *Bubi*: ncintu kampànda citùdi bamanyè nè bivwa bikèngela twètù kwenza, kàdi katùyi tucyènza to. Davidi wàkamba nè: “Mémè mwimite bubì mu mwoyi wànyì, Nzambi kaàkwàndamuna masambila àànyì to.” Ndi ndòmba, Nzambi, bwà Wèwè kwangata bubì bwètù, bwalu Díyi didi lumwènù Lwèbè lùdi lùtùleejà mutùdi tupangila kwikala bânà bàà balùme nè bàà bakàji bàà Mfùmù. Taatù, ndi ndòmba bwà Úcyènzè, dilòlò edì.

<sup>146</sup> Nè kwenza aci cyoshelu, bwalu cyoshelu ncyùle tètè nè bantu be. Ne kwenza cyoshelu aci, mwaba awu mu nkwasà mùdìbo basòmbèle amu, kuvwija myoyi yàbò ayi cyoshelu. Buloba bùumukèku kùdi mwanèètù yònsò wa balùme, mwanèètù wa bakàji udi kaaba aka ewu. Nènku kaacivuba kakesè kàà Mwoyi aku, mutòlokù wà Nzambi ùtùvwà bafùme ku dyakula awu, cyambiibwà cìvwà cifùmìne kùdi Nzambi aci, nè cimwènèshiibwe pànwapa bwà kupa Nzambi luumù nè kumutùmbisha. Nzambi, umùshà buloba ku cyòci aci.

<sup>147</sup> Bakwàbò abu, ncyèna mwà kusambila to, Mukalenge, bwalu “bubèèdi abu mbwà lufù,” nè kakwèna cintu nànsha cimwè muntwamu, cìdi cibàfikisha ku dinyunga to. Kàdi aba bàdi

mwà kunyunga, nè kumanya ne mbibi, kukezùla myoyi yàbò nè misùukà yàbò, dilòòlò edi, Taatù. Nènku biikaleku bùle tèntè nè Nyumà Webè, bèndelè mu Bukênkè Bwèbè.

<sup>148</sup> Bèleshàku mpaasàtà munanga, wa citende, wa mubidi tumatuma, wa mmwènekèlu wa dikàndà ewu, Mukalenge. Nsongààlùmè wa citende ewu, ùvwa mwenzèjìibwe, mwàkambaye, ku ciwàye muKumòne mwenzè aci. Nsongààlùmè wa maalu malenga ewu, Éyi Nzambi, làkulàku musùukà wèndè nè kapyà. Enzàku nàнку, Mukalenge. Swàku bwà ikalèku mulami mulelèlà wa mìkòòkò, byà kashèndèndè, dībà dyònsò, bwà kudìisha cisumbù cyà mìkòòkò cidi Nyumà Mwimpè mumuvwijè mutàngidipù eci. Enzàku nàнку, Mukalenge. Swàku bwà kàyì ní nku dyàbalùme anyi ku dyàbàkàjì to, kàyìku kulonda twitabàyi nànsha umwe to, cintu nànsha cimwè to ànu Diyì dyà Nzambi didi kadiyi disambakaja didi difùmina mukana mwèndè, nè ànu Dyòdi nkàayadi. Mubènèshèku, Nzambi, yèyè nè bananga bèndè, nè èkèleeziyà wèndè mukèsè ewu. Ikàlàku naabò bònsò, Taatù.

<sup>149</sup> Nyèwù ndàmbula cyòci eci Kùdi, Taatù. Dimiinu ndikùnyìibwe. Dimatèku pa dimiinu divwà dilongolwela Mwoyi adi, nè dikoleshè beena Kilistò banène, bàà dikàndà bwà disangisha edi, nè mu masangisha makwàbò mùdibo bafùmine. Enzàku nàнку, Mukalenge. Ndi ngàlàmbula Kùdi, mu Dìna dyà Yesù Kilistò, Mwànà wa Nzambi.

Nènku, Taatù: “Wàkatàpiibwa mpùtà bwà kushipa kwètù kwà mikenji, muzaajìibwe bwà bubì bwètù; dinyooka dyà ditalala dyètù dyàkaponà pambidi Pèndè; nè ku mibùndàbùndà Yèndè twàkondopiibwa.”

<sup>150</sup> Ngàmònu kubwela ku ciibi eku, mu katanci kakesè emu, mukàjì kampànda mukwàte nè byà luse mubìndùlùke. Nènku, Éyi Nzambi, mu dikù dyèndè sungasunga, mbintu binène kaayi bìvwà byenjìibwamù, nè mùshindù mene Údi mudìmwènèshe Wèwè mwinè's wè! Ndi ndòmba, Nzambi, bwà mukàjì awu. Umùsha maalu ònsò mapitè kale, à mu nsòmbelu awu, Mukalenge, nè ùmwondòpeku dilòòlò edi. Udikù mwà kumwondopa anyi, Mukalenge? Mwangàtaaku kùdi Wèwè.

<sup>151</sup> Udi mucimòne's, bânà bakesè mbasòmbe kaaba aka, Mukalenge, biikàle dijinga nè dyondopiibwa, bakwàbò. Ndi ndòmba bwà Ùbòndòpèku, Taatù. Enzàku nàнку. Bukolè Bwèbè bunène bwà dyondopa bùlwekù nè bùtwòndòpè, musùukà nè mubidi.

<sup>152</sup> Nènku mpindyewu, bwènù nwènù mpindyewu bàdi mu èkèleeziyà emu, anyi pambèlu, bàdi dijinga nè dyondopiibwa abu, Ndi muswè wèlè cyanza cyèbè muulu, wamba nè: “Ndi dijinga nè dyondopiibwa, Mwanèètù Branham.” Mbimwèke ànu bu nè bantu bònsò bàdi bàjinga dyondopa. Éyo. Nudi nwitabuuja nè mèmè ndi musadidi wa Kilistò anyi? Ambàayi nè:

“Amen.” [Disangisha didi dyàmba nè: “Amen.”—Muf.] Nènku, ndi muswè nütentekelanganè byanza muntu nè mukwèndè. Tentèkèlàngànaayi ànu byanza muntu nè mukwèndè. Nudi bèle byanza byènù muulu, bàdì munda anyi pambèlu, nwèdì byanza muulu nè, nudi beena kwitabuuja mu Nzambì.

Yesù Kilistò mmwambè, mu mudimu Wèndè wà ndekeelu mutùma naawù Èkèleeziyà ne: “Ndaayi pa buloba bujimà, nùkayiishe Èvànjeeliyò kùdì cifùkùibwà cyònsò. Ewu udi witabuuja... Ewu udi witabuuja nè ùbatiijiibwa neàsungidiibwè. Ewu udi kàyi wìtabuuja neàpiishiibwè. Nè bimanyinu ebi nebìfilè aba bàdì biitabuuja; mu Dìna Dyànyì bóbò nebiipaté baadémons; nebaàkulè mu myakulu mipyamìpyà; bóbò bakwàte nyòka nè byanza anyi banwè bintu bìdì bishebeyangana, kabyàkubènzela bwalu to; kàdi, nènku bóbò batentèkèle babèèdì byanza, babèèdì nebàsangalè.” Mpindyewu, Yesù ngwákamba nàнку awu. Vùlukaàyi nè, Yèyè ngudi mwambè nàнку. Aci cìdì nè cyà kwikala nàнку’s. Yèyè kàvwaku mufwànyine kwikala mwambe aci to bu kakùyìkù muntu mufwànyine kukwàta Dìyi adi to.

Ànu mùvwà matrice à Màriyà mwà kukwàta mùtòlokù awu nè: “Virgò neimìtè difù.” Ànu mùdì dibwè dyà ngaji mwà kwikala difùkùibwe, mucì wà lusànga pa kakùnà kampànda, Dìyi Dyèndè ndyàkacyenzà.

Dìyi Dyèndè didi mwà kubwela mu mwoyi wèbè mpindyewu mene. “Ndi mwena kwitabuuja, Mukalenge. Muntu mulùme anyi mukàji ùndì mutentèkèle byanza ewu, ùdì ùsaama. Ncyèna munkaci mwà kudisambidila mémè mwinè to. Bwalu, yèyè ùdì munkaci mwà kunsambidila. Ndi nsambidila mukàji awu, anyi nsambidila mulùme awu. Nènku, Èyi Nzambì, ondòpèku mulùme ewu, ondòpèku mukàji ewu. Nè mémè ndi mwena kwitabuuja, nè mpindyewu tudi badisangishe. Tudi tufùmina ànu ku diyiila nè tuvwa nè Kilistò pàvwàYe wènda pa buloba, bwalu tudi citùpà cyà Dìyi Dyèndè. Twakakènga Nèndè. Twakazonza mashi Nèndè. Twakafwà Nèndè. Tuvwa bajiikiibwe Nèndè. Tudi babiishiibwe Nèndè ku lufù, nè tudi basòmbe pàmwè mu myaba yà mu Dyulu mu Kilistò Yesù. Mfùmù munène mmusòmbe kaaba aka munkaci mwètù emu, nè mémè ndi mwànà wa balùme anyi mwànà wa bakàji wa Mfùmù ewu. Nènku ndi nè cyanza cyànyì citentekela mwànà wa balùme anyi mwànà wa bakàji wa Mfùmù awu, udi munkaci mwà kunsambidila, nè mémè ndi munkaci mwà kumusambidila. Mpindyewu, Mukalenge, andàmùnàku disambila dyànyì, nè ondòpàku mwànà wa balùme wa Nzambì ewu anyi mwànà wa bakàji wa Nzambì ewu.”

Bònsò cyàpàmwè, tùsambilàayi mpindyewu bwà muntu nè mukwèndè.

153 Mukalenge Yesù, tudi tulwa nè didipwekesha dyònsò, biikàle

tutonda bilèmà byètù. Tudi tulwa, biikàle tutonda nè tudi bakùmbànyine mabèèdi nè lufù, ne tunyinyanya, kàdi tudi twitaba difuta Dyèbè dyà cibawu bwà mpèkaatù yètù nè bwà mabèèdi ètù. Nènku, dilòòlò edi, bânà bàà balùmè nè bàà bakàji bàà Nzambi aba, basòmbe kaaba aka, mbàtèèlejè dilongolodiibwa dyà kùdi Diyì, nè beelè byanza byàbò muulu, nè bajinga lwendu lwà sheemàsheemà. Bàdi bàtentekelangana byanza muntu nè mukwèndè mpindyewu bwalu mbiitábùùje nè Diyì Dyèbè ndilelèlà. Bàdi biitabuujà nè tudi mpindyewu babiishùibwe ku lufù pàmwè nè Kilstò, basòmbe Nèndè mu myaba yà mu Dyulu. Bàdi nè byanza byàbò bitentekelangana muntu nè mukwèndè, bàsambidilangana muntu nè mukwèndè.

Wèwè wákamba nè: “Disambila dyà diitabuujà nedisungilè mubèèdi, nè Nzambi neàmujjuule panshi; nè yèyè mwenzè mpèkaatù kampànda, nebàmufwilèyi luse. Biikàle nutondelangana bilèmà byènù muntu nè mukwèndè, nùsambidilanganàayi muntu nè mukwèndè, bwà nwamòna mwà kwondopiibwa. Bwalu disambila dyà bwenzeji dyà kapyà dyà mwakàne didi nè mushinga wàbùngi.” Éyi Nzambi wa Cyendèlèlèlè, tèèlejàaku disambila dyà basadidi Bèèbè.

Nènku mpindyewu, bàakafùnda kàbidi nè: “Piikalà bantu, bàdi bàbiikidiibwà ku Dìna Dyànyì, bóbò badikúngwije pàmwè, nè basambile; díbà adi Nèntèèlejè mu Dyulu.” Éyi Nzambi, tèèlejilàaku disambila dyà bânà Bèèbè dilòòlò edi, mu Dyulu amu. Pwekèshaaku Nyumà Mwimpè pa batèèleji aba, bu cipeepèlè cikolè cyà civuma. Nènku tudi tulwa nè bantu aba kumpàlà kwà Nzambi.

<sup>154</sup> Sàtaanà, udi mucimùnyìibwe. Wèwè udi cintu cicimùnyìibwe. Yesù Kilstò wàkakucimuna ku Kàlvariyò. Kwèna nè bukolè to. Udi mwena mukaaka. Tudi tukwela kadyòmbò dilòòlò edi. Mu Dìna dyà Yesù Kilstò, pàtukàayi mu bantu aba, nwènù mabèèdi nè màsaamà. Nènku bàye, badishikàmìne, mu Dìna dyà Yesù Kilstò, Mwànà wa Nzambi.

<sup>155</sup> Àlèluuyàh! Ndi ngùmvwà butùmbi bwà Nzambi's wè! Ndi ngùmvwà disambila dyènù dyandàmùnyìibwe. Udi witabuujà nè Nzambi wàndàmùnù muntu udi musòmbe ku luseke lwèbè awu anyi? Mbanganyi bàdi biitabuujà nànkù? Elàayi byanza byènù muulu. [Disangisha didi dicyònkómoka—Muf.] Ki bwalu mbwòbù abu's. Kaa, bilenga be!

Ndi muMunange, ndi . . .

Nè byanza byènù byela muulu mpindyewu, Mwimbilawù, nè mwoyi wènù wònsò.

Bwalu Yèyè wakannanga kumpàla . . .

Nudi nwambilamù, nè mwoyi wènù wònsò mpindyewu anyi?

<sup>156</sup> Mbanganyi bàà kunùdi bàdiku badyùmfwè nè Nzambi wànùfwidi luse ku mibi yènù, bintu binùdi bènze? “Nè kubangila



ànu dilòòlò edi, Éyì Mwànà wa mùkòòkò wà Nzambì, ndi ndaya bwà kwenda lwenda lululàme. Nèngendè bwà luumù lwà Dìná dìndì mubìkidiibwe edi, mwena Kìlistò, mwoyi mufwànàngàne nè wà Kìlistò. Nèngélè byanza byànyì muulu, Nzambì. Ndi ndilambulula cyàkàbìdì kùdì Wèwè, dilòòlò edi. Nèngèndelè mu Bukènkè.” Amen.

Netwèndelè mu Bukènkè, Bukènkè bulenga be,  
Bùlwa mwaba wùdì mamata à lumuma à luse  
àbàlakana;

Kenkèshàku mu nyùngulukilu wetù mwònsò,  
muunyà nè butùku,  
Yesù, Bukènkè bwà bàà pa buloba.

Netwèndelè mu Bukènkè, M'Bukènkè bulenga  
be,

Bùdì bùlwa mwaba wùdì mamata  
à lumuma . . . (KùdìYe muyè bwà  
kutùlongolwela mwaba.)

Kenkèshàku mu nyùngulukilu wetù mwònsò,  
muunyà nè butùku,  
Yesù, Bukènkè bwà bàà pa buloba.

Lwáyì, nwénù bansantu bònsò bàà Bukènkè  
kòbolààyi,

Yesù, Bukènkè bwà bàà pa buloba;

Bulelèlè nè luse mu Dìná Dyèndè,

Yesù, Bukènkè bwà bàà pa buloba. (Netwènzè  
cinyì díbà adi?)

Netwèndelè mu Bukènkè, Bukènkè bulenga be,  
Bùlwa mwaba wùdì mamata à lumuma à luse  
àbàlakana;

Kenkèshàku mu nyùngulukilu wetù mwònsò,  
muunyà nè butùku,  
Yesù, Bukènkè bwà bàà pa buloba.

Kaa, kanwènaayikù nudyùmwa bakezùdìibwe bònsò,  
badyùmvwè bímpè anyì? Kaa, ekèlekèle! Tùlabulanganaàyi ku  
cyanza, patùdì twimba cyàkàbìdì apa.

Netwèndelè mu Bukènkè, Bukènkè bulenga be,  
Bùlwa mwaba wùdì . . . (Nzambì àkubènèshè,  
mwanèètù wa balùme.) . . . à luse àdì  
àbàlakana;

Kenkèshàku mu nyùngulukilu wetù mwònsò,  
muunyà nè butùku,  
Yesù, Bukènkè bwà bàà pa buloba.

Tùbwitààyi ànu kwìsù cyanààna nè tuwĩmbilaayi mu  
matàma. [Mwanèètù Branham ùdì wĩmbila mu matàma *Yesù,  
Bukènkè Bwà Buloba*—Muf.] Netwènzè maalù bu bàna. Tudi  
bàna.

Kaa, m'Bukênkè bulenga be,  
 Nè Bùdi bùlwa mwaba wùdi mamata à  
 lumuma à luse àbàlakana;  
 Kaa, kenkèshàku mu nyùngulukilu wetù  
 mwònsò, muunya nè butùku,  
 Yesù, Bukênkè bwà bàà pa buloba.

Kanwènaayikù baMunangè anyi? [Disangisha didi dyàmba nè: "Amen."—Muf.]

Diitabuuja dyànyì nditàngile Kùdi,  
 Wèwè Mwànà wa mùkòòkò wa ku Kàlvaryò,

Bwítàayi ànu mèsù ènù nùvwimbàayi. Kuukwilaayi mu Nyumà.

Musungidi wa kùdi Nzambi;  
 Mpindyewu ngumvwilèku pàndi nsambila apa,  
 Umùshàku mpèkaatù yànyì yònsò,  
 Kaa enzaku bwà kuumukila ku leelù ewu  
 Mémè yònsò ngiikalè ànu Webè!

Pàndi ngendela mu nyongolo wa mîdimà apa,  
 Ne pàdi lutàtù lùpaasalala lunnyùngulukila,  
 Kaa, Wèwè ikàlà Mulombodi wanyi;  
 Tùminà mîdimà díyì bwà yàndamukè muunya,  
 Kùpulà bwôwà bwà tunyinganyinga,  
 Kundekediku mpàmbuka  
 Nya kule nè luseke Lwèbè nànsha.

<sup>157</sup> Kaa, ekèlekèlè! Ndi mumanyè nè mémè ndi ànu muntu wa cyena kale. Ndi muswè. . . Ndi ngèèla meeji nè aci ncipite ditentula dyònsò dipyadiyà, dikòsolola, dyà bàtàfunya maja, dyà bìdùndadùnda adi, ntàntà mùliyò wà kilòmèètà. Beedi bàà kale bàà tusàlà bààkafùnda misambu ayi abu, Nyumà Mwímpè kulengaYè kasàlà aku, kubangabo kufùnda. Kaa, ekèlekèlè! Ndi ngèèla meeji kùdi Eddie Perronet nè bònsò; banène abu! Fanny Crosby: "Kùmpìcikù to, Éyì Musungidi mupòle, umvwàku lubila lwànyì lwà didipwekesha naalu."

<sup>158</sup> Musangu kampànda bàvwa bàteeta kumwenzeja. Yèyè kàvwa—kàvwa mwènzè maalu bu mwena Mpenta ewu Elvis Presley to, bwà kusumbisha makenji èndè à bwanààbutè ku musùmba wà ma-Cadillacs. Yèyè. . . Bààkalwa kùdiye nè bàjinga bwà yèyè kufùnda—kufùnda misambu yà pa buloba. Yèyè nè: "Ncyèna mufwànyine kucyènza to, nànsha kakesè."

Yèyè nè: "Mòna's, wèwè's udi mpofo. Pawàfika mu Dyulu, nèMumanyè munyi?"

Kukùdimukayè, disonsodiibwa kumwambula, ki kwambayè nè:

NèmMumanyè, nèmMumanyè,  
 Nè mupikùdiibwe ku luseke Lwèndè mémè  
 nèngìmanè;

NêmMumanyè, Nêmmanyè (Munyi?)

Ku bibangu byà misonso mu Byèndè...

(Mu ngakwilù mukwàbò nè: “Mémè ncíyì muMumòne to, nêngǔmvwè cyanza Cyèndè.”)

NêmMumanyè, nêmMumanyè,

Nè mupikùdìibwe ku luseke Lwèndè mémè  
nêngiimanè;

NêmMumanyè, nêmMumanyè

Ku bibangu byà misonso mu cyanza Cyèndè.

159 Kacyènakù cinùfikisha ku diMunanga anyi? Wákaya bwà kutùlongolwela mwaba’s! “Nènku Mémè muye kalongolola mwaba, Nèngààlukilè cyàkàbìdì, bwà kunwangata kùNdi Mémè mwine.”

160 Bânà bakesè bàdì mu kudinyènga mpindyewu, tumikilàayi mèyi matùma à Nzambi. Nènku mpaasàtà, mwab’ewu, piikalà nànsha umwe wa kunùdì kàyì mubàtìijìbwe to, màyi neikalè malongolola. Nè—nè buumambàlà bwà èkèleeziyà, anyi cyònsò cyùdì muswè kwenza aci, anyi ní ncinyi cyònsò, wèwè udi ucyènzà. Wèwè kùyì nè dibàtiiza to, dyà Nyumà Mwimpè, edi ndilòòlò dyà kuMwàkidila. Kanwènaayikù nwitabuujà nànkù anyi? [Disangisha didi dyàmba nè: “Amen.”—Muf.]

161 “Kaa,” mùdì wamba, “Mwanèètù Branham, díbà dyäpici. Ukààdì mumanè kuyiisha ntàntà mupitèpìte bule.”

Pòlò wàkayiisha bufùkù bujimà, dilòòlò kampànda, Mukenji wa mùshindù wùm>wè>wùm>wè ewu. Nè mwànà mukèsè... Nsongààlùmè kampànda kukùlukayè ku cimanu nè kufwàye. Nènku Pòlò, mulaaba nè Mukenji wa mùshindù wùm>wè>wùm>wè awu, wàkalàadika mubidi wèndè pambidi pèndè, ke mwoyi kwalukilawu cyàkàbìdì munda mwèndè. Yèyè’s ùcìdì ànu “Yèsù Kilistò umweumwe awu makèèlèlè, leelù too nè kashidi.”

Kanwènaayikù baMunangè anyi? [Disangisha didi dyàmba nè: “Amen.”—Muf.] Tùyaayaaku, cyàkàbìdì, nè byanza byètù byela muulu nè: “Ndi muMunange. Ndi muMunange.”

Mwimbi wa cisanji cyà pyànò ùdi penyi? Mwaba awu, bu wèwè mwà kuswà, mwanèètù wa bakàji, nànsha yèyè nganyi. Tùpèèshèkù cyonà cikesè aci, bu wèwè mwà kuswà.

Mbanganyi bàdì baMunangè? Elà ànu cyanza muulu cyanààna. Ambà nè: “Ndi muMunangè cyà bushùwà. Ndi ànu muMunangè, nè—nè mwoyi wànyì wònsò. Ndi muMunangè.”

162 Mpindyewu tùwìmbàayi ànu cyanààna, bwà butùmbì bwà Nzambi. Mpindyewu, nè mèsù ètù mabwita, byanza byètù byela muulu mu Dyulu nè: “Ndi muMunangè. Ndi muMunangè.” Tudi tukuukwila. Paùdì uyiisha, nè ukòsa, nè usùsulula, nè upulumuna mùshindù awu, ebu’s mbwanga bùdì Nzambi upùùdijamù, bùdì ànu bwòndopa. “Kùdì Bwanga mu Gilàdà,

bwà musùùkà.” Tùwĩmbààyaaku mpindyewu. Tùpèèshèku cyonà.

Ndi muMunangè, ndi muMunangè  
Bwalu Yèyè wàkannanga kumpàlà  
Nè wàkampetela lupàndu  
Ku mucì wà Kàlvariyò.

<sup>163</sup> Nènkù bu... “Ku eci bantu bònso nebàmanyè nè nudi bayiidi Bàànyì, panùdì nè dinanga, muntu nè mukwèndè.” Ncyà bushùwà. Patwikalà katùyì mwà kunangangana muntu nè mukwèndè utùdì tumòna nè mèsù, mmunyi mutwànanagà Nzambi utùdì katùyì mwà kumòna?

Ndi muMunange,

<sup>164</sup> [Mwanèètù Branham ùdi wàkula nè mwanèètù kampànda pa cibùmbà cyà ku cyambilu—Muf.] Nzambi ànùbènèshè. [Mwanèètù wa balùme awu ùdi wàmba nè: “Bu mùdibi nè dilòlò edi nduumù lulelèlè lwà mu Dyulu.”] Twasàkidila, mwanèètù. [“Mbilenga byà dikèma menemene.”] Mpindyewu, ngèèla meeji nè èkèleeziyà, muntu nè muntu, mmukolèshùbwa. Kí mmwômò anyi? [“Èyo. Cyà bushùwà.”] Nzambi àkubènèshè, Mwanèètù Boone. Nènkwalùjilè disangisha. Nzambi àkubènèshè. 🐦

65-1205 Bintu Bidì Nè cyà Kwikalakù  
First Assembly Of God  
Rialto, Californie États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)